

আট-আনা সংস্করণ-গ্রন্থমালারি সপ্তদশ গ্রন্থ

বেগম সম্বন্ধ

শ্রী ব্রজেন্দ্রনাথ বন্দ্যোপাধ্যায়

শ্রাবণ—১৩২৪

প্রকাশক—শ্রী গুরুদাস চট্টোপাধ্যায়,
“গুরুদাস চট্টোপাধ্যায় এণ্ড সন্স,”

২০১, কৰ্ণওয়ালিস্ ষ্ট্রীট, কলিকাতা।



প্রিণ্টার—শ্রী বিহারীলাল নাথ,
“এম্বারেলড্ প্রিণ্টিং ওয়ার্কস্”
৯, নন্দকুমার চৌধুরীর বিত্তীয় লেন, কলিকাতা।

উৎসর্গ

যাঁহাকে ইতিহাসক্ষেত্রে গুরুরূপে পাইয়াছি—

আমার সেই পরম শ্রেয়ে

পাটনা কলেজের অধ্যাপক, ইতিহাসাচার্য

শ্রীযুক্ত যদুনাথ সরকার

এম-এ, পি-আর-এস্ মহাশয়ের

কল্পকামলে

এই পুস্তকখানি

উপহার

দিয়া চরিতার্থ হইলাম

নিবেদন

বেগম সমরুর জীবনের কোন ধারাবাহিক ইতিহাস নাই। যিনি অর্ধ শতাব্দীর অধিককাল শান্তিতে রাজত্ব করিয়া গিয়াছেন, তাঁহার জীবন-কাহিনী যে লিপিবদ্ধ হইবার যোগ্য, একথা বোধ হয় অস্বীকার করিবার উপায় নাই; কিন্তু তাঁহার চরিত-কথা এরূপ রহস্য-কুহেলীকার সমাচ্ছন্ন যে, তাহা হইতে তাঁহার প্রকৃত স্বরূপ উপলব্ধি করা সহজসাধ্য নহে;—নানা লেখক তাঁহাকে নানারূপে চিত্রিত করিয়াছেন। আমরা বিবিধ গ্রন্থের সাহায্যে বেগমের ঘটনা-বৈচিত্র্যপূর্ণ জীবনের উপর আলোকপাত করিবার সাধ্যমত চেষ্টা করিয়াছি। পুস্তকখানি সাধারণের সুখপাঠ্য করিবার যথাসাধ্য চেষ্টা করিয়াছি।

বেগমের মুনশী লালা গোকুলচাঁদ ১৮২২ খ্রীষ্টাব্দে ফার্সী ভাষায় পড়ে বেগমের একখানি জীবন-চরিত রচনা করিয়াছিলেন; ইহা অদ্যাপি বিলাতের ব্রিটিশ মিউজিয়মে (*B. M. Cat. of Persian Mss.*, ii, 724a, Add.

25830) রক্ষিত। গ্রন্থকার বলিতেছেন,—‘মুন্শী জয়সিং
 রায়-রচিত গণ্ডে লিখিত বেগমের একখানি জীবনচরিত
 ছিল ; তাহা হারাইয়া যাওয়ার এই পুস্তক রচনার
 আবশ্যক হইয়াছে।’ আমরা Rotary Process-এর
 সাহায্যে গোকুলচাঁদের পুস্তকখানির কিয়দংশের প্রতিলিপি
 আনাইয়াছি ; কিন্তু শেষ অংশ না পাওয়া পর্য্যন্ত ইহা
 ব্যবহার করিবার সুবিধা হইবে না। কর্নেল জন্ (পরে সার
 জন্) মারেকে কলিকাতায় বেগম সমরু একখানি পত্র লিখিয়া-
 ছিলেন ; তাহারও আমরা সন্ধান পাইয়াছি [See *B. M.*
Cat. of Persian Mss., i, 410a, Add. 19502].

ফার্সী ভাষায় লিখিত ইতিহাসে বেগমের জীবনের
 কিছু কিছু ইতিহাস রহিয়াছে। বেগমের রাজত্বকালে
 ভারতে মহারাষ্ট্র-রাজশক্তি প্রবল ছিল ; সুতরাং মারাঠী
 ভাষাতেও এ সম্বন্ধে কোন কোন তথ্য পাইবার যথেষ্ট
 সম্ভাবনা। যদি কখনও, ‘বেগম সমরু’র দ্বিতীয় সংস্করণ
 প্রকাশ করা আবশ্যক হয়, তবে সেই সমস্ত উপাদান
 তাহাতে সন্নিবিষ্ট করিবার ইচ্ছা রহিল।

আমার অগ্রজপ্রতিম স্বনামখ্যাত শ্রীযুক্ত জলধর সেন
 মহাশয় এই অকিঞ্চিৎকর পুস্তকখানির ‘পরিচয়’ লিখিয়া
 দিয়া, ইহার গৌরববৃদ্ধি করিয়াছেন।

আমার গুরুস্থানীয় শ্রদ্ধাম্পদ শ্রীযুক্ত যত্ননাথ সরকার, এম্-এ মহাশয় তাঁহার অমূল্য সময় নষ্ট করিয়া, এই পুস্তকের বহু উপাদান সংগ্রহ করিয়া দিয়াছেন ; শ্রদ্ধেয় শ্রীযুক্ত চারুচন্দ্র মিত্র, এম্-এ, বি-এন্ মহাশয় পুস্তকখানির পাণ্ডুলিপি সংশোধন করিয়া দিয়াছেন, এবং বন্ধুবর শ্রীযুক্ত রাখালদাস বন্দ্যোপাধ্যায়, এম্-এ ও শ্রীযুক্ত দেবেন্দ্রপ্রসাদ ঘোষ নানা গ্রন্থ দিয়া সাহায্য করিয়াছেন, এজন্য আমি তাঁহাদিগের নিকট অশেষ ধন্য।

পরিশেষে শ্রদ্ধেয় বন্ধুবর শ্রীযুক্ত হরিদাস চট্টোপাধ্যায় মহাশয়কে আমার আন্তরিক ধন্যবাদ জ্ঞাপন করিতেছি ; তাঁহার আগ্রহ ব্যতীত এত শীঘ্র 'বেগম সমরু' প্রকাশিত হইত কি না সন্দেহ।

৪৮।২।২, বলরাম দেব ষ্ট্রীট,
কলিকাতা, শ্রাবণ, ১৩২৪ ।

শ্রীব্রজেন্দ্রনাথ বন্দ্যোপাধ্যায়

পরিচয়

বহুদিন পূর্বে প্রসিদ্ধ ঐতিহাসিক, সোদরোপম শ্রীমান্ অক্ষয়কুমার মৈত্রেয় যখন তাঁহার 'সিরাজ-উদৌলা' ও 'মীরকাসিমে'র ইতিহাস লিখিবার উপকরণ সংগ্রহ করিতে-
ছিলেন, সেই সময়ে আমারও ঐ সময়ের ইতিহাস পড়িবার
বাসনা হইয়াছিল ; এবং শ্রীমান্ অক্ষয়ের সহিত আমিও
ইংরাজ-রাজত্বের প্রথম আমলের ঘটনা সকল পড়িতে
আরম্ভ করি । সেই সময় পাটনার হত্যাকাণ্ডের বিবরণে
সমরুর নাম পাঠ করি, এবং তত্পলক্ষে বেগম সমরুর
ইতিহাসও খানিকটা পাঠ করিবার সুযোগ প্রাপ্ত হই ।
তাহার পর, আমার যেমন স্বভাব, আমি সে পথ ত্যাগ
করি ; কিন্তু তখন হইতেই অনেক ইতিহাসপ্রিয় লেখককে
বেগম সমরুর জীবন-কাহিনী লিখিবার জন্য অনুরোধ
করিয়াছি । এত কালের মধ্যে আমার সে অনুরোধ
কেহই রক্ষা করেন নাই । বড়ই আনন্দের বিষয় যে,
আমার পরম স্নেহভাজন শ্রীমান্ ব্রজেননাথ বন্দ্যোপাধ্যায়

আমার এই অনুরোধ রক্ষা করিয়াছেন। তিনি আমার অনুরোধ রক্ষা করিয়াছেন ; তাই তাঁহার অনুরোধে আমি তাঁহার এই সুন্দর পুস্তকের বিজ্ঞাপন লিখিতে বসিয়াছি,— আমার যে এ সম্বন্ধে কিছু বলিবার অধিকার নাই, এ কথাও আমি যোল আনা স্বীকার করিতে পারিতেছি না।

আমি শ্রীমান্ ব্রজেন্দ্রনাথকে অনুরোধ করিয়াই আমার কর্তব্য শেষ করিয়াছিলাম ; আমি তাঁহাকে যে দুই চারিটা উপকরণের সন্ধান দিয়াছিলাম, তাহা নিতান্তই অকিঞ্চিৎকর ; কারণ ব্রজেন্দ্রনাথ যে সমস্ত বিবরণ সংগ্রহ করিয়াছেন, তাহা একেবারেই আমার অগোচর ছিল। এই ধরুন, *Rambles & Recollections of an Indian Official* by Major-General Sir. W. H. Sleemanর বই। ঐ বইখানির সন্ধানই আমি পাই নাই ; অথচ এই পুস্তকখানিই সমধিক বিশ্বাসযোগ্য। তাহার পর, এই জীবন-কাহিনী লিখিতে আরম্ভ করিয়া শ্রীমান্ ব্রজেন্দ্রনাথ প্রতিদিন যে সমস্ত পুস্তক, পত্রিকা প্রভৃতি আনিয়া আমাকে দেখাইতে লাগিলেন, তাহা দেখিয়া আমি অবাক হইয়া যাইতে লাগিলাম। সুপ্রসিদ্ধ ঐতিহাসিক শ্রীযুক্ত যত্ননাথ সরকার মহাশয়ও অনেক তথ্য সংগ্রহ করিয়া দিলেন। এই সমস্ত উপকরণ দেখিয়া বেগম সরকার সম্বন্ধে আমি পূর্বেই

স্বতঃপ্রবৃত্ত হইয়া যে ধারণা করিয়াছিলাম, তাহা আরও বদ্ধমূল হইল। বেগম সমরু সম্বন্ধে শ্রীমান্ ব্রজেন্দ্রনাথ যাহা কিছু সংগ্রহ করিয়াছেন, সে সমস্তই আমি পাঠ করিয়াছি এবং অনেক বিষয়ে তাঁহার সহিত আলোচনাও করিয়াছি; সেই জন্তই এই বিজ্ঞাপন লিখিতে সাহসী হইয়াছি।

বেগম সমরুর জন্মের সাল, তারিখ সম্বন্ধে মতভেদ আছে; শ্রীমান্ ব্রজেন্দ্রনাথ, ‘আনুমানিক ১৭৫০ খ্রীষ্টাব্দে’ তাঁহার জন্ম হইয়াছিল, এই কথা লিখিয়াছেন।

টমাস্ বেগমের সমসাময়িক ছিলেন; তিনি বেগমের জীবনের ১৭৯৬ খ্রীষ্টাব্দের ঘটনাবলী বর্ণনাকালে লিখিয়াছেন যে, ‘She is about 45 years of age’; ইহা হইতে আভাস পাওয়া যাইতেছে যে, ১৭৯৬—৪৫ = অনূন ১৭৫১ খ্রীষ্টাব্দে বেগমের জন্ম।

“*Sardhana*” পুস্তিকায় বেগমের জন্মের তারিখ আনুমানিক ১৭৫০ খ্রীষ্টাব্দ প্রদত্ত হইয়াছে।

বীল্ (Beale) আগায় কন্ম করিতেন, এবং তারিখ-সংগ্রহে বিশেষ যত্ন করিয়াছেন; তাঁহার মতে বেগমের জন্মকাল ১৭৫০ খ্রীষ্টাব্দ (১২৫১ হিজ্রা, শওয়াল)। ১৮৩৬ খ্রীষ্টাব্দের জানুয়ারী মাসে মৃত্যুকালে তাঁহার

বয়ঃক্রম ৮৮ চান্দ্র বৎসর, অর্থাৎ অনূন ৮৫ সৌর বৎসর ছিল।

বেকন্ (Bacon) বেগমের শেষ বয়সের সমসাময়িক ; তিনি বেগমের জন্মের কোন তারিখ দেন নাই বটে, তবে তাঁহার মতে মৃত্যুকালে বেগমের বয়স ৮৯ বৎসর। বেকন্ এই ৮৯, চান্দ্র কি সৌর বৎসর, তাহা খুলিয়া লেখেন নাই। ইহাকে চান্দ্র বৎসর ধরিলে ১৭৫০-৫১ খ্রীষ্টাব্দই পাওয়া যায়।

তাহা হইলে দেখা যাইতেছে যে, বেগমের জন্মকাল—

টমাসের মতে	অনূন	১৭৫১	খ্রীঃ
Bacon	„	১৭৫০-৫১	„
‘Sardhana’ পুস্তকের মতে			„	১৭৫০	„
Beale সাহেবের মতে	...			১৭৫০	„

১৭৫০ খ্রীষ্টাব্দের ১৮ই নভেম্বর হইতে ১৭৫১ খ্রীষ্টাব্দের ৭ই নভেম্বর পর্য্যন্ত ১১৬৪ হিজ্রা বৎসর ; ফলতঃ ১৭৫০ ও ১৭৫১ খ্রীষ্টাব্দ একই হিজ্রা বৎসর জ্ঞাপন করিতেছে ; সুতরাং Thomas, ‘Sardhana’, Beale এবং Bacon একমত।

বেগমের স্মৃতিস্তম্ভে তাঁহার বয়ঃক্রম ৯০ বৎসর উল্লিখিত।

আছে। ইহাকেও চান্দ্র বৎসর ধরিলে ১৭৫১-৫২ খৃষ্টাব্দই পাওয়া যাইবে ; সুতরাং ইহাও খুব নিকটবর্তী।

Sleeman লিখিয়াছেন, ১৭৮১ খৃষ্টাব্দের মে মাসে, খৃষ্টধর্ম গ্রহণ কালে বেগমের বয়স ৪০ বৎসর ছিল ; অর্থাৎ ১৭৮১—৪০=১৭৪১ খৃষ্টাব্দ। ইহা ঠিক নহে। Atkinson সাহেবের মতে ১৭৫৩ খৃষ্টাব্দে বেগমের জন্ম।

এই সমস্ত পর্যালোচনা করিয়া, আমারও মনে হয় যে, বেগম সম্বর ১৭৫০ খৃষ্টাব্দেই জন্মগ্রহণ করিয়াছিলেন ; সুতরাং শ্রীমান্ ব্রজেন্দ্রনাথ বেগমের জন্মের বৎসর বলিতে ‘আনুমানিক’ শব্দটা ব্যবহার না করিলেও পারিতেন। এই অতি সাবধানতা তাঁহার সত্যনিষ্ঠারই পরিচায়ক।

তাঁহার পর সর্দানার বিদ্রোহ ও বেগম সম্বর পীড়নের কথা। এ সম্বন্ধে *Military Memoirs of George Thomas* নামক পুস্তকে যে বিবরণ লিপিবদ্ধ হইয়াছে, স্লিম্যানের লিখিত বিবরণের সহিত তাঁহার অনৈক্য দৃষ্ট হয়, অথচ এই দুইখানি পুস্তকের কোনখানিকেই একেবারে ফেলিয়া দেওয়া যায় না। শ্রীমান্ ব্রজেন্দ্রনাথ দুইটা বিবরণই লিপিবদ্ধ করিয়াছেন, এবং স্লিম্যানের বিবরণের উপরই অধিকতর বিশ্বাস স্থাপন করিয়াছেন। আমি তাঁহার

(৮৭/০)

এই বিচার-নৈপুণ্যের প্রশংসা না করিয়া থাকিতে পারি-
লাম না ।

ঐতিহাসিক ব্যক্তি বা ঘটনার বিবরণ লিপিবদ্ধ করিতে
হইলে যে প্রকার একাগ্রতা, সত্যনিষ্ঠা, তথ্যানির্ণয়ের চেষ্টা ও
অনুসন্ধিৎসা থাকা প্রয়োজন, এই পুস্তকখানিতে তাহা
আছে, এবং সেজন্য শ্রীমান্ ব্রজেন্দ্রনাথ প্রশংসা পাইবার
উপযুক্ত ; তাহার অধিক কি প্রাপ্য তাঁহার আছে, পাঠক-
গণ বিচার করিবেন ।

কলিকাতা,
আষাঢ়, ১৩২৪ ।

শ্রীজলধর সেন

চিত্র-সূচি

১।	বেগম সমরু—(মেল্ভিল্-অঙ্কিত চিত্র হইতে)	১
২।	জর্জ টমাস্	১৬
৩।	মোগল-সম্রাট্ শাহ্ আলম্ ...	৩২
৪।	মহারাজ্জীবীর মাধোজী সিক্কিয়া ...	৪৮
৫।	সর্ধানার রাজপ্রাসাদ ...	৬৪
৬।	ভরতপুরের যুদ্ধ—(প্রাচীন চিত্র হইতে)	৮০
৭।	বেগমের স্মৃতিস্তম্ভ—সর্ধানা ...	৯৬
৮।	সেন্ট মেরী গীর্জা—সর্ধানা ...	১১২

“সত্য প্রিয় হউক আর অপ্রিয় হউক, সাধারণের
গৃহীত হউক আর প্রচলিত মতের বিরোধী হউক,
তাহা ভাবিব না। আমার স্বদেশ-গৌরবকে আঘাত
করুক আর না করুক, তাহাতে ক্রক্ষেপ করিব না।
সত্য প্রচার করিবার জন্য, সমাজে বা বন্ধুবর্গের
উপহাস ও গঞ্জনা সহিতে হয় সহিব ; কিন্তু তবুও
সত্যকে খুঁজিব, বুঝিব, গ্রহণ করিব ;—ইহাই
ঐতিহাসিকের প্রতিজ্ঞা।”

অধ্যাপক শ্রীযদুনাথ সরকার ।



বৃদ্ধবয়সে বেগম সমরু

[পৃষ্ঠা ১

পূর্বভাষ

বর্তমান প্রস্তাবে যে সময়ের একটি স্মরণীয় কীর্তিকাহিনী লিপিবদ্ধ হইবে, সে সময়ে ভারতবর্ষ সম্পূর্ণভাবে বৃটিশ-অধিকারভুক্ত হয় নাই। তখন মোগল-অধঃপতন ও ইংরেজ-অভ্যুদয়ের সন্ধিস্থল—চারিদিকেই বিদ্রোহ, অশান্তি ; ঘটনা-পরম্পরা যুগ-পরিবর্তনের সূচনা করিতেছিল ; তখন ভারতের বিভিন্ন প্রদেশে উত্থান-পতনের অভিনয় চলিতেছিল ;—প্রকৃতপক্ষে তখন ভারতবর্ষ ভাগ্যবিপর্যায়ের লীলাক্ষেত্র। এই বিরোধ ও বিপ্লবের যুগে কেমন করিয়া এক নগণ্য আরব-কুমারী অতি হীন অবস্থা হইতে ক্ষমতা ও ঐশ্বর্যের অত্যাচ্চ শিখরে অধিরূঢ় হইয়াছিলেন, কেমন করিয়া স্বীয় অননুসাধারণ বুদ্ধিকৌশলে ও বাহুবলে আত্মসম্মান অক্ষুণ্ণ রাখিয়া নিজ রাজ্যে অপ্রতিহত প্রভাবে প্রজাশাসন ও পালন করিতে সমর্থ হইয়াছিলেন এবং অবশেষে জীবন-সন্ধ্যায় সঞ্চিত বিপুল অর্থরাশি অকাতরে সংকার্য্যে ব্যয় করিয়া জগতে অক্ষয়কীর্তি অর্জন করিয়া

গিয়াছেন, সেই বিশ্বজনক বিবরণ তাৎকালিক ভারতবর্ষের ইতিহাসের এক অংশের উপর উজ্জল আলোকপাত করিয়াছে। এই অসাধারণ শক্তিশালিনী মহিলা বেগম সমরক নামে পরিচিত। এই বেগম সমরকেই বিবাহ করিবার জন্ত একাধিক ইউরোপীয় প্রতিদ্বন্দ্বিতা করিয়াছিলেন,—এই বেগম সমরকেই দিল্লীখর শাহ্ আলম্ ‘সম্রাটের সর্বাপেক্ষা প্রিয় দুহিতা’ বলিয়া অভিহিত করিয়াছিলেন—এই বেগম সমরকেই এক সময়ে লর্ড বেণ্টিঙ্ক ‘সমাদৃত বন্ধু’ বলিয়া সম্মানিত করিয়াছিলেন। বেগম সমরুর জীবন-কাহিনী ঘটনা-বৈচিত্র্য ও অবস্থা-বিপর্যয়ে সত্য-সত্যই উপন্যাস-বর্ণিত চিত্র অপেক্ষাও চিত্তাকর্ষক ;—কল্পনামূলক কাহিনী অপেক্ষাও বিচিত্র ! এইজন্যই ঐতিহাসিকপ্রবর কীন্ (H. G. Keene) বলিয়াছেন :—“*Such was the splendid termination of the Slave-girl’s career—a romance scarcely to be outdone by the most inventive fiction.*”

বেগম সমর

প্রথম অধ্যায়

ওয়াল্টার রীন্হার্ডের ভারতে আগমন ;

মীরকাসিমের সেনাদলে সমর

অষ্টাদশ শতাব্দীর শেষার্ধ্বে হইতে উনবিংশ শতাব্দীর প্রারম্ভকাল—এই অনতিদীর্ঘ সময় প্রকৃতই ভারতের পক্ষে বড়ই দুর্দিন ! ভারতে বাবরের জীবনব্যাপী চেষ্টার ফলে প্রতিষ্ঠিত এবং আকবরের তীক্ষ্ণ রাজনীতি-কৌশলে দৃঢ়ীকৃত মোগল-সাম্রাজ্য যখন শক্তিহীন—যখন নামে মাত্র পর্য্যবসিত শেষ মোগল-সম্রাট শাহ্ আলম্ মহারাষ্ট্র, শিখ, জাঠ প্রভৃতি শক্তিপুঞ্জ বেষ্টিত হইয়া কোনপ্রকারে জীবন যাপন করিতেছিলেন, তখন যিনি একটু শক্তি সংগ্ৰহ করিতে পারিতেছিলেন, তিনিই উপযুক্ত সুযোগ বুঝিয়া সম্রাটের অধীনতা ছিন্ন করিয়া, ভারতের নানাদিকে ক্ষুদ্র বা বৃহৎ

রাজ্য-প্রতিষ্ঠার চেষ্টা ও আয়োজন করিতেছিলেন। তখন সর্বত্রই রণসজ্জা—সর্বত্রই রণকোলাহল—ভারতবর্ষে তখন অন্তর্বিদ্রোহানল প্রজ্বলিত। এই সময়ে ইউরোপের নানা-স্থান হইতে বহু লোক ঐশ্বর্যা, ক্ষমতা ও প্রতিপত্তি লাভের জন্ত ভারতীয় ভিন্ন ভিন্ন প্রদেশের রাজগণের সেনাদলে প্রবিষ্ট হইয়াছিল। একজন ঐতিহাসিক লিখিয়া-ছেন, ইহাদের অধিকাংশই নিরক্ষর, অমিতাচারী ও সমাজের নিয়ন্ত্রণের লোক,—“the very dross of society—men who could neither read, nor write, nor keep themselves sober.” তবে ইহাদিগের মধ্যে সদ্বংশজাত, উদার-হৃদয় বীরেরও যে একান্ত অভাব ছিল, এ কথাও বলা যায় না। দে বোয়ান্, জর্জ টমাস্, দুঙ্গেনেক্, পেরন্ প্রভৃতি সমরকুশল ব্যক্তিগণ ভারতে সামরিক কার্যে নিযুক্ত হইয়া, দেশীয় সমর-বিভাগে প্রতীচ্য-প্রথা প্রবর্তনের পুত্রপাত করিতেছিলেন। ভাগ্য-পরীক্ষার্থীদের সহিত তুলনায় এই সকল পুরুষসিংহের সংখ্যা যে অতি অল্প, তাহা না বলিলেও চলে। ইউরোপীয়দিগের নিকট তখন ভারতবর্ষ রত্নপ্রস্থ ; সকলেরই ধারণা, কোনপ্রকারে তথায় একবার উপস্থিত হইলেই অত্যল্পকালের মধ্যে প্রভূত ধনরত্নের অধিকারী হইতে পারা যায়। এ কল্পনা যে অলৌক,

তাহাও নহে। তাহাদের বাহুবল ও বুদ্ধিবল ছিল, তাহারা এই বিপ্লবের সময় ভারতবর্ষে উপস্থিত হইয়া অল্প-দিনেই যথেষ্ট অর্থোপার্জন করিয়া দেশে ফিরিয়া যাইত। তাহাদের ঐশ্বর্য্য দর্শন করিয়া এবং তাহাদের মুখে ভারতের অতুল সম্পদের কথা শুনিয়া, অনেকেই ভাগ্যপরীক্ষার জন্ম এদেশে আসিত—অনেকেই সফল-মনোরথ হইত।

এই ভাগ্যপরীক্ষার্থীদিগের মধ্যে ওয়াল্টার রীন্হাৰ্ড অন্যতম। এই অজ্ঞাতকুলশীল জৰ্ম্মান যুবক ধনলাভা-কাঙ্ক্ষায়, একখানি ফরাসী জাহাজে সামান্য কার্য্য গ্রহণ করিয়া প্রথমে ভারতে আগমন করে। জাহাজ ভারত-উপকূলে পৌঁছিলেই সে পলায়ন করিয়া ফরাসী সেনাদলে প্রবেশ করে। কিছুদিন দক্ষিণ-ভারতে নানাস্থানে কার্য্য করিবার পর রীন্হাৰ্ড বাঙ্গালায় আসিয়া, কখন বা ঈষ্ট ইণ্ডিয়া কোম্পানীর অধীনে, কখন বা চন্দননগরে ফরাসী দলে কার্য্য করিয়া, অবশেষে নবাব মীরকাসিমের সেনাদলে প্রবিষ্ট হয়। ইংরেজের অনুগ্রহে বাঙ্গালার নবাবী লাভ করিয়া মীরকাসিম তখন ইংরেজের অধীনতাশাস ছিল করিবার আয়োজনে ব্যাপৃত ; সৈন্যগণকে প্রতীচ্য-প্রথায় শিক্ষিত করিবার জন্ম তখন মীরকাসিম সাহসী ইউরোপীয়-দের নিজ সৈন্যদলে গ্রহণ করিতেছিলেন। রীন্হাৰ্ডের

ভাগ্যলক্ষী তাহাকে এই সময় দক্ষিণাত্য হইতে বাঙ্গালা দেশে টানিয়া আনিলেন ;—তাহার সৌভাগ্যের সূত্রপাত হইল ।

রীন্হার্ভের মুখাবয়বে সৌন্দর্যের লেশমাত্র ছিল না । তাহার বিষন্ন আকৃতি ও গম্ভীর প্রকৃতির জন্য তাহার বন্ধুরা তাহাকে ‘সোম্বার’ (Sombre) বলিয়া ডাকিত । ক্রমে তাহার প্রকৃত নাম পরিবর্তিত হইয়া গেল ; তাহার ডাক-নাম ‘সোম্বার’ শেষে ‘সমরু’তে পরিণত হইল । কাগজপত্রেও রীন্হার্ভ নাম আর ব্যবহৃত হইত না ।

১৭৬৩ খ্রীষ্টাব্দের ২রা আগষ্ট ঘিরিয়ার মীরকাসিমের সহিত ইংরেজের সঙ্ঘর্ষে সমরু বিশেষ বরণচাতুর্য্য দেখাইয়া যথেষ্ট খ্যাতি অর্জন করিয়াছিল । ভাগ্য যখন সুপ্রসন্ন হয়, তখন নিতান্ত সামান্য ব্যক্তিও উন্নতি লাভ করে—সমরুরও তাহাই হইল,—তাহার বরণ-নৈপুণ্যে মীরকাসিম সন্তুষ্ট হইলেন ; যে আশায় আশান্বিত হইয়া সে সাত সমুদ্র পার হইয়া ভারতে আসিয়াছিল, মীরকাসিমের কৃপাদৃষ্টিতে তাহার সে আশা পূর্ণ হইল । তাহার পর ১৭৬৩ খ্রীষ্টাব্দের অক্টোবর মাসে, মীরকাসিমের আদেশে, নিরস্ত্র ইংরেজ-বন্দীদিগকে নিশ্চয়ভাবে হত্যা করিয়া, সমরু ইতিহাসের

পৃষ্ঠা কলঙ্কিত করিয়া রাখিয়াছে ; অত্য়াপি এ কলঙ্ক-কাহিনী পাটনার স্মৃতিস্তম্ভে জ্বলন্ত-অক্ষরে ঘোষণা করিতেছে :—

“Walter Reinhardt *alias* Sumroo,
a base renegade.”

ইহার কিছুদিন পরে বক্সারের যুদ্ধে মীরকাসিমের পরাজয় ঘটিলে, সমরু তাহার অধীন সৈন্যবর্গ লইয়া অযোধ্যার নবাবের সেনাদলে প্রবেশ করে। ইংরেজ-পক্ষ পাটনার হত্যাকাণ্ডের কথা স্মরণ করিয়া সমরুকে তাঁহাদের হস্তে সমর্পণ করিবার জন্য অযোধ্যার নবাবকে আদেশ করিলেন। এদিকে সমরু এ সমস্ত কথা পূর্বেই অবগত হইয়া, স্বীয় সৈন্যদলসহ রোহিলখণ্ডে গমন করিয়া কিছুদিন রহমৎ আলির অধীনে কার্যে প্রবৃত্ত হইল। বিজয়ী ইংরেজ-সেনার সাহায্য নিরাপদ নহে বুঝিয়া, অল্পদিন পরেই সে নিজ সৈন্যদলসহ ভরতপুরের জাঠরাজা জওয়াহির সিংহের কক্ষ গ্রহণ করে। ১৭৬৮ খ্রীষ্টাব্দের জুন মাসে জওয়াহিরের মৃত্যু হইলে, সমরু দুই তিন মাসের জন্য দ্বিতীয়বার জাঠরাজা রতন সিংহের অধীনে কক্ষ স্বীকার করে। তৎপরে কিছুদিন দিল্লীর এক সেনানীর অধীনে কার্য করিয়া, সর্বশেষে সমরু ও তাহার সেনাদল ৬৫,০০০ টাকা বেতনে দিল্লীখর শাহ্ আলমের দক্ষিণ-

হস্ত স্বরূপ মন্ত্রী নাজফ খাঁর অধীনে কর্মে প্রবিষ্ট হয়।
অল্প সময়ের মধ্যে বহু প্রভুর সেবা করিয়া চঞ্চলচিত্ত সমরু
এইবার স্থির হইয়া বসিল। সম্রাটের নিকট হইতে স্বীয়
সৈন্যদলের ভরণপোষণের জন্ত, ১৭৭২ খ্রীষ্টাব্দে সমরু তৎকালে
ছয় লক্ষ টাকা আয়ের মীরাতের সন্নিকটস্থ সার্বানা পরগণা
ও তৎসংলগ্ন ভূমি জাগীর লাভ করে; এই কার্যেই সে
তাহার জীবনের অবশিষ্টকাল অতিবাহিত করিয়াছিল।

দ্বিতীয় অধ্যায়

বেগম সমরু : বিবাহ ; বেগমের সেনাদলে জর্জ টমাস ;

বেগমের খ্রীষ্টধর্মে দীক্ষা

১৭৬৭ খ্রীষ্টাব্দে, (?) ভারতপুরের জাঠরাজার অধীনে, সমরু যখন দিল্লী অবরোধ করে, তখন এক আরব-কুমারীর সহিত তাহার পরিচয় হয়। এই উদ্ভিন্নযৌবনা কুমারীর রূপলাবণ্যে মুগ্ধ হইয়া সে তাঁহার প্রতি আকৃষ্ট হয়। ক্রমে এরূপ অবস্থা ঘটিল যে, একের অদর্শনে অপরে প্রকৃতিস্থ থাকিতে পারে না ; কারণ সাহচর্য্য প্রণয়ের লক্ষণ। এই পবিত্র প্রণয় স্থায়ী করিবার জন্ত সমরু যথারীতি মুসলমান-প্রথানুসারে তাঁহাকে বিবাহ করে। এই আরব-কুমারীই বেগম সমরু।

বেগম সমরুর বংশ-পরিচয় সম্বন্ধে মতভেদ আছে। বিভিন্ন লেখকের কথা আলোচনা করিয়া জানা যায় যে, মীরাতের ৩০ মাইল উত্তর-পশ্চিমে কোটানা গ্রামে লতিফ

আলি খাঁ নামে জনৈক আরব-বংশীয় সম্ভ্রান্ত ব্যক্তি বাস করিতেন। তাঁহার দুই বিবাহ। দ্বিতীয়া স্ত্রীর গর্ভে, আনুমানিক ১৭৫০ খ্রীষ্টাব্দে, একটা অপকৃপ রূপলাবণ্যময়ী কন্যার জন্ম হয়। এই কন্যার জন্মের ছয় বৎসর পরে লতিফ আলির মৃত্যু হয়। তাঁহার প্রথম পক্ষের স্ত্রীর একটা পুত্র ছিল। পিতার মৃত্যুর পর এই দুর্ভাগ্য তাহার বিমাতা ও বৈমাত্রেয় ভগিনীর নিগ্রহ করিবার সুযোগ প্রাপ্ত হইল। কন্যা ও জননী অমানবদনে সমস্ত নির্ধাতন সহ করিয়া কিছুদিন গৃহে ছিলেন; কিন্তু সপত্নীপুত্রের অত্যাচার যখন অসহ্য হইয়া উঠিল, তখন অনন্তোপায় বিধবা, কন্যাসহ দিল্লীতে বাস করিতে লাগিলেন। ক্রমে বালিকা যৌবনে পদার্পণ করিল। তাহার পর কেমন করিয়া সমরুর সহিত তাঁহার পরিচয় ও বিবাহ হয়, তাহা পূর্বেই বিবৃত হইয়াছে। বিবাহের পর হইতেই এই আরব-কুমারী 'বেগম সমরু' আখ্যা প্রাপ্ত হ'ন।

প্রথমে এদেশে আসিয়া সমরু স্বীয় মাতৃভাষায় কথোপকথন করিত, সাহেবী পরিচ্ছদ ব্যবহার করিত; কিন্তু চন্দননগর ত্যাগের সঙ্গে সঙ্গেই সে জাতীয় পোষাক ও আচার-পদ্ধতি ত্যাগ করিয়া মোগলের বেশভূষা অবলম্বন করিয়াছিল; এই সময় হইতেই সে আপনার হারমের সৃষ্টি

করে। বেগম সমরুকে বিবাহকালে সমরুর উন্মাদরোগগ্রস্তা
অপর এক মুসলমান-পত্নী বর্তমান।

বেগম সমরু অসাধারণ বুদ্ধিমতী রমণী ছিলেন। তিনি
অল্পদিনের মধ্যেই সমরুকে স্ববশে আনিয়া ফেলিলেন।
সমরু-বিজয়ী দুর্দর্ষ সমরু, বেগমের রূপজ-মোহে ও গুণে
আকৃষ্ট হইয়া, জীবনের উচ্চাভিলাষে জলাঞ্জলি দিয়া,
যাযাবরবৃত্তি পরিত্যাগপূর্বক স্থিরভাবে জীবনযাত্রা নিকাহ
করিতে মনস্থ করিল। তাঁহাকে বিবাহ করিবার পর
হইতে, সমরু আর বড় একটা যুদ্ধবিগ্রহ-কার্যে লিপ্ত
থাকিত না। সে এখন জীবনের অবশিষ্টকাল সার্থানায়
সুখে যাপন করিবে স্থির করিল। তাহার এই স্থায়িত্বে
অবস্থানের মূলে যে বেগমের প্রভাবই সমধিক ছিল, ইহা
স্পষ্ট প্রতীয়মান হয়। বেগম যখন দেখিলেন, সমরু তাঁহার
সম্পূর্ণ করতলগত, তখন তিনি একে একে সকল ক্ষমতা
স্বীয় হস্তে গ্রহণ করিতে লাগিলেন—গুণমুগ্ধ সমরু ইহাতে
দ্বিকৃত্তি করিল না। এক কথায় সমরু, বেগমের নিকট
আত্মসমর্পণ করিল। বীরের এই পরাজয়ের মূলে চিত্ত-
দুর্বলতা ভিন্ন আর কিছুই দেখিতে পাওয়া যায় না।

সমরু জীবনের সায়াক্ভাগে আগ্রার শাসনভার প্রাপ্ত
হইয়াছিল। ১৭৭৮ খ্রীষ্টাব্দের ৪ঠা মে আগ্রায় তাহার

মৃত্যু ঘটে। মৃত্যুর পর প্রথমে তাহাকে তাহার উদ্ভানে সমাহিত করা হয়; পরে বেগমের চেষ্টায় তাহার সমাধি আগ্রার পুরাতন ক্যাথলিক সমাধিক্ষেত্রে স্থানান্তরিত করা হইয়াছিল। বেগমের গর্ভে সমরুর কোন সন্তান জন্মে নাই; কিন্তু প্রথম পক্ষের মুসলমান স্ত্রীর গর্ভজাত সমরুর এক পুত্র ছিল—ইনিই ইতিহাসে জাফর-ইয়াব্ খাঁ নামে পরিচিত।

সমরুর যখন মৃত্যু হয়, তখন তাঁহার পুত্র অপ্রাপ্তবয়স্ক। সমরুর ইউরোপীয় ও দেশীয় সৈনিক কর্মচারীরা এক-বাক্যে বেগমকেই তাহাদের মৃত প্রভুর পদে বরণ করিবার জন্ত সম্রাটের নিকট আবেদন করিল। সম্রাটের সম্মতিক্রমে বেগম সমরুর অভিষেক-কার্য সম্পন্ন হইয়া গেল। বেগমই সমরুর সমস্ত সম্পত্তির অধিকারিণী হইলেন এবং স্বহস্তে সৈন্ত-পরিচালনার ভার গ্রহণ করিলেন।

স্বামীর মৃত্যুর তিন বৎসর পরে ১৭৮১ খ্রীষ্টাব্দের ৭ই মে বেগম সমরু সপত্নীপুত্রসহ আগ্রায় যাজক গ্রেগোরিও কর্তৃক রোমান্ ক্যাথলিক মতে খ্রীষ্টধর্মে দীক্ষিত হইলেন। এই দীক্ষাকালে বেগম 'জোয়ানা নোবিলিস্' এবং তাঁহার সপত্নীপুত্র 'ওয়াল্টার ব্যাল্থাজার রীন্হাড্' নাম গ্রহণ করেন।

ইহার অত্যল্পকাল পরেই জর্জ টমাস্ নামে একজন আইরিশ নানাস্থানে ঘুরিয়া অবশেষে বেগমের নিকট আসিয়া উপস্থিত হ'ন। কেমন করিয়া তিনি প্রথমে ভারতে উপনীত হ'ন, তাহার সঠিক বিবরণ জানিবার উপায় নাই। কেহ কেহ বলেন, তিনি প্রথমে একখানি ব্রিটিশ-রণপোতের নাবিকরূপে এদেশে আগমন করেন। জাহাজের কার্য ত্যাগ করিয়া তিনি কয়েক বৎসর মাদ্রাজে কার্য করিবার পর, ১৭৮৭ খ্রীষ্টাব্দে মোগল-রাজধানী দিল্লীতে উপনীত হইয়া বেগম সমরুর সেনাদলে প্রবেশ করেন।

বেগম সমরু লোক চিনিতে পারিতেন। প্রতিভাশালী টমাস্কে তিনি অল্পদিন মধ্যেই একজন অধিনায়কের পদ প্রদান করিলেন। টমাস্ বিভিন্ন অভিযানে রণ-চাতুর্য্য প্রদর্শন করিয়া বেগমের বিশেষ প্রিয়পাত্র হইয়া উঠিলেন; প্রকৃতপক্ষে সে সময়ে তিনিই বেগম সমরুর প্রধান পরামর্শদাতা। টমাসের অধীনে বেগম সমরুর সেনাদল সুশিক্ষিত হইয়া প্রবল-পরাক্রমশালী হইয়া উঠিল; তাহাদের বীরত্ব ও রণনৈপুণ্যে সকলেই বেগম সমরুকে ভীতিচক্ষে দেখিতে লাগিল।

তৃতীয় অধ্যায়

গোলাম কাদিরের পরাজয় ; সম্রাটের

উদ্ধারকল্পে বেগম সমরু

তখন ভারতের চারিদিকেই বিদ্রোহ, অশান্তি ; মহারাষ্ট্রবীর মাধোজী সিন্ধিয়াই তখন দিল্লীশ্বরের প্রতিনিধি — আর্ঘ্যাবর্তের ভাগ্য-বিধাতা । জম্মনগরের রাজা প্রতাপ সিংহ বিদ্রোহী হইলে, মাধোজী স্বয়ং বিপুল সৈন্য লইয়া তাঁহাকে বশতা স্বীকার করাইবার জন্ত অগ্রসর হইলেন ; কিন্তু তাঁহার পক্ষীয় বহু মোগল সৈন্য ও সভাসদ প্রতাপ সিংহের উৎকোচে বশীভূত হইয়া শত্রুপক্ষে যোগদান করিল । ফলে সিন্ধিয়া সে যুদ্ধে পরাজিত হইলেন । বিদ্রোহীকে সমুচিত শিক্ষা দিবার জন্ত তিনি দাক্ষিণাত্য হইতে সৈন্য-সংগ্ৰেহের আশায় গোয়ালিয়রে গিয়া অবস্থান করিতে লাগিলেন ।

রাজধানী দিল্লীতে তখন শাহ্ নিজামুদ্দীন্ সিন্ধিয়ার

প্রতিনিধিরূপে অবস্থান করিতেছিলেন। তিনি প্রভুর পরাজয়-বার্তা ও তাঁহার দাক্ষিণাত্য অভিমুখে গমনের সংবাদ পাইয়া পূর্বাভেই রাজধানী সুরক্ষিত করিতে তৎপর হইলেন ; আর এইরূপ করা যে বিশেষ আবশ্যিক হইয়াছিল, তাহা পরবর্তী ঘটনা হইতে স্পষ্ট বুঝা যায়।

১৭৮৭ খ্রীষ্টাব্দ। বিদ্রোহী জাব্তা খাঁর পুত্র গোলাম কাদির খাঁ তখন সাহারানপুরের শাসনকর্তা। তিনি সুবিধা বুঝিয়া এই সময়ে বিদ্রোহী হইলেন। সম্রাট শাহু আলমের নাজির, অকৃতজ্ঞ মনসুর আলি খাঁ সম্রাটের প্রতি তাঁহার কৃতজ্ঞতা বা কর্তব্যের কথা বিস্মৃত হইয়া বিদ্রোহী গোলাম কাদিরের পক্ষাবলম্বন করিয়াছিলেন। তিনি এই সুযোগে গোলাম কাদিরকে সৈন্যে রাজধানীতে আহ্বান করিলেন। গোলাম কাদির অবিলম্বে বিপুল-বাহিনীসহ যমুনার পূর্বতীরে দুর্গের অপরপারে আসিয়া উপস্থিত হইলেন। সিন্ধিয়ার প্রতিনিধি এই সংবাদে, একদল প্রবল সৈন্য বিদ্রোহীর বিরুদ্ধে প্রেরণ করিলেন ; কিন্তু তাঁহার সৈন্যবর্গ নদী পার হইবামাত্র গোলাম কাদিরের সৈন্যগণের অতিক্রান্ত আক্রমণে স্রোতের মুখে ভুগের ঞ্চায় কোথায় ভাসিয়া গেল। সিন্ধিয়ার প্রতিনিধি সৈন্যগণের পরাজয়-সংবাদে মুহমান হইয়া পড়িলেন—

তিনি আত্মপ্রাণরক্ষার্থ পলায়ন করিয়া রাজধানী হইতে ২০ মাইল দক্ষিণে বল্লমগড়ে আশ্রয় লইলেন ।

বিদ্রোহী গোলাম কাদিরের মনস্কামনা পূর্ণ হইল— তিনি বিনা বাধায় রাজধানীতে প্রবেশলাভ করিলেন । সম্রাট শাহ্ আলম্ তখন নিরুপায়—সম্পূর্ণভাবে অরক্ষিত । গোলাম কাদির সম্রাটকে নানারূপে নির্যাতন করিতে লাগিলেন এবং তাঁহার নিকট হইতে ‘আমির-উল্-উমারা’র পদ দাবী করিলেন । শাহ্ আলম্ সম্পূর্ণ অনিচ্ছা সত্ত্বেও বাধ্য হইয়া তাঁহার মনস্কামনা পূর্ণ করিতে স্বীকৃত হইলেন ।

গোলাম কাদির যদিও এক্ষণে তাঁহার উদ্দেশ্য সিদ্ধ করিলেন, তথাপি তাঁহার শক্তি তখনও দৃঢ়প্রতিষ্ঠিত হয় নাই । মহারাষ্ট্রগণের ও সম্রাটপক্ষীয় বহুলোক তখনও দিল্লীতে অবস্থান করিতেছিলেন । তাঁহারা সম্রাটের এই শোচনীয় অবস্থা দেখিয়া, এবং তাঁহার উপর বিদ্রোহীর অগ্রায় আচরণের কথা শুনিয়া, ইহার প্রতিকার-বিধানের জন্য দৃঢ়সঙ্কল্প হইলেন । ইঁহাদিগের মধ্যে অগ্রণী ছিলেন— বেগম সমরু ।

প্রতাপ সিংহের বিরুদ্ধে যুদ্ধকালে বেগম সমরু সিদ্ধিয়ার নির্দেশ মত পানিপথে সৈন্যচালনা করিতেছিলেন । এত বড় একটা কার্যের গুরুভার একজন নারীর উপর গুস্ত



জর্জ টমাস

[পৃষ্ঠা ১৬

করিয়া সিদ্ধিয়া যে নিশ্চিত ছিলেন, তাহার একমাত্র কারণ এই যে, বেগমের পারদর্শিতা সম্বন্ধে তাঁহার অতি উচ্চ ধারণা ছিল। এক্ষণে সম্রাটের উদ্ধারসাধনের জন্ত বেগম সমরুর সঙ্কল্পের কথা শুনিয়া সকলেই বৃত্তিতে পারিল, সিদ্ধিয়া উপযুক্ত পাত্রীর উপরই গুরুভার বৃত্ত করিয়াছিলেন।

বেগম সমরু হুতগোরব সম্রাটের অবস্থার কথা শুনিয়া অবিলম্বে বিদ্রোহীর সমুচিত শাস্তি-বিধানের জন্ত অগ্রসর হইলেন। গোলাম কাদির রাজদরবারে বেগমের প্রাধান্তের কথা পূর্ব হইতেই অবগত ছিলেন; এক্ষণে বেগম স্বয়ং অগ্রসর হইতেছেন শুনিয়া, তিনি প্রাসাদ হইতে দূরে অবস্থান করিয়া মসজিদে বিনয় সহকারে বেগমের নিকট প্রস্তাব করিয়া পাঠাইলেন যে, বেগম সমরু যদি তাঁহার উদ্দেশ্য-সিদ্ধিকল্পে সহায়তা করেন, তবে উভয়ে সমভাবে রাজ্যশাসন কার্য পরিচালনা করিতে থাকিবেন।

গোলাম কাদিরের এই ঘৃণিত প্রস্তাবে সম্মত হইলে, হয়ত বা বেগম সমরু ক্ষমতা ও ঐশ্বর্যের উচ্চশিখরে উঠিতে পারিতেন; কিন্তু তিনি তাহা করেন নাই; তিনি সম্রাটের প্রতি তাঁহার কর্তব্যের কথা স্মরণ করিয়া, কৃতঘ্ন রোহিলা-সর্দারের প্রস্তাব ঘৃণাভরে অগ্রাহ করিলেন

এবং অবিলম্বে সমগ্র সৈন্যসহ রাজপ্রাসাদে উপস্থিত হইয়া বিদ্রোহীকে জানাইলেন যে, সম্রাটকে রক্ষা করিবার জন্য তিনি প্রাণ পর্য্যন্ত বিসর্জন দিতে সর্বদাই প্রস্তুত। বেগমের সৈন্য অবস্থিতিতে শাহ্ আলম্ যে কি পর্য্যন্ত আশান্বিত হইয়াছিলেন, তাহা সহজেই অনুমেয়।

গোলাম কাদির বেগমের সহায়তালাভে বিফল হইয়া, ভীষণ ক্রুদ্ধ হইলেন। যমুনার পরপারে শিবিরে উপস্থিত হইয়া, তিনি সম্রাট-দরবারে একজন দূতের সাহায্যে জানাইলেন যে, অবিলম্বে সম্রাট যদি বেগম সমরুকে প্রাসাদ হইতে বিতাড়িত না করেন, তাহা হইলে তিনি সম্রাটের শত্রুতাচরণ করিতে কিছুমাত্র কুণ্ঠিত হইবেন না। গোলাম কাদিরের এই প্রস্তাব সম্রাট ঘৃণার সহিত প্রত্যাখ্যান করিলেন। ক্রুদ্ধ গোলাম কাদির প্রাসাদের উপরে গোলা বর্ষণ করিতে লাগিলেন। বেগম সমরুও নীরবে এ আক্রমণ সহ্য করিলেন না; তাঁহার কামানও তখন গর্জন করিয়া উঠিল। নির্ভীক নারীর অটল প্রতিজ্ঞা, তাঁহার অপূর্ব বীরত্ব ও তাঁহার সৈন্যগণের অপরিমেয় সাহসে বিদ্রোহী গোলাম কাদির কিছুক্ষণ অগ্নিবর্ষণ করিয়া যখন বুঝিতে পারিলেন যে, তাঁহার বিজয়লাভের কোনই সম্ভাবনা নাই—বেগম সমরুর সৈন্যদল অপরাজের,

তখন অন্তোপায় হইয়া তিনি পলায়ন করিতে বাধ্য হইলেন।

এই সময় সম্রাট শাহ্ আলম্ অশান্তিতে কাল কাটাইতে-
ছিলেন। রাজধানীর এই বিশৃঙ্খল অবস্থায় সুযোগ পাইয়া
দূরবর্তী স্থানে অবস্থিত জমীদারগণ খাজানা বন্ধ করিলেন—
কেহ কেহ সম্রাটের অধীনতা অস্বীকার করিতেও কুণ্ঠিত
হইলেন না। ইঁহাদিগের মধ্যে নাজফ্ কুলী অগ্রতম। ১৭৮৮
খ্রীষ্টাব্দে সম্রাট শাহ্ আলম্ সসৈন্তে নাজফ্ কুলীকে দমন
করিবার জন্ত অগ্রসর হইলেন। তাঁহার সহিত বেগম
সমরুও সেনাদল লইয়া গমন করিয়াছিলেন। নাজফ্ কুলীর
অধিকারে তখন সুরক্ষিত গোকুলগড় দুর্গ ছিল। সম্রাট-
পক্ষীয় সৈন্তেরা গোকুলগড় অবরোধ করিল। তাঁহারা
লুণ্ঠন, মদ্যপান ও নানাবিধ অত্যাচার করিয়া বেড়াইতে
লাগিল—সৈনিকের কর্তব্য বিস্মৃত হইল। তাঁহাদিগের
কর্তব্য কর্ণে শৈথিল্যের কথা, গুপ্তচরের সাহায্যে নাজফ্
কুলীর নিকট পৌঁছিল। আক্রমণের ইঁহাই উপযুক্ত
অবসর বুঝিয়া, সম্রাটের সৈন্তবর্গ যখন সারা রাত্রি অত্যা-
চারে অতিবাহিত করিয়া সুখ-নিদ্রায় সুযুপ্ত, সেই সময়ে
নাজফ্ কুলী একদল সৈন্তসহ সম্রাট-সৈন্তের উপর পতিত
হইলেন। বহু মোগল সৈন্ত হত হইল ;—যাহারা অবশিষ্ট

রহিল, তাহারা এই অতর্কিত আক্রমণে বিপর্যস্ত হইয়া পলায়নের উদ্যোগ করিল। জীবন-মরণের সন্ধিস্থলে অবস্থিত, কিংকর্তব্যবিমূঢ় সম্রাট শাহ্ আলম্ পরিবার-বর্গ লইয়া অবিলম্বে শিবির ত্যাগ করিবার সঙ্কল্প করিলেন ; কিন্তু তাঁহাকে সে সঙ্কল্প কার্যো পরিণত করিতে হইল না ;—এক মহাশক্তিশালিনী বীরাস্বনা এই সঙ্কট সময়ে দিল্লীর শাহান্‌শাহ্ বাদশাহ্‌র মানসভ্রম রক্ষা করিলেন। এই রমণী আর কেহই নহেন—বেগম সমরু !

সম্রাট যখন ঘোর বিপন্ন,—পলায়ন ভিন্ন যখন তাঁহার গত্যন্তর নাই—যখন শত্রুসৈন্য তাঁহাকে বন্দী করিতে অগ্রসর—সেই সময় বেগম সমরু সম্রাট-বাহিনীর দক্ষিণে সৈন্য অবস্থান করিতেছিলেন। তাঁহার সুশাসনে, বুদ্ধ-কালেই হউক বা অবসর সময়েই হউক, তাঁহার সৈন্যগণ কখনও অসতর্ক অবস্থায় থাকিত না ; তাঁহার কঠোর ব্যবস্থায় অধীন সৈন্যগণ সর্বদা প্রস্তুত থাকিত ; কোন কারণেই কখনও তাহারা সামরিক বিধান উল্লঙ্ঘন করিয়া আমোদ-আহ্লাদে মত্ত থাকিত না ; তাহা-দিগকে অতর্কিত আক্রমণের জন্ত সর্বদা প্রস্তুত থাকিতে হইত।

বেগম সমরু যখন সম্রাটের এই বিপন্ন অবস্থার কথা শ্রবণ করিলেন, তখন তিনি বিহ্বল বা ভীত হইলেন না। এই আসন্ন বিপদে দিল্লীর বাদশাহ্ উপায়ান্তর না দেখিয়া পলায়নের পথ খুঁজিতে লাগিলেন, কিন্তু বীরাজনা তখনই যুদ্ধে অগ্রসর হইবার জ্ঞপ্তি আদেশ প্রচার করিলেন। সম্রাটের জীবন রক্ষা করিতে হইবে—তাঁহার মান-মর্যাদা অক্ষুণ্ণ রাখিতে হইবে ;—তাঁহার জ্ঞপ্তি কোন প্রকার বিপদের সম্মুখীন হওয়াই এই রমণীর নিকট অবিবেচনার কার্য্য বলিয়া বোধ হইল না।

বেগমের সৈন্যদল যুদ্ধের জ্ঞপ্তি প্রস্তুত হইল। বেগম তাঁহার শিবির হইতে দূত প্রেরণ করিয়া সম্রাটকে অবিলম্বে তথায় সপরিবারে আসিবার জ্ঞপ্তি অনুরোধ করিয়া পাঠাইলেন ; শত্রুর উপযুক্ত শাস্তির ভার তিনি যে স্বহস্তে গ্রহণ করিয়াছেন, তাহাও সম্রাটকে জানাইলেন ; এই যুদ্ধে তিনি হয় শত্রুকে পরাজিত করিবেন, আর না হয় সম্মুখ সংগ্রামে পরাজিত হইয়া যুদ্ধক্ষেত্রে জীবন বিসর্জন দিবেন ; সম্রাটের জীবনরক্ষা, তাঁহার উদ্ধারসাধনের জ্ঞপ্তি তিনি প্রাণপাত করিতে অণুমাত্রও কুণ্ঠিতা হইবেন না।

সম্রাটের নিকট সংবাদ পাঠাইবার পর বেগম নাজফ্

কুলীর নিকটও এক পত্র প্রেরণ করিলেন। তাহাতে তিনি অতি কঠোর ভাষায় তাঁহার কার্যের তীব্র প্রতিবাদ ও ভৎসনা করিয়াছিলেন; এবং তাহার যথোচিত শাস্তি-বিধানের জন্ত যে তিনি সমরসজ্জা করিতেছেন, তাহাও জানাইলেন।

বেগম পত্রে যাহা লিখিয়াছিলেন, তাহা কার্যে পরিণত করিতে কালবিলম্ব করিলেন না। সৈন্তগণ সজ্জিত হইল; তিনি তখন তাহাদিগকে যুদ্ধার্থে অগ্রসর হইবার আদেশ দিলেন। সৈন্তগণ সংখ্যায় বেশী ছিল না;—কেবল একশত সিপাহী এবং জর্জ টমাসের অধীনে একটা কামান। এই সামান্য সৈন্ত ও একটা কামান লইয়াই বীরাজনা যুদ্ধ করিতে চলিলেন; তিনি শিবিকারোহণে সৈন্তগণের সঙ্গে সঙ্গে অগ্রসর হইলেন।

তাঁহার সৈন্তেরা যখন শত্রুর সম্মুখীন হইল, তখন বেগম আর শিবিকার মধ্যে থাকিতে পারিলেন না,—থাকা কর্তব্য বলিয়া মনে করিলেন না। স্বয়ং সৈন্ত পরিচালনা না করিলে এই অল্পসংখ্যক সৈন্ত কিছুই করিতে পারিবে না, এই কথা বুঝিতে পারিয়াই তিনি শিবিকা হইতে অবতরণ করিয়া সৈন্তগণের সম্মুখে আসিয়া উপস্থিত হইলেন। সিপাহীরা তাঁহাকে দেখিয়া দ্বিগুণবলে জয়ধ্বনি করিয়া

উঠিল ; তাহারা এই বীরাজনার উৎসাহবাক্যে উত্তেজিত হইয়া নববলদৃপ্ত সিংহের গায় শত্রুপক্ষকে আক্রমণ করিল ; কামান হইতে মুহুমুহু অগ্নিবৃষ্টি হইতে লাগিল ; রণরঙ্গিনী বেগম সমরু তাঁহার পাশ্চাত্য-রণকোশলে সুশিক্ষিত যুষ্টিমের সিপাহীদলের অপূর্ব রণ দেখিতে লাগিলেন ।

নাজফ্ কুলীর সৈন্যগণ এ আক্রমণ প্রতিরোধ করিতে পারিল না । কিছুক্ষণ যুদ্ধের পর যখন তাহারা বুদ্ধিতে পারিল যে, যুদ্ধজয়ের কোনই সম্ভাবনা নাই, তখন তাহারা পলায়ন করিল—গোকুলগড় দুর্গ অধিকৃত হইল ! জয়োল্লাস-মত্ত বেগম-সৈন্য বেগমের ও সম্রাটের জয়ধ্বনি করিতে করিতে শিবিরে প্রত্যাবর্তন করিল ।

সেইদিনই অপরাহ্নকালে সম্রাট্ শাহ্ আলম্ বেগমকে দরবারে আহ্বান করিলেন, এবং তাঁহাকে আসন্ন বিপদের কবল হইতে মুক্ত করিবার জন্য বেগম সমরু যাহা করিয়াছেন, তজ্জন্তু তিনি ওজস্বিনী ভাষায় তাঁহার অসাধারণ বীরত্বের প্রশংসা করিলেন । ইতঃপূর্বে বেগম দিল্লীশ্বরের নিকট হইতে ‘জেব্-উন্নিসা’ (অর্থাৎ রমণী-রত্ন) উপাধি পাইয়াছিলেন ; এক্ষণে সম্রাট্ তাঁহাকে ‘সম্রাটের সর্বাপেক্ষা প্রিয়পুত্রী’ আখ্যা দিয়া সম্মানিত করিলেন । অধিকন্তু বেগমকে সম্মানসূচক পরিচ্ছদ ও

দিল্লীর দক্ষিণে যমুনাতীরস্থ বাদশাহ্‌পুর নামক পরগণা পুরস্কারস্বরূপ প্রদান করিবার আদেশ প্রচারিত হইল। প্রকৃতপক্ষে বলিতে কি, বেগম যেরূপ ঘোর বিপদের সময় সম্রাটকে সহায়তা করিয়াছিলেন, তাহাতে তিনি সম্মান ও উচ্চ পুরস্কারলাভের সম্পূর্ণ যোগ্য—তঁাহার এই সময়োপযোগী সাহায্যের জন্ত কেবল সৈন্যদলের প্রাণরক্ষা হয় নাই,—সম্রাট শাহ্‌ আলম্‌ও এই বিপদ হইতে পরিত্রাণলাভ করিয়াছিলেন ;—তঁাহার সম্মান রক্ষাও হইয়াছিল।

নাজফ্‌ কুলী এই পরাজয়ে আত্মহারা হইয়া পড়িলেন। তিনি দরবারে বেগম সমরুর প্রতিপত্তির কথা বৃত্তিতে পারিয়া সম্রাটের নিকট ক্ষমাভিক্ষার জন্ত বেগমের সহায়তালাভে সচেষ্ট হইলেন। অবশেষে নাজফ্‌ কুলীকে মহানুভব সম্রাট নিজ উদারতা গুণে ক্ষমা করিয়াছিলেন।

এই ঘটনার পর চারি বৎসর আমরা বেগম সমরুর জীবনের কোন ঘটনাই জানিতে পারি না।

চতুর্থ অধ্যায়

বেগম সমরুর জাগীর ; সেনাদল ;

আচার-ব্যবহার

বেগমের প্রধান জাগীর মীরাটের সন্নিকটস্থ সার্দানা ; ইহা দিল্লী হইতে প্রায় ৪০ মাইল দূরে অবস্থিত । নিম্ন-লিখিত পরগণাগুলি বেগমের জাগীরভুক্ত ছিল ;— সার্দানা, বরাউট, বরনাওয়া, কোটানা, বুধানা বা বুরহানা, জেওয়ার, তাপ্পাল, ধানকাউর এবং ছয়াবস্থ পাহাস্ত ; যমুনার পশ্চিমে বাদশাহপুর, হান্দি এবং রানিয়া । এই সকল স্থানে প্রচুর পরিমাণে শস্য উৎপন্ন হইত । তাঁহার জাগীরের মধ্যে বরাউট, দিনাউলি, বরনাওয়া, সার্দানা, জেওয়ার এবং ধানকাউর সমৃদ্ধিশালী শহর । কেবলমাত্র মীরাট জেলার পরগণাগুলি হইতে, ১৮১৪ হইতে ১৮৩৪ খ্রীষ্টাব্দ পর্য্যন্ত, সেম সমেত, আনুমানিক বার্ষিক ৫৮৬৬৫০ টাকা করিয়া তাঁহার খাজানা প্রাপ্য ছিল ; কিন্তু গড়ে ৫৬৭২১১ টাকার অধিক আদায় হইত না ; প্রায় ১২৪৩৯

টাকা অনাদায়ী থাকিত। প্লাউডেন্ (T. C. Plowden) সাহেব ১৮৪০ খ্রীষ্টাব্দে *Settlement Report* এ বেগম সমরুর শাসনকার্য-পারদর্শিতার ভূয়সী প্রশংসা করিয়াছেন।

টমাস্ লিখিয়াছেন, বেগমের পাঁচদল সেনা, ২৪টী কামান ও ১৫০ জন অশ্বারোহী ছিল; প্রত্যেক দলে প্রায় ৬০০ করিয়া সৈন্য থাকিত। উত্তরকালে বেগমের সেনাদল সংখ্যায় আরও বেশী হইয়াছিল। তাঁহার কয়েকদল সৈন্য সম্রাটের সাহায্যার্থ সর্বদাই দিল্লীতে অবস্থান করিত। এতদ্ভিন্ন বেগমের প্রাসাদের সন্নিকটেই একটা দুর্গমধ্যে সুসজ্জিত অস্ত্রাগার ও কামান ঢালাই করিবার কারখানা ছিল। বিচার ও শাসনবিভাগের ব্যয় ও নিজব্যয় প্রভৃতির জন্য বেগমের সর্বসমেত বাম্বিক ছয় লক্ষ টাকা ব্যয় হইত; সর্দানার জাগীরের আয় হইতে এই ব্যয় নির্বাহ হইত।

বেগমের সেনাদলে যে সমস্ত ইউরোপীয় কর্মচারী ছিলেন, তন্মধ্যে জর্জ টমাস্, পলি, বাওরস্, ইভান্স্, ডুডেনেক্, লিগোইস্, লেভামুল্, সালুর, রবার্ট স্কিনার, জন্ টমাস্ প্রভৃতির নাম সবিশেষ উল্লেখযোগ্য।

সর্দানার এক সুবিস্তৃত ভূমিখণ্ডের উপর বেগম সমরুর প্রাসাদ অবস্থিত। তাঁহার বাসস্থান কতকটা দেশীয় ও

ইউরোপীয় ভাবের সংমিশ্রণে সুন্দরভাবে সজ্জিত। বেগম অনেক সময় সার্থানায় অবস্থিতি করিতেন ; মধ্যে মধ্যে জলালপুর, মীরট, কিরওয়া এবং দিল্লীতে গমন করিতেন ; —এই সকল স্থানে তাঁহার প্রাসাদ ছিল।

প্রথমে বেগম যখন স্বয়ং যুদ্ধে গমন করিতেন, তখন তিনি শিবিকার ভিতর থাকিয়া, সৈন্যদের আদেশ ও উৎসাহ দান করিতেন। বিল্ সাহেব লিখিয়াছেন,—
 “Colonel Skinner had often, during his service with the Mahrattas, seen her, then a beautiful young woman, leading on her troops to the attack in person, and displaying in the midst of carnage, the greatest intrepidity and presence of mind.” বিনা অবগুণ্ঠনে তিনি বড় একটা প্রকাশে বাহির হইতেন না। তিনি খ্রীষ্ট-ধর্ম্মাবলম্বিনী হইলেও, জাতীয় সংস্কার, জাতীয় বেশভূষা এবং দেশীয় আচার-ব্যবহারের পক্ষপাতিনী ছিলেন।

বেগম সমরু দেখিতে পরমাসুন্দরী ছিলেন। তিনি মূল্যবান্ হিন্দুস্থানী পরিচ্ছদ পরিধান করিতেন। ফার্সী ও হিন্দুস্থানী ভাষায় তাঁহার বিশেষ ব্যুৎপত্তি ছিল। স্বীয় প্রাসাদে তিনি পর্দানশীন্ জ্বীলোকের গায়, চিকের অন্তরালে

থাকিয়া সমস্ত রাজকার্য্য নির্বাহ করিতেন এবং তাঁহার কর্মচারী বা অপরাপর ব্যক্তির আবেদন^৪ শুনিতেন ; কিন্তু তিনি উচ্চপদাধিষ্ঠিত ইউরোপীয় সেনানায়কগণের সহিত অনবগুষ্ঠিতা হইয়া, প্রায়ই একত্র আহার করিতেন । ৩০-৩৫ জন পরিচারিকা নানাবিধ খাণ্ডদ্রব্য টেবিলের উপর সাজাইয়া দিত এবং খাণ্ডাদি পরিবেশন করিত ; ইহাদের অধিকাংশই খ্রীষ্টধর্মাবলম্বিনী ছিল ।

বৃদ্ধ বয়সে বেগম সমরু এই প্রথার একটু ব্যতিক্রম করিয়াছিলেন । ১৮০৪ খ্রীষ্টাব্দে ইংরেজের সহিত সখ্যতা-স্থাপনের পর তিনি কতক পরিমাণে পাশ্চাত্য আচার-বাবহার ও আদব-কায়দা অবলম্বন করিয়াছিলেন । তিনি অশ্বারোহণে, গজপৃষ্ঠে বা শিবিকায়, উষ্ণীষ-মস্তকে, সাধারণের সম্মুখে বাহির হইতেন এবং বড়লাট, প্রধান সেনাপতি-প্রমুখ উচ্চপদবিশিষ্ট ইংরেজ রাজপুরুষকে নিমন্ত্রণ করিয়া তাঁহাদের সহিত একত্র বসিয়া আহার করিতেন ;—আবার তাঁহাদের নিমন্ত্রণেও উপস্থিত হইতেন । উচ্চপদস্থ ইংরেজ সৈনিক ও রাজকর্মচারীরা তাঁহার রাজ্য-মধ্যে উপস্থিত হইলে তাঁহাদিগের বেগমের আতিথ্য গ্রহণ করিতে হইত ।

একজন স্বাধীন সম্রাজ্ঞীর হায়ে বেগম সমরু তাঁহার

ক্ষমতা ও প্রতিপত্তি অক্ষুণ্ণ রাখিয়াছিলেন। প্রতিদিন সন্ধ্যার সময় একটী সান্ধ্যভোজনের বৈঠক বসিত; ইহাতে সাধারণতঃ বেগম সমরু, তাঁহার উত্তরাধিকারীর জনক কর্নেল ডাইস, মেজর রেঘোলিনী ও রেভারেণ্ড স্কটী উপস্থিত থাকিতেন। গীতবাণী চলিত—সঙ্গে সঙ্গে রসনাতৃপ্তিকর সুপেয় মদ্য বিতরিত হইত।

পঞ্চম অধ্যায়



টমাসের কর্মভাগ ; বেগমের দ্বিতীয় বিবাহ ; বিদ্রোহ ;

বেগমের পলায়ন ; লেভাসুল্তের আত্মহত্যা

সমরুর মৃত্যুর পর যাঁহারা বেগমের অধীনে কর্মগ্রহণ করেন, তন্মধ্যে দুইজনের নাম সবিশেষ উল্লেখযোগ্য। একজন বিখ্যাত জর্জ টমাস্ ; ইঁহার পরিচয় ইতঃপূর্বেই প্রদত্ত হইয়াছে। অপরব্যক্তি লেভাসুল্ত্ ; ইনি সম্রাস্ত-বংশীয় ফরাসী, সুশিক্ষিত ও সুপুরুষ। দুইজনেই প্রতিভাশালী। অল্পদিন মধ্যেই টমাস্ ও লেভাসুল্ত্ বেগমের অধিক অনুগ্রহলাভের জন্ত প্রতিদ্বন্দ্বী হইয়া উঠিলেন। টমাসের কার্যাবলী লেভাসুল্তের মনঃপূত হইত না—প্রতিপদেই তিনি টমাস্কে অপদস্থ করিবার জন্ত শ্রেনদৃষ্টিতে তাঁহার কার্য পর্যবেক্ষণ করিতেন। টমাস্ ও লেভাসুল্তের ক্রটি অনুসন্ধান করিয়া ফিরিতেন। টমাস্ বেগমের নিকট লেভাসুল্তের অপরিণামদশিতা, কার্যে অমনোযোগিতা ও শৈথিল্যবিষয়ের নিদর্শন উল্লেখ করিলেও, বেগম সে

কথায় কর্ণপাত না করিয়া লেভাসুলতের প্রতিই অধিকতর পক্ষপাতিত্ব দেখাইতেন। দিন দিন টমাস্ ও লেভাসুলতের মধ্যে শক্রতা প্রবল হইয়া উঠিতে লাগিল। ফলে টমাস্ এই প্রতিদ্বন্দ্বিতায় অকৃতকার্য হইয়া, ১৭৯২ খ্রীষ্টাব্দে বেগমের কৰ্ম্ম ত্যাগ করিয়া গেলেন। বেগম তাঁহাকে কৰ্ম্মত্যাগ-পত্র প্রত্যাহার করিবার জন্য অনুরোধ পর্য্যন্তও করিলেন না। কুইন্ সাহেবের বিশ্বাস, টমাস্ বেগমের পাণিপ্রার্থী ছিলেন এবং ব্যর্থমনোরথ হইয়া তাঁহার কার্য ত্যাগ করেন।

লেভাসুলত্ অন্তদিনের মধ্যেই বুঝিতে পারিলেন যে, বেগম তাঁহার প্রণয়প্রার্থিনী। কোশলী ফরাসী বুঝিতে পারিয়াছিলেন, বেগম আর স্ববশে নাই—প্রণয়-দেবতার স্মৃতিস্কু বাণবিদ্ধ হইয়া জর্জরিত। তাই তিনি এক শুভক্ষণে আপনার হৃদয় বেগম-চরণে সমর্পণ করিবার প্রস্তাব করিলেন। বেগমের প্রাণ যাহা চাহিতেছিল—আভিজাত্য ও সম্মান যাহা ভাষায় ব্যক্ত করিতে পারিতেছিল না—সেই অভিলষিত প্রস্তাব লেভাসুলতের মুখ হইতে বহির্গত হইবামাত্র তিনি প্রভু-ভৃত্য সম্পর্ক ভুলিয়া গেলেন—ভুলিয়া গেলেন আপনার আভিজাত্য—আত্মধারা হইয়া প্রেমাক্ষ বর্ষণ করিতে করিতে প্রণয়ের প্রথম চুম্বন তাঁহার

গণ্ডদেশে মুদ্রিত করিয়া দিলেন। হৃদয়-বিনিময়ই যদি প্রকৃত বিবাহের লক্ষণ হয়, তবে সেই মুহূর্ত্তেই তাঁহাদের বিবাহ হইয়া গেল—সাক্ষ্য রহিল উপরে নীলাকাশ—আর সর্বত্রগামী বাতাস। পরে ১৭৯৩ খ্রীষ্টাব্দে ধর্ম্মবাজক গ্রেগোরিও কর্তৃক রোমান্ ক্যাথলিক্ মতে বেগম ও লেভাসুল্ত্ গোপনে বিবাহিত হইলেন; কিন্তু সাধারণে এই বিবাহের বিন্দু বিমর্গও জানিতে পারিল না। কেবল জানিল, বেগমের দুইজন ফরাসী কর্ম্মচারী—বার্নিয়ার ও সালুর। কিন্তু এই বিবাহ, বিশেষতঃ গুপ্ত-বিবাহ, বেগম সমরুর পক্ষে যে অত্যন্ত অবিবেচনার কার্য্য হইয়াছিল, তাহা পরবর্ত্তী ঘটনা হইতে স্পষ্ট প্রতিপন্ন হইবে।

লেভাসুল্ত্ নানা সদ্গুণের অধিকারী হইলেও উদ্ধত-প্রকৃতির লোক ছিলেন। বেগমের অপরাপর সেনানাযক তাঁহার মত সুশিক্ষিত ছিল না। পদগৌরবে-গর্বিত লেভাসুল্ত্ এক্ষণে আদেশ করিলেন, ইউরোপীয় সেনানাযকের আর পূর্ব্ববৎ বেগমের সহিত আহার করিতে পাইবে না। বেগম সমরু লেভাসুল্ত্কে এক্রপ আদেশ প্রত্যাহার করিতে অনুরোধ করিলেন; বুঝাইলেন, এই সকল দুর্দ্ধর্ষ মূর্খ ইউরোপীয় সৈনিকের মধো এই উপলক্ষে অসন্তোষের বীজ বপন করা কোনমতেই উচিত নহে;



दिल्लीश्वर शाह् आलम्

[पृष्ठा ७२]

তাহাদের বাহুবলের উপর রাজ্যের শুভাশুভ গুস্ত রহিয়াছে ; সামান্য একটু ভদ্রতা প্রদর্শন করিলে—তাহাদের সহিত একত্র পানভোজন করিয়া আত্মীয়তা বন্ধিত করিলে, তাহাদের আনুগত্য ও শ্রদ্ধায় রাজ্যের মঙ্গল হইবে ; তাহাদের প্রতি অবজ্ঞাপ্রকাশ করিলে তাহারা অসন্তুষ্ট হইয়া হয় ত অনেক অনর্থ সংঘটিত করিতে পারে । লেভানুল্ৎ বেগমের এই যুক্তির সারবত্তা হৃদয়ঙ্গম করিতে পারিলেন না ; তিনি কিছুতেই এই সমস্ত লোকের সহিত একত্র আহারে সম্মত হইলেন না ; তাঁহারই জিদ বজায় রহিল ।

বেগম যে ভবিষ্যৎ অনর্থের আশঙ্কা করিয়াছিলেন, লেভানুল্ৎের এই আচরণে তাঁহার সেনানায়কগণের মধ্যে সেই অসন্তোষ-বহি প্রজ্বলিত হইল ; তাহারা এই আচরণে অপমান বোধ করিল । আর এক কথা, বেগমের সহিত লেভানুল্ৎের বিবাহের কথা অবগত না থাকায়, তাহারা নূতন সেনাপতিকে বেগমের অবৈধ প্রণয়ী ভাবিয়া আরও বিরক্ত ও বীতশ্রদ্ধ হইল, এবং এই অপমানের প্রতিশোধ গ্রহণ করিবার সুযোগ অব্বেষণ করিতে লাগিল । ক্রমে তাহারা—সঙ্গে সঙ্গে তাহাদের অধীন সৈন্যবর্গও—ঔদ্ধত্য ও অবাধ্যতার পরিচয় দিতে লাগিল । চারিদিকে গুপ্ত

ষড়্‌যন্ত্রের কথাও বেগমের অবিদিত রহিল না ; তিনি বেশ বুঝিতে পারিলেন, লেভাসুলতের কার্যের জন্য তাঁহাকে বিষম বিপদে পড়িতে হইবে । ভবিষ্যতের যবনিকা উত্তোলন করিয়া তিনি দেখিতে পাইলেন, বিপদ তাঁহাকে আক্রমণ করিবার জন্য অগ্রসর ।

সৈন্তগণের আচরণ, ক্রমেই বশুতার সীমা অতিক্রম করিতে লাগিল ; তাহাদের ঔদ্ধত্য বেগমের পক্ষে অসহনীয় হইয়া উঠিল । তিনি নিজের ধন-মান-সম্পদ, এমন কি জীবন পর্য্যন্ত, বিপন্ন বোধ করিতে লাগিলেন ; তিনি বুঝিতে পারিলেন, এ প্রকার শত্রুবেষ্টিত হইয়া অবস্থান করা কিছুতেই নিরাপদ নহে । তখন আর তাঁহার পূর্বের মত তেজ ছিল না ; বিশেষতঃ তাহাদের বাহুবলের উপর নির্ভর করিয়া তিনি তেজস্বিনী হইয়াছিলেন, তাহারাই যখন তাঁহার বিরুদ্ধে দণ্ডায়মান হইল, তখন তিনি নিজের প্রাণ-রক্ষার জন্য সার্থানার আধিপত্য ত্যাগ ব্যতীত উপায়ান্তর দেখিলেন না । দুর্কিনীত বিদ্রোহী সৈন্তগণ যে-কোন মুহূর্ত্তেই তাঁহার রাজভবন আক্রমণ করিয়া সমস্ত ধনরত্ন লুণ্ঠন করিতে পারে ; তাঁহাকে অবমানিত করিতে পারে ; —এমন কি তাঁহার জীবন পর্য্যন্তও বিপন্ন হইতে পারে । এমন অসহায় অবস্থায় কি মানুষ বাস করিতে পারে ?

লেভাসুলত্ও এই সঙ্কট সময়ে পলায়ন ব্যতীত অন্য কোন সড়পায়ই উদ্ভাবন করিতে পারিলেন না। তিনি একাকী কি বা করিতে পারেন? বেগম স্বামী লেভাসুলতের সহিত স্বীয় ধনরাজি লইয়া ইংরেজের আশ্রয়-গ্রহণের সঙ্কল্প করিলেন। লেভাসুলত বেগমের সঙ্কল্পের কথা ইংরেজ-পক্ষীয় কর্নেল ম্যাক্গাউয়ানকে (Col. McGowan) জানাইলেন। ম্যাক্গাউয়ান এই সময়ে (১৭৯৫ খ্রীষ্টাব্দে) গঙ্গাতীরবর্তী অনুপশহরের সেনানিবাসের ভারপ্রাপ্তকর্মচারী। লেভাসুলত তাঁহার নিকট প্রস্তাব করিলেন যে, কর্নেল তাঁহাদিগকে প্রথমে তাঁহার সেনানিবাসে আশ্রয় দান করিবেন, এবং তথা হইতে তাঁহাদের ফরাক্কাবাদ-গমনের ব্যবস্থা করিয়া দিবেন; এই স্থানে তাঁহারা নিশ্চিন্ত হইয়া বাস করিবার অভিপ্রায় করিয়াছেন। কর্নেল কিন্তু এই প্রস্তাবে সম্মত হইলেন না; তাঁহার মনে হইল, সম্রাটের একজন কর্মচারীর পলায়নে সহায়তা করিয়া পরে হয় ত তিনি দোষী হইতে পারেন। এক্ষণে ব্যর্থমনোরথ হইয়া লেভাসুলত ভারতের তৎকালীন গভর্নর-জেনারেল সার জন্ শোরকে পত্র লিখিলেন (১৭৯৫ এপ্রিল)। শোর আবার সিন্ধিয়ার দরবারে বেগম ও তাঁহার স্বামীর জন্ত অনুরোধ করিতে ইংরেজ-দূত মেজর পামারকে আদেশ করিলেন।

পূর্বেই, বলিয়াছি মাধোজী সিন্ধিয়া তখন দিল্লীশরের
 প্রতিনিধি—তিনিই তখন সর্বসর্বা। বেগম দিল্লীশরের
 সৈন্ত-সাহায্যার্থ-প্রদত্ত জাগীর ভোগ করিতেছিলেন ;
 সুতরাং স্থানত্যাগের জন্ত সিন্ধিয়ার অনুমতি লওয়া
 তাঁহার প্রয়োজন। বেগমের সৈন্তচালনারূপ দুকুহ কার্য
 হইতে অব্যাহতি-প্রদানের বিনিময়ে সিন্ধিয়া তাঁহার নিকট
 হইতে ১২ লক্ষ টাকা চাহিয়া বসিলেন। বেগম এ
 প্রস্তাবে সম্মত হইলেন না। তিনি টাকা দিতে যাইবেন
 কেন ? তাঁহারই যে সিন্ধিয়ার নিকট হইতে টাকা
 পাইবার কথা। তিনি সিন্ধিয়ার হস্তে সৈন্তচালনার
 ভার গ্রহণ করিতেছেন, এবং তিনি ও তাঁহার পূর্বস্বামী
 সমরু সৈন্তগণের ব্যবহারার্থ সামরিক অস্ত্রশস্ত্রের জন্ত বহু
 অর্থ ব্যয় করিয়াছেন ; এক্ষণে তিনি যখন সে সমস্তই
 সিন্ধিয়ার হস্তে সমর্পণ করিতে যাইতেছেন, তখন তিনিই
 টাকা পাইবেন ; তিনি সিন্ধিয়ার নিকট দাবী করিলেন।
 অবশেষে স্থির হইল, তিনি সিন্ধিয়ার একজন কর্মচারীর
 হস্তে সেনাদলের ভার অর্পণ করিয়া স্বামীর সহিত
 গোপনে জাগীর ত্যাগ করিবেন ; সিন্ধিয়ার এই কর্মচারী
 বেগমের সপত্নীপুত্রকে আমরণকাল মাসিক দুই হাজার
 টাকা বৃত্তি দিবেন ; লেভাসুল্‌ত ইংরেজ-সীমানার বাস

করিতে পারিবেন, তবে তিনি ইংরেজের বন্দীরূপে পরিগণিত হইবেন এবং সস্ত্রীক ফরাসী চন্দননগরে বাস করিতে পাইবেন।

এদিকে বেগমের যে সৈন্যদল দিল্লীতে অবস্থান করিতেছিল, তাহারা কোন সূত্রে এই গুপ্ত সংবাদ অবগত হইল ; তাহারা সমরুর পুত্র জাফর-ইয়াবুকে তাহার পৈতৃক জাগীর উদ্ধারার্থ আহ্বান করিল এবং তাহাকেই মসনদে বসাইতে কৃতসঙ্কল্প হইল। বিদ্রোহী সৈন্যদল, বেগম ও তাঁহার স্বামীকে ধরিবার জন্য অবিলম্বে দিল্লী ত্যাগ করিয়া সর্ধানা অভিমুখে অগ্রসর হইতে লাগিল।

লেভাসুল্‌ত্‌ বিদ্রোহীদের অভিযানের কথা পূর্বাঙ্কেই জানিতে পারিয়াছিলেন। তিনি কালবিলম্ব না করিয়া, একদিন মধ্যরাত্রে ঘোর অন্ধকারের মধ্যে পত্নীকে লইয়া অনুপশহর অভিমুখে যাত্রা করিলেন। অশ্বারোহী স্বামীর হস্তে পিস্তল এবং পার্শ্বে শাণিত কুপাণ ঝুলিতেছে ; বেগমের হস্তে শাণিত ছোরা। পথিমধ্যে লেভাসুল্‌ত্‌ বেগমকে জানাইলেন যে, দুর্বৃত্তদের হস্তে পতিত হইয়া অত্যাচার ও অপমান ভোগ করা অপেক্ষা, তাঁহারা ধৃত হইবার পূর্বেই আত্মহত্যা করিবেন। বেগমও এই প্রস্তাবে সন্মতি প্রকাশ করিলেন। তিনি বেশ বুঝিতে পারিলেন

যে, শত্রুহস্তে নিপতিত হইলে তাঁহাকে বিশেষ নির্যাতন ও অপমান ভোগ করিতে হইবে। ষড়্‌যন্ত্রকারীরা তাঁহাকে স্বীয় কবলে প্রাপ্ত হইয়া সহজে ছাড়িবে না, যথোচিত প্রতিশোধ গ্রহণ করিবে, এ দৃশ্য তিনি স্পষ্ট দেখিতে পাইলেন। এ অপমান সহ করিয়াও জীবনধারণ অগ্র মহিলা করিতে পারেন—বেগম সমরু পারেন না। প্রাণ অপেক্ষাও মানের মূল্য তাঁহার নিকট অনেক অধিক ছিল। তাহা না হইলে তিনি মান বাঁচাইবার জন্ত এত ধন-সম্পত্তি, এমন রাজ্য ত্যাগ করিয়া গোপনে পলায়ন করিবেন কেন? তাঁহার যদি অগ্র কোন উপায় থাকিত, তাহা হইলে তিনি পলায়নে সন্মত হইতেন না; কিন্তু এখন এই অসহায় অবস্থায় মান বাঁচাইবার জন্ত—প্রাণ বাঁচাইবার জন্ত নহে,—তিনি পলায়ন করিতেছিলেন। সেই মান যখন বাঁচিবার সম্ভাবনা রহিল না—তখন প্রাণত্যাগ করাই তিনি স্থির করিলেন।

লেভাসুলত্ অশ্বারোহণে বেগমের শিবিকার পাশে পাশে চলিয়াছেন। সঙ্গে কয়েকজন বিশ্বস্ত পরিচারিকা ও আবশ্যিক দ্রব্যাদি। তাঁহারা যখন সার্থনা হইতে তিন মাইল দূরে কারি পর্য্যন্ত অগ্রসর হইয়াছেন, তখন তাঁহারা বিদ্রোহীদের অশ্বপদশব্দ শুনিতে পাইলেন। লেভাসুলত্

বেগমকে পুনরায় জিজ্ঞাসা করিলেন, এখনও তাঁহার পূর্ব-সঙ্কল্প স্থির আছে কি না। বেগম দক্ষিণ হস্তে ধৃত ছুরিকা দেখাইলেন—বলিলেন, তিনি মৃত্যুর জন্ত প্রস্তুত হইয়া বসিয়া আছেন। লেভাসুলত্‌ বিনা বাক্যব্যয়ে পকেট হইতে পিস্তল বাহির করিয়া পালকীর বেহারাদিগকে দ্রুতগতি অগ্রসর হইতে বলিলেন। এই সময়ে ইচ্ছা করিলে লেভাসুলত্‌ অশ্ব ছুটাইয়া আত্মপ্রাণ রক্ষা করিতে পারিতেন, কিন্তু তিনি পত্নীর পার্শ্ব ত্যাগ করিলেন না।

বিদ্রোহীর দল প্রবল বাত্যার ঞ্চায় তাঁহাদের অতি নিকটেই আসিয়া পড়িল। এই সময়ে বেগমের পরিচারিকা-গণ উচ্চৈঃস্বরে ক্রন্দন করিয়া উঠিল। লেভাসুলত্‌ দেখিলেন, বেগম আত্মহত্যা করিয়াছেন—তাঁহার বক্ষের বসন রক্তাক্ত—তিনি সংজ্ঞাহীন। বেগম আত্মহত্যা করিবার জন্ত বক্ষে অস্ত্রাঘাত করিয়াছিলেন সত্য, কিন্তু ছুরিকা বক্ষে আমূল বিদ্ধ হয় নাই—একখানি অস্থিতে প্রতিহত হইয়াছিল। পত্নী আত্মহত্যা করিয়াছে শুনিয়া, উন্মত্তপ্রায় লেভাসুলত্‌ সবলে মুখের মধ্যে পিস্তল ছুঁড়িলেন—গুলি ব্রহ্মরক্ষু ভেদ করিয়া গেল; তাঁহার দেহ অশ্বপৃষ্ঠ হইতে ভূপতিত হইল।

প্রকৃত প্রেমিকের এই শোচনীয় পরিণাম দেখিয়া

বাস্তবিকই নয়ন বহিয়া অশ্রু বহিতে থাকে । লেভাসুল্তের
 অবিম্ব্যকারিতার জন্ম তাঁহার এই শোচনীয় পরিণাম
 হইয়াছিল সত্য, কিন্তু বেগমের প্রতি তাঁহার যে অকৃত্রিম
 প্রগাঢ় ভালবাসা ছিল, সে বিষয়ে সন্দেহ করিবার কোন
 কারণ নাই । প্রকৃত প্রণয়ী ছিলেন বলিয়াই তিনি প্রণয়-
 দেবতার চরণে আপনার বহুমূল্য জীবন উৎসর্গ করিতে
 পারিয়াছিলেন ; নশ্বর-জগতে অবিনশ্বর প্রেমের বিজয়-
 কেতন উড়াইয়া গিয়াছেন—দেখাইয়া গিয়াছেন, বেগমের
 সহিত তাঁহার কেবলমাত্র দেহের সম্বন্ধ ছিল না—রূপের
 লালসার বা অর্থের মোহিনী শক্তির বলে বেগমের দিকে
 তিনি আকৃষ্ট হ'ন নাই—প্রাণের টানে তিনি ছুটিয়া-
 ছিলেন ।

ষষ্ঠ অধ্যায়

বেগম সমরুর সিংহাসনে পুনঃপ্রতিষ্ঠা ;

জাফর-ইয়াবের পরিণাম

টমাস সত্যই লিখিয়াছেন,—“যে সমস্ত ছুরাচার কাল লেভাসুল্তের দাস ছিল, আজ তাহারা তাঁহার মৃতদেহের যৎপরোনাস্তি অবমাননা করিতে কুণ্ঠিত হইল না।” লেভাসুল্তের শব-দেহ পশুপক্ষীর খাণ্ড হইল—শরীরের কতক অংশ পয়ঃপ্রণালীতে নিক্ষিপ্ত হইল। বেগম সমরু সাত দিন অনশন-অর্দ্ধাশনে একটা কামানের সহিত বদ্ধ হইয়া রহিলেন। তাঁহার অপমানের ও নির্যাতনের অন্ত রহিল না। বিদ্রোহীদের বহু দুর্ভাক্যও তাঁহাকে স্বকর্ণে শুনিতে হইল। তাঁহার কোন বিশ্বস্ত পরিচারিকা গোপনে মধ্যে মধ্যে কিছু আহাৰ্য্য বা পানীয় যদি না দিত, তাহা হইলে বোধ হয় বেগমের অনাহারেই মৃত্যু হইত। এত কষ্টেও তাঁহার প্রাণ বাহির হইল না ; যে নিদারুণ অপমানের ভয়ে তিনি জীবন-বিসর্জন দিতে গিয়াছিলেন—স্বহস্তে নিজবক্ষে ছুরিকাঘাত করিয়াছিলেন,—এত নির্যাতনেও সে প্রাণ-বায়ু

অনন্তে মিশাইল না। ইহার কারণ কি? কোথা হইতে তিনি এত কষ্ট সহ্য করিবার শক্তি লাভ করিলেন? বেগমের ভবিষ্যৎ জীবনের ইতিহাসই এই প্রশ্নের সচ্ছত্র প্রদান করিবে। ভগবান্ তাঁহাকে দরিদ্রের দুঃখ-মোচনের জন্ত, অসহায়ের আশ্রয়দানের জন্ত, এই পৃথিবীতে প্রেরণ করিয়াছিলেন; ভারতে অবিনশ্বর কীর্তি রাখিবার জন্ত তিনি আসিয়াছিলেন; এই মহৎ কার্যে উপযুক্ত করিবার অভিপ্রায়েই তাঁহার গায় মহীয়সী মুহিলা,—তাঁহার গায় ধন-জন-ঐশ্বর্য্য-বেষ্টিতা রমণীকে ভগবান্ এমন দুর্দশায় ফেলিয়াছিলেন। তাহারই জন্ত এত কষ্টে, এত নির্ধাতনে, এত অপমানেও তাঁহার প্রাণ বাহির হয় নাই। প্রতিদিন তাঁহার দ্বারে শত শত নিরন্ন ব্যক্তি অন্নপানে পরিতৃপ্ত হইয়াছে, সেই মহিলা অনশন-অর্দ্ধাশনে কামানের তলদেশে আবদ্ধ হইয়া সপ্তাহাধিক কাল ক্ষেপণ করিলেন; দয়া-পরবশ হইয়া তাঁহার দাসীরা গোপনে কখন কখন তাঁহাকে সামান্য দুই একখানি রুটি প্রদান করিয়া, তাঁহার জঠর-জ্বালা নিবারণ করিত। অদৃষ্টের কি ভীষণ পরিহাস! ধন-জন-সম্পদের অকিঞ্চিৎকরত্বের কি প্রকৃষ্ট প্রমাণ!

এদিকে বিদ্রোহীরা বেগমের সপত্নীপুত্রকে সিংহাসনে উপবেশন করাইল।

এই দুর্দশাগ্রস্ত অবস্থায় কয়েক দিন অতিবাহিত হইবার পর বেগম গোপনে টমাস্কে সংবাদ পাঠাইবার সুযোগ পাইলেন। তিনি টমাস্কে জানাইলেন যে, নিশ্চয়ই বিদ্রোহীরা তাঁহাকে বিষপ্রয়োগে বা অগ্ন্যপ্রকারে হত্যা করিবে ; এক্ষণে তিনিই তাঁহার একমাত্র ভরসাস্থল ; এই দুর্দিনে তিনি টমাসের সাহায্য ভিক্ষা করিয়া বহু অনুনয়-বিনয় করিলেন।

জর্জ টমাস্ ইদানীন্তন বেগম সমরুর ঘোর শত্রু হইয়া উঠিয়াছিলেন ; তাঁহার বিরুদ্ধে দিল্লীর সৈন্যগণকে বিদ্রোহ করিতে তিনিই উত্তেজিত করিয়াছিলেন ; কিন্তু বেগমের প্রতি এই অমানুষিক অত্যাচারের কথা তিনি জানিতেন না। টমাস্ বেগমের এই দুর্দশার জন্ম পরোক্ষভাবে আপনাকেই অনেকটা দায়ী মনে করিয়া মর্মান্বিত হইলেন। এই বেগম সমরুর অন্তরেই না কিছুদিন তাঁহার দেহ পুষ্ট হইয়াছিল ? উদারহৃদয় টমাস্ বেগমের পূর্ব-শত্রুতা বিস্মৃত হইলেন। তাঁহার বর্তমান দুর্বস্থা এবং জীবন-নাশের সম্ভাবনার কথা শুনিয়া তিনি আর স্থির থাকিতে পারিলেন না ;—তৎক্ষণাৎ বেগমের উদ্ধারকল্পে কৃতসঙ্কল্প হইলেন ; তিনি সসৈন্তে সার্থানা অভিযুখে যাত্রা করিলেন।

টমাস্ বিদ্রোহীদের বুঝাইলেন যে, তাহারা অবিলম্বে যদি

বেগমের অকস্মাৎ সপত্নীপুত্রকে ত্যাগ করিয়া বেগমকে পুন-
রায় মসনদে প্রতিষ্ঠিত না করে, তাহা হইলে সার্দানার
জাগীর আর রক্ষা হইবে না। তিনি আরও বুঝাইলেন,—
“তোমরা যেভাবে বেগমকে কষ্ট দিতেছ, তাহাতে যদি তিনি
শারীরিক বা মানসিক যন্ত্রণায় প্রাণত্যাগ করেন, তাহা
হইলে সম্রাটের প্রধান মন্ত্রী তোমাদের ভরণপোষণের জন্ত
প্রদত্ত সার্দানার জাগীর বাজেয়াপ্ত করিবেন—সঙ্গে সঙ্গে
তোমরাও কস্ম হইতে বিচ্যুত হইবে।”

পূর্বেই বলিয়াছি বেগমের গুপ্তবিবাহের সময় দুইজন
সাক্ষী ছিল; তন্মধ্যে সালুর অন্যতম। তিনি বেগমের
বিরুদ্ধে বিদ্রোহে যোগদান করেন নাই। এক্ষণে তিনিও
টমাসের গুণ বিদ্রোহী সেনানায়কদিগকে কর্তব্যপথে
ফিরাইয়া আনিবার চেষ্টা করিতে লাগিলেন। উভয়ের
সমবেত চেষ্টায় বিদ্রোহীদের চৈতন্যোদয় হইল—তাহারা
এখন আপনাদের ভ্রম বুঝিতে পারিল। বেগম সমরুর ঘোর
নির্ঘাতন শেষ হইল—তঁাহার হৃৎথের অমানিশা কাটিয়া
গেল—তিনি পুনরায় সার্দানার মসনদে বসিলেন। আবার
তঁাহার পাত্র-মিত্র-সভাসদ আসিয়া জুটিল, আবার তঁাহার
নাম ভক্তিভরে উচ্চারিত হইতে লাগিল—বিদ্রোহী সৈন্যদল
তঁাহার বশতা স্বীকার করিল;—ভাগ্য পরিবর্তিত হইল—

জীবন-নাট্যের একটি বিষাদময় অঙ্কের অভিনয় শেষ হইয়া গেল—গোরবোজ্জল আর এক অঙ্কের অভিনয় আরম্ভ হইল।

বেগমের প্রভুত্ব স্বীকার করিয়া প্রায় ৩০ জন ইউরোপীয় সৈনিক কর্মচারী “ঈশ্বর ও যিশু খ্রীষ্টের” নামে শপথ করিয়া এখন হইতে সর্বপ্রযত্নে প্রাণপণে বেগমের আদেশ মান্ত করিবে এবং অন্য কাহারও অধিনায়কত্ব স্বীকার করিবে না, এই মর্মে এক অঙ্গীকার-পত্র স্বাক্ষর করিল। একমাত্র সালুরই নিজের নাম স্বাক্ষর করিতে পারিতেন; আর সকলেই নিরক্ষর ছিল; কাজেই তিনি ব্যতীত আর সকলেই বকলমে নাম দস্তখত করিল। সিন্ধিয়ার পক্ষ হইতে যে কর্মচারী বেগমের সেনাদল ও জাগীরের ভার লইতে আসিয়াছিলেন, তিনি ক্ষতিপূরণস্বরূপ দেড় লক্ষ টাকা লইয়া ফিরিয়া গেলেন।

টমাসের কার্যের পুরস্কারস্বরূপ বেগম তাঁহার প্রধানা সখী মেরিয়া নামে ফরাসী যুবতীকে তাঁহার হস্তে সমর্পণ করিতে চাহিলেন। টমাস্ যুবতীর পাণিগ্রহণে স্বীকৃত হইলে, বেগম উভয়কে বিবাহবন্ধনে আবদ্ধ করিয়া বহুমূল্য যৌতুক প্রদান করিলেন।

এক্ষণে সালুরই বেগমের সেনাপতি নিযুক্ত হইলেন।

তাঁহার অধীনে দিন দিন বেগমের সৈন্যসংখ্যা বর্দ্ধিত হইয়া ছয়দলে পরিণত হইল—সঙ্গে সঙ্গে গোলন্দাজ ও অশ্বারোহী সৈন্যসংখ্যাও বৃদ্ধি পাইল ।

সমরুর পুত্র জায়র-ইয়াবু খাঁর কি হইল ? তিনি বন্দীভাবে দিল্লীতে প্রেরিত হ'ন ; তথায় বেগমের আবাসস্থলে নজরবন্দীভাবে তিনি জীবন অতিবাহিত করিয়াছিলেন । ১৮০৩ খ্রীষ্টাব্দের প্রারম্ভে বিষুচিকা রোগে তাঁহার মৃত্যু হয় ।

সপ্তম অধ্যায়

বেগম সমরুর সিংহাসন-চ্যুতির কারণ সম্বন্ধে জর্জ টমাসের
বিবরণ ; অশ্বাশ্ব লেখকের উক্তি

সৈন্তগণের বিদ্রোহের কারণ ও লেভাসুলতের মৃত্যু-
বিষয়ক ব্যাপার লইয়া বহুলোক বহুরকমের কথা
লিখিয়াছেন। পূর্ব অধ্যায়ে আমরা যে বিবরণটি প্রদান
করিয়াছি, তাহা প্রধানতঃ স্লিম্যান সাহেবের (Sleeman)
গ্রন্থ অবলম্বনে লিখিত ; তিনি একজন সমসাময়িক লেখক ;
এই অসাধারণ মহিলার সাক্ষাৎকারের আশায় তিনি মীরাট
যাত্রা করিয়াছিলেন ; কিন্তু বেগমের মৃত্যুতে তাঁহার সে
আশা ফলবতী হয় নাই। স্লিম্যান বেগমের জীবন-কাহিনী
লিপিবদ্ধ করিতে বহু আয়াস স্বীকার করিয়াছেন, কাজেই
তাঁহার কথাই সমধিক বিশ্বাসযোগ্য বলিয়া মনে হয়।

জর্জ টমাস্, বেগম সম্বন্ধে যাহা লিখিয়াছেন, তাহা
কতকটা শত্রুপক্ষীয় বিবরণ। টমাস্ সৈন্তগণের বিদ্রোহের
কারণ প্রসঙ্গে যাহা লিখিয়াছেন, তাহার সহিত স্লিম্যানের

বিবরণের পার্থক্য আছে ; আমরা নিম্নে সংক্ষেপে তাহা লিপিবদ্ধ করিলাম :—

“টমাস্ বেগমের কার্য্য ত্যাগ করিবার পর আপ্পাখান্দি রাও নামক একজন মহারাষ্ট্র শাসনকর্তার অধীনে কর্ম্ম স্বীকার করেন । অল্পদিনের মধ্যেই তিনি স্বতন্ত্র সেনাদল গঠিত করিয়া, তেজারা ও বাঝার অধিকার করিলেন । অপমানের প্রতিশোধ-গ্রহণার্থ, বেগম সমরুর শত্রুতা-সাধন করিতে তিনি সর্বদাই উন্মুখ ছিলেন ;—সুবিধা পাইলে বেগমের জাগীর লুণ্ঠন করিতেন । দিন দিন টমাসের সেনাদল বর্দ্ধিত হইতে লাগিল—তিনি অচিরেই অসাধারণ ক্ষমতাশালী হইয়া উঠিলেন ।

“জর্জ টমাসের এই প্রকার ক্ষমতাবৃদ্ধিতে বেগম চিন্তিতা হইলেন । টমাস্ যে অবস্থায়, যে কারণে তাঁহার কার্য্য ত্যাগ করিয়া চলিয়া গিয়াছিলেন, তাহা তিনি ভুলেন নাই ; সুতরাং টমাসের ঞ্চায় প্রবল শত্রুর বলবৃদ্ধিতে তাঁহার চিন্তার যথেষ্ট কারণ ছিল । এই প্রকার শত্রুর ক্ষমতা ধর্ব্ব করিতে না পারিলে তিনি নিরাপদ নহেন, এ কথা বেশ বুঝিতে পারিয়া তিনি টমাসের ধ্বংস-সাধনে তৎপর হইলেন ; এমন কি টমাস্কে কর্ম্মচ্যুত করিবার জন্ত, বেগম মহারাষ্ট্রীয়দিগকে উৎকোচ-প্রদানেও কুণ্ঠিতা হ'ন নাই ।



অবশেষে বেগম রাজধানী সাধনা ত্যাগ করিয়া ঝাঝারের ১৭ ক্রোশ দক্ষিণ-পূর্বে শিবির সন্নিবেশ করিলেন। বেগমের এই শত্রুতাচরণের জন্ত টমাস্ স্পষ্টই বেগমের কর্মচারীদের— বিশেষতঃ তাঁহার প্রধান শত্রু লিভাসোর (লেভাসুলতের), উপর দোষারোপ করিয়াছেন ; এই লিভাসো এক্ষণে বেগমের সেনাপতি, এবং বেগমকে বিবাহ করিয়াছেন। কিন্তু বেগমের সঙ্কল্প কার্যে পরিণত হয় নাই। তাঁহার সেনানীগণের মধ্যে বাদ-বিসংবাদের ফলে, তাঁহার শুধু সঙ্কল্পচ্যুতি ঘটে নাই ; অধিকন্তু তাঁহাকে সিংহাসনভ্রষ্ট হইয়া কারাবাস করিতে হইয়াছিল।

“বেগমের সেনাদলে লিগোইস্ নামে একজন জর্মান্ কর্মচারী ছিল ; এই ব্যক্তির সহিত টমাসের সৌহৃদ্য ছিল। বেগমের বর্তমান সেনাপতি লিভাসো, লিগোইস্কে সর্বার চক্ষে দেখিতেন। টমাস্কে আক্রমণ-কালে লিগোইস্ এই কার্য্য হইতে বিরত হইবার জন্য বেগমকে বারংবার অনুরোধ করিয়াছিলেন ; ফলে লিভাসো তাঁহার উপর ক্রুদ্ধ হইয়া তাঁহাকে পদচ্যুত করিয়া, সেই পদ অন্য একজনকে প্রদান করেন।

“এই আচরণে বেগমের সৈন্যবর্গ বিরক্ত হইল। তাঁহার অধীনে বহুদিন তাহার কাৰ্য্য করিয়াছে—যাঁহার নেতৃত্বা-

ধীনে থাকিয়া তাহারা বহুযুদ্ধে জয়লাভ করিয়া আসিয়াছে—
তাহাকে পদচ্যুত করা ! লিগোইসের অপমানে সৈন্যবর্গ
অপমান বোধ করিল—তাহারা বেগমের নিকট অভিযোগ
করিল ; কিন্তু কোন ফলোদ্গ্ৰন হওয়ার তাহারা বিদ্রোহী
হইয়া উঠিল । সমরুর পুত্র জাফর-ইয়াব্ তখন দিল্লীতে ;
বিদ্রোহীরা তাহাকেই সিংহাসনে বসাইতে দৃঢ়প্রতিজ্ঞ
হইল । সঙ্কল্পকে কার্যে পরিণত করিবার জন্য, একদল
সৈন্য দিল্লীতে উপস্থিত হইয়া জাফর-ইয়াব্কে প্রভু স্বীকার
করিল ।

“এই বিদ্রোহের সংবাদে বেগম সমরু ও লিভাসো
কয়েকজন অনুচরের সহিত পলায়নের উদ্যোগ করিলেন ।
স্থির হইল, তাহারা গঙ্গাতীর অভিমুখে অগ্রসর হইয়া পরে
উজীর আসফ-উদ্দৌলার রাজ্যে আশ্রয়লাভ করিবেন ; কিন্তু
রাজধানী হইতে চারি মাইল দূরে কিরওয়া নামক গ্রামে
তাহারা বিদ্রোহীদের হস্তে পতিত হইলেন । তাহার
পর কেমন করিয়া লিভাসোর মৃত্যু হয়, তাহা পূর্বেই
বলিয়াছি ।

“বেগম বিদ্রোহিগণ কর্তৃক ধৃত হইয়া সর্ধানায় বন্দীভাবে
নীত হ’ন । এইভাবে কয়েকদিন অতিবাহিত হইবার পর,
এই বিপদ হইতে মুক্তিলাভের আশায়, তিনি সাহায্যের

জন্য টমাস্কে বিনীতভাবে পত্র লিখিলেন ; তিনি আরও জানাইলেন যে, মহারাষ্ট্রেয়া যদি এই অসময়ে তাঁহাকে সাহায্য করিয়া স্বপদে পুনঃপ্রতিষ্ঠিত করে, তাহা হইলে তিনি এই উপকারের জন্য যত অর্থের প্রয়োজন, তাহা প্রদান করিতে প্রস্তুত আছেন ।

“এই পত্র পাইবার পর টমাস্, বেগমের পূর্বশক্রতা ভুলিয়া, বাপু সিক্কিয়াকে সাধানা অভিমুখে সৈন্যচালনা করিতে অনুরোধ করিলেন ; স্থির হইল, ইহার জন্য টমাস্ তাঁহাকে ১২০,০০০ টাকা দিবেন । টমাস্ ভুক্তভোগী লোক ছিলেন ; তিনি স্থির করিলেন, জাফর-ইয়াবের সৈন্যদলের কিয়দংশকে বেগমের পক্ষ সমর্থন করাইতে না পারিলে, তাঁহার সমস্ত চেষ্টা বিফল হইবে ;—সঙ্গে সঙ্গে বেগমও অধিকতর বিপদগ্রস্ত হইবেন । এই উদ্দেশ্যে টমাস্, তাঁহার সমগ্র সৈন্যসহ সাধানার আটক্রোশ উত্তর-পূর্বে কাথুলী গ্রামে উপস্থিত হইলেন । তথায় তিনি প্রকাশ্যে ঘোষণা করিলেন যে, বেগমকে যদি পুনরায় স্বপদে স্থাপিত করান না হয়, তাহা হইলে বিদ্রোহীরা তাহাদের এই দুর্কার্যের ঘোর পরিণাম বুঝিতে পারিবে ; টমাস্ তাঁহার এই প্রস্তাবের গুরুত্ব জ্ঞাপন করিবার জন্য আরও জানাইলেন যে, তিনি মহারাষ্ট্রীয়গণের আদেশের বশবর্তী হইয়াই কার্য্য করিতেছেন ।

“এই সংবাদে যে কোন ফল হয় নাই, তাহা নহে। দুর্গস্থ সৈন্যদলের কতকাংশ বেগমের পক্ষ অবলম্বন করিয়া জাফর-ইয়াব্কে বন্দী করিল।

“এই সৈন্যগণের স্বভাব-চরিত্র টমাসের অপরিজ্ঞাত ছিল না ; তিনি জানিতেন, কথায় কথায় তাহাদের মত পরিবর্তিত হইতে পারে ;—বিদ্রোহ তাহাদের এক প্রকার নিত্য-কার্য ; কাজেই তিনি তাহাদের কথার উপর বিশ্বাস স্থাপন না করিয়া, অবিলম্বে সার্দানা অভিমুখে অগ্রসর হইলেন—সঙ্গে লইলেন ৫০ জন মাত্র অশ্বারোহী সৈন্য ; অবশিষ্ট পদাতিক সৈন্যকে সত্বরতার সহিত তাঁহার অনুসরণ করিতে আদেশ করিলেন।

“টমাস সার্দানার উপস্থিত হইয়া শুনিলেন, অনতিপূর্বেই অপর একদল সৈন্য বিদ্রোহী হইয়া জাফর-ইয়াব্কে পুনরায় সিংহাসনে বসাইয়াছে। টমাসের উপস্থিতে জাফর-ইয়াব্ বিরক্ত হইয়াছিলেন। তিনি টমাসকে স্বীয় আয়ত্বাধীন ভাবিয়া, এবং তাঁহার পশ্চাতে কোন প্রবল শক্তি নাই, এইরূপ অনুমান করিয়া, তাঁহাকে হত্যা করিবার ভয় দেখাইলেন। এই সময়ে টমাসের পদাতিক সৈন্যদল আসিয়া উপস্থিত হইল ; চারিদিকে ছলছল পড়িয়া গেল ; বিদ্রোহীরা স্থির করিল, নিশ্চয়ই সমগ্র মহারাষ্ট্র সৈন্য

তাহাদের শাস্তি-বিধানের জন্ত উপস্থিত ; কাজেই তাহারা পূর্ব-সঙ্কল্প ত্যাগ করিয়া, একবাক্যে বেগমের অধীনতা স্বীকার করিল ;—বেগম সমরু সিংহাসন লাভ করিলেন । বেগমকে সাহায্যের জন্ত বাপু সিন্ধিয়াকে যে টাকা দিবার কথা ছিল, তাহার কিয়দংশ মিটাইয়া দেওয়া হইল ।”

মুন্ডি (Mundy), বেকন্ (Bacon) প্রভৃতির মতে বেগমের আত্মহত্যা একটা অভিনয় মাত্র । সৈন্যবর্গের উপর স্বামীর অগ্রাঙ্গ-আচরণে বিদ্রোহের সূচনা অবশ্যস্তাবী বুদ্ধিতে পারিয়া, তিনি স্বামীর হস্ত হইতে অব্যাহতিলাভের আশায় আপনি আত্মহত্যার চেষ্টা করিয়াছিলেন । তিনি জানিতেন, এরূপ করিলে পূর্ব-সঙ্কল্পমত লেভাসুল্ত্ কখনই বাঁচিয়া থাকিবেন না ।

উপরে যে বিবরণ লিপিবদ্ধ হইল, তাহাতে কোনরূপেই আস্থা স্থাপন করা যায় না ; কারণ তাহা হইলে বেগমের প্রধান শত্রু টমাস্ নিশ্চয়ই এ কাহিনীর বিষয় লিখিতেন । কম্পটন্ (Compton) বেগমের অনিচ্ছায় ছুরিকাঘাতের কথা লিখিলেও, এই ষড়্‌যন্ত্রের কথা উল্লেখ করেন নাই । যাহারা বলিতে চাহেন, বেগম স্বীয় সৈন্যদলের সহিত ষড়্‌যন্ত্র করিয়া লেভাসুল্তের মৃত্যু ঘটাইয়াছিলেন, তাহাদের বুঝা উচিত যে, লেভাসুল্তকে ইহধাম হইতে অপসৃত

করিবার জন্তু এত আয়োজনের, এমন করিয়া পলায়নের কোনই প্রয়োজন ছিল না ; সামান্য ইঙ্গিতমাত্রই তাঁহার অস্তিত্ব লোপ হইত । আরও এক কথা, তিনি যদি লেভামুলতের ধ্বংস-সাধনের জন্য সৈন্যগণের সহিত গোপনে ষড়্‌যন্ত্রই করিবেন, তাহা হইলে স্বামীর মৃত্যুর পর নিজের সৈন্যগণ কর্তৃক এমনভাবে লাঞ্চিত ও অবমানিত হইবেন কেন ? এই সমস্ত কারণে আমাদের মনে হয়, এই ষড়্‌যন্ত্রের কথা সম্পূর্ণ অমূলক ।

অষ্টম অধ্যায়

এসাই-এর যুদ্ধে বেগম সমরু ; ইংরেজের
সহিত সন্ধি ; ভরতপুরের যুদ্ধ

প্রণয়-দেবতার চরণে দ্বিতীয়বার আত্মসমর্পণ করিয়া—লেভাসুলত্কে গোপনে বিবাহ করিয়া, বেগম সমরু মনের যে দুর্বলতার পরিচয় দিয়াছিলেন, তাহার অবশ্যস্বাভাবী ফল তিনি ভোগ করিয়াছিলেন—জীবনের একটা ভুলের জন্য তাঁহাকে হতসর্বস্ব, অবমানিত ও লাঞ্ছিত হইতে হইয়াছিল, কিন্তু তিনি যে সেই ভ্রম-সংশোধনের মহতী চেষ্টা করিয়াছিলেন, তাহা তাঁহার মরণ পর্য্যন্ত প্রথম স্বামী সমরুর নামানুযায়ী আপনাকে অভিহিত করা হইতেই স্পষ্ট বুঝা যায়। লেভাসুলতের মৃত্যুর পর কখনও তিনি প্রকাশে দ্বিতীয় বিবাহের কথা উল্লেখ করেন নাই। বেগমের সহিত লেভাসুলতের প্রকৃত সম্বন্ধ জানিত না বলিয়াই তাঁহার সৈন্যবর্গ উভয়ের অবাধ-মিলনকে প্রণয় স্থির করিয়া ত্রুঙ্ক হইয়াছিল ;—ত্রুঙ্ক হইয়াছিল পাছে তাহাদের পূর্ব অধিনায়ক সমরুর গৌরব অক্ষুণ্ণ

না থাকে—সমরুর নাম যদি লোপ পায়। যদি সমরুর পুণ্যনামের পরিবর্তে লেভাসুল্তের নাম স্থান অধিকার করিয়া বসে—যদি মহিম-বিজড়িত গৌরবশ্রীমণ্ডিত সমরুর বিধবা লেভাসুল্তের কামানলে ইন্ধন যোগাইয়া দেয়, তাহা হইলে কি ভীষণ পরিণাম হইবে,—তাহাই ভাবিয়া সৈন্যগণ অব্যবস্থিতচিত্ত লেভাসুল্তের বিরোধী হইয়াছিল। বুদ্ধিমতী বেগম সমরু সৈন্যগণের নিকট প্রকৃত কথা গুপ্ত রাখিয়াছিলেন; কারণ তিনি জানিতেন, এ কথা গুনিলে তাহার বিদ্রোহী হইয়া তাঁহার অধীনতা অস্বীকার করিবে,—রাজ্যে সমরানল প্রজ্বলিত করিয়া দিবে—নিরীহ প্রজাবর্গের ধনপ্রাণ রক্ষা করা দুর্ঘট হইবে। ইহার ফলে যাহা হয়, তাহাই হইল; চারিদিকে তাঁহার কুৎসা রটিল; তাঁহার চরিত্রে কলঙ্কারোপিত হইল, তাঁহাকে লেভাসুল্তের ‘উপপত্নী’ বলিয়া লোকে মনে করিল। চরিত্রের উপর এই কলঙ্কারোপও তিনি নীরবে সহ করিলেন; তাঁহার গুপ্ত বিবাহের কথা প্রচারিত করিয়া এই ঘোর অপবাদ মোচনের চেষ্টা করিলেন না। তাহার পর লেভাসুল্তের জন্য তাঁহাকে যে ভীষণ বিপদে পড়িতে হইয়াছিল, তাহা পূর্বেই বর্ণিত হইয়াছে।

লেভাসুল্তের সহিত বেগমের বিবাহের কথা মেজর

পামার, সার জন্ শোর, বার্নিয়ার, সালুর, এবং লেভামুল্‌ত্‌
 যে ছ'একজন পরিচিতের সহিত পত্র-ব্যবহার করিয়াছিলেন,
 কেবলমাত্র তাঁহারা ই জানিতেন । বহুদিন বেগমের কর্মে
 জীবনপাত করিয়াছিলেন, এরূপ কয়েকজন অতিবৃদ্ধ দেশীয়-
 লোকের নিকট সন্ধ্যান্ অবগত হ'ন :—“There really
 was too much of truth in the story which ex-
 cited the troops to mutiny on that occasion,
 her too great intimacy with the gallant young
 Frenchman. God forgive them for saying so of
 a lady whose salt they had eaten for so many
 years.” অর্থাৎ,—“প্রকৃতপক্ষেই, এই ফরাসী যুবকের
 সহিত বেগমের অতিরিক্ত মেশামেশিই সৈন্যদের বিদ্রোহের
 প্রধান কারণ । যাঁহার নিমক আমরা এতকাল খাইয়া
 আসিতেছি, তাঁহার বিষয়ে সত্যের খাতিরে, এরূপ কথা
 উচ্চারণ করার জন্ত ভগবান্ আমাদের ক্ষমা করুন ।” লেভা-
 মুল্‌ত্‌ কর্ণেল ম্যাক্‌গাউনের নিকট তাঁহার বিবাহের কথা
 প্রকাশ করেন নাই । আর তিনি যেভাবে সার জন্ শোরের
 নিকট এই বিবাহের কথা উত্থাপন করিয়াছিলেন, তাহা
 হইতে স্পষ্ট প্রতীয়মান হয় যে, লেভামুল্‌ত্‌ বা বেগম—
 অথবা উভয়েই—সৈন্যগণ বা সিক্কিয়ার নিকট এই বিবাহের

কথা পলায়নের পূর্বে গোপন করিতে বিশেষ উৎসুক হইয়া-
ছিলেন। আমাদের মনে হয়, প্রণয়ের মোহে মুগ্ধ হইয়া,
লেভাসুলতের অঙ্কশায়িনী হইয়া, বেগম যে সাময়িক দুর্বলতার
পরিচয় দিয়াছিলেন, তাহা বিশ্বাসিতর গর্ভে ডুবাইবার জগুই
হউক, অথবা সমরুর পুণ্যস্মৃতিকে উজ্জ্বল করিবার জগুই হউক,
তিনি উত্তরকালে উইলে লিখিয়া যান যে, তাঁহার উত্তরাধি-
কারী মিঃ ডাইস্কে “সোম্বার” নাম গ্রহণ করিতে হইবে।

যাহাতে স্বীয় ক্ষমতা অক্ষুণ্ণ রাখিয়া, সুশৃঙ্খলায় ও শান্তিতে
প্রজাশাসন ও রাজকার্য পরিচালনা করিতে পারেন, তাহাই
এখন বেগম সমরুর প্রধান উদ্দেশ্য হইয়া উঠিল, এবং সেই
উদ্দেশ্য কার্যে পরিণত করিবার জগু তিনি সর্বতোভাবে
ব্যবস্থা করিতে আরম্ভ করিলেন।

১৮০৩ খ্রীষ্টাব্দে ইংরেজ গভর্নেন্ট মহারাষ্ট্রীয়দিগের
বিরুদ্ধে যুদ্ধঘোষণা করেন। বেগম সমরুর ছয়দল সৈন্তের
মধ্যে পাঁচ দল সালুরের অধীনে সিক্কিয়ারকে সাহায্যার্থ
দাক্ষিণাত্য অভিমুখে গমন করে। এই যুদ্ধ ইতিহাসে এসাই-
এর যুদ্ধ নামে পরিচিত। আর্থার ওয়েলেস্লি (পরে ডিউক
অফ্ ওয়েলিংটন্) এই যুদ্ধে দাক্ষিণাত্যে মহারাষ্ট্রশক্তিকে
বিধ্বস্ত করেন। বড়ই আশ্চর্যের বিষয়, সিক্কিয়ার সৈন্ত-
গণের মধ্যে একমাত্র বেগমের সৈন্তবর্গের চারি দল অক্ষত-

শরীরে যুদ্ধক্ষেত্র হইতে ফিরিয়া আসিতে সমর্থ হইয়াছিল। ইহা বেগম সমরুর সৈন্যগণের, তথা বেগমের কার্যকুশলতার প্রকৃষ্ট পরিচয়। ১৮০৩ খ্রীষ্টাব্দে লর্ড লেক্‌ আর্ঘ্যাবর্তে এবং ওয়েলেস্লি দক্ষিণাত্যে মহারাষ্ট্রশক্তি নিশ্চূর্ণ করিলেন। প্রকৃতপক্ষে এই সময় হইতেই ভারতবর্ষ ইংরেজাধীন হয়—ভারতের পক্ষে ইহা একটা স্মরণীয় দিন!

এই যুদ্ধের অনতিকাল পূর্বে প্রসিদ্ধ জেমস্‌ স্কিনারের কনিষ্ঠভ্রাতা রবার্ট স্কিনার বেগমের সৈন্যদলে প্রবেশ করেন। এক্ষণে বেগম সমরু ইংরেজের আনুগত্য স্বীকার করিতে সম্মত হইয়া স্কিনারকে লর্ড লেকের নিকট প্রেরণ করিলেন। তীক্ষ্ণবুদ্ধিশালিনী মহিলা বেশ বুঝিতে পারিলেন, ভারতে আর কোন শক্তিই কার্যকরী হইবে না; প্রবল ইংরেজরাজাই ভারতের একচ্ছত্র সম্রাট্ হইবেন; মহারাষ্ট্রীয়দিগের অভ্যুত্থানের আর আশা নাই। এ অবস্থায় ইংরেজরাজের আনুগত্য স্বীকার করিয়া, তাঁহাদের বন্ধুত্বলাভপূর্বক নিজের রাজ্য ও ক্ষমতা সুদৃঢ় করাই কর্তব্য বলিয়া তিনি বুঝিতে পারিলেন; তাই তিনি স্বতঃপ্রবৃত্ত হইয়া স্কিনারকে পাঠাইলেন।

লেক্‌ এই প্রস্তাব আনন্দের সহিত গ্রহণ করিলে বেগম সম্মান-প্রদর্শনার্থ শিবিকারোহণে ভারতপুরের ১৩ মাইল

পশ্চিমে পাহেসার নামক স্থানে তাঁহার শিবিরে উপস্থিত হইলেন (১৮০৩ খ্রীষ্টাব্দ, নভেম্বর)। বেগমের আগমন-সংবাদে সেনাপতি শিবিরের বাহিরে আসিলেন, এবং কতকটা মদিরার প্রভাবে, কতকটা আনন্দের বশে, অতিথি পুরুষ কি স্ত্রীলোক তাহা বিস্মৃত হইয়া, তিনি বেগমকে আলিঙ্গন করিয়া মুখচুম্বন করিলেন ! বেগমের অনুচরবর্গ এ দৃশ্যে স্তম্ভিত হইয়া গেল। জননীর অপমান সস্তান হইয়া কিরূপে সহ্য করিবে ? প্রতিহিংসানল তাহাদের নয়নে নয়নে ঝলকিতে লাগিল—কোষবদ্ধ অসির ঝনঝন উঠিল। সেনাপতি আপনার ভ্রম বুঝিতে পারিলেন। বেগম দেখিলেন, সাহেবের এই ব্যবহারে তাঁহার অনুচরগণ যে প্রকার উত্তেজিত, তাহাতে এখনই একটা অনর্থ ঘটতে পারে। তিনি কিংকর্তব্যবিমূঢ় না হইয়া, উপস্থিত-বুদ্ধি প্রভাবে, এই ব্যাপারটির একটা অতি সুন্দর ব্যাখ্যা দিলেন ; তিনি সহস্রাবদনে স্বীয় অনুচরবর্গকে বলিলেন,—“বন্ধুবর্গ, দেখ ! কিরূপে খ্রীষ্টীয় ধর্মযাজক ভ্রান্তকণ্ঠকে গ্রহণ করে।” অতি সূচতুর পুরুষের মস্তকেও এমন সময়, এমন ব্যবহারে, এমন সুন্দর কথা আসিতে পারে না। বেগমের উপস্থিত-বুদ্ধির প্রভাবে এ অপমানও আশীর্বাদের মূর্তি পরিগ্রহ করিল ; অনুচরবর্গ ক্রোধ ত্যাগ করিল ; সাহেবেরও মান রক্ষা হইল।

বেগম সমরুর ইংরেজের অধীনতাস্বীকার প্রস্তাব সম্বন্ধে ওয়েলেস্লি ও লোকের মধ্যে যে পত্র-ব্যবহার হইয়াছিল, তাহার একখানি নিম্নে উদ্ধৃত হইল :—

The Marquess Wellesley to Lieut.-General
Lake. (Official & Secret)

* * * * *

Fort William, July 28, 1803.

Your Excellency will be apprized by the 26th paragraph of my instructions to Mr. Mercer, of the arrangement which I propose to conclude with respect to the Jaggeer of Zeeboo Nissa Begum, commonly called Sum-roo's Begum. The disposition of the Begum to place herself under the protection of the British Government is distinctly declared in two letters which I have lately received from her.

I have stated in my instructions to Mr. Mercer that the local situation of the Begum's Jaggeer renders it desirable that in any


engagement concluded with her on the part of the British Government, such conditions should be inserted as may facilitate the introduction of the British regulations into the Jaggeer, and I request that your Excellency's negotiations with the Begum may be directed to the accomplishment of this object. It may not, perhaps, be expedient directly to propose to her this arrangement, until the British power shall have been established in the adjacent territories of the Dooab. But in that case, the engagements to be concluded with the Begum should be such as to form a basis for the future accomplishment of the proposed arrangement. Your Excellency, however, will be guided in the determination of this point, by the information which you may acquire of the disposition of the Begum to acquiesce in the extent of my views with relation to her Jaggeer. It is my wish to

commute her Jaggeer for a suitable stipend, the extent of which must be regulated by the profits which she actually derives from her territorial possessions, and by the importance of the services which the British Government may derive from the exertion of her aid and influence.

As an immediate proof of her disposition to connect her interests with those of the British Government, and as the condition of her being admitted to the benefits of its protection, she should be required to recall her battalions now serving in the army of Dowlut Rao Scindiah, and to employ whatever influence she may possess over the Zamindars and chieftains in the Dooab to induce them to place themselves under the authority of the British Government, and to employ their resources in assisting the operations of the British armies.

With a view, however, to expedite the proposed arrangement with the Begum, I have deemed it expedient to transmit a duplicate of my letter to her to the Resident at Lucknow, directing him to deliver it for transmission to the Begum's Vakeel stationed at that city, and if he should have reason to suppose that Vakeel to be in the confidence of the Begum, to communicate to him generally the disposition of the British Government to afford its protection to the Begum, to require him to suggest to her the immediate despatch of orders of recall to her battalions serving with Dowlut Rao Scindiah, and to propose his proceeding to the camp of your Excellency for the purpose of eventually becoming the channel of negotiation between your Excellency and the Begum. (*Wellesley Despatches*, iii, 242-4).

বেগমের সহিত ইংরেজের সন্ধি হইয়া গেল



সর্ধানার রাজ প্রাসাদ

1

(১৮০৪ খ্রীঃ) । ইংরেজেরা স্থির করিয়া দিলেন যে, বেগম যতদিন জীবিত থাকিবেন, ততদিন তাঁহার অধিকার অক্ষুণ্ণ থাকিবে ; তাঁহার মৃত্যুর পর জাগীর ইংরেজ অধিকার-ভুক্ত হইবে । বেগমও এই অনুগ্রহের বিনিময়ে, আমরণ ইংরেজের পক্ষাবলম্বন করিতে স্বীকৃত হইলেন ; এখন হইতে তিনি স্বীয় সৈন্যদলের একদল মাত্র রাজস্ব আদায় ও আত্মরক্ষণাবেক্ষণের জন্য রাখিয়া দিলেন ; অবশিষ্ট সৈন্যদল ইংরেজের সাহায্যার্থ রক্ষিত হইল ।

১৮২৫ খ্রীষ্টাব্দের ডিসেম্বর মাসে, ভরতপুরের রাজার সহিত লর্ড কোম্বারমিয়ারের নেতৃত্বে ইংরেজের যে যুদ্ধ হয়, সেই সময়ে বেগম ইংরেজপক্ষের সাহায্য করিয়াছিলেন । বেগমের এই সময়োচিত সাহায্য ও তাঁহার আদর্শ রাজ-ভক্তির পরাকাষ্ঠা দেখিয়া ইংরেজ-গভর্নেন্ট এই যুদ্ধে জয়লাভের পর বেগমকে প্রকাশ্য দরবারে ধন্যবাদ করিয়া-ছিলেন । আর্চার লিখিয়াছেন—“১৮২৬ খ্রীষ্টাব্দে যখন ইংরেজ-সৈন্য ভরতপুরের নিকট সমুপস্থিত, সেই সময়ে প্রধান সেনাপতি জানাইলেন যে, তাঁহাদের সহায়তাকারী কোন দেশীয় শক্তির নেতা স্বীয় সৈন্যসহ অবরোধকারী ইংরেজ-সেনার সহিত গমন করিতে পারিবে না ।” সেনাপতির এই আদেশে বেগমের আত্মগৌরবে আঘাত

লাগিয়াছিল ; তিনি ইহার প্রতিবাদ করিয়া তৎক্ষণাৎ বলিয়াছিলেন,—“ইহা প্রলাপ মাত্র ! আমি যদি ভারত-পুরের যুদ্ধে না যাই, তাহা হইলে সমগ্র হিন্দুস্থান বলিবে, বৃদ্ধবয়সে বেগম সমরুর মধ্যে কাপুরুষতার লক্ষণ দেখা দিয়াছে !” পরিশেষে বেগমের ইচ্ছাই পূর্ণ হইয়াছিল ।

সন্ধিসূত্রে আবদ্ধ হইবার পর, বেগম সমরু প্রায়ই লেকের দিল্লীর প্রধান সেনানিবাসে তাঁহার সহিত সাক্ষাৎ করিতে যাইতেন (১৮০৬ খ্রীঃ) । লেকের বিলাত-গমনের অনতিকাল পূর্বে বেগম দিল্লীতে তাঁহাকে এক বিরাট ভোজে নিমন্ত্রণ করিয়াছিলেন (ফেব্রুয়ারী-মার্চ, ১৮০৬ খ্রীষ্টাব্দ) ।

প্রবলশক্তি ইংরেজের বন্ধুত্বলাভ ও দেশে শান্তি-সংস্থাপনের ফলে একদিকে যেমন বেগম সমরুর আয়বৃদ্ধি হইয়াছিল, অপরদিকে তেমনই প্রায় ৩০ বৎসর কাল তাঁহার আর সৈন্ত রাখিবার প্রয়োজন হয় নাই । এই আয়বৃদ্ধি ও ব্যয়-লাঘবে বেগম প্রভূত অর্থসঞ্চয় করিতে পারিয়াছিলেন ।

নবম অধ্যায়

জনহিতকর কার্যে বেগম সমরু ; মৃত্যু ; শাসনকার্য-
সম্বন্ধে তৎকালীন সংবাদ-পত্রের অভিমত

এক্ষণে বেগম বার্কেকোর সীমায় উপনীত হইলেন ; ভাবিলেন, 'শেষের সেদিনে'র জন্ত কি করিতেছেন । এই প্রভুত্ব—এত অর্থ—এই নাম জীবনের সঙ্গে সঙ্গেই ত অন্তর্হিত হইবে ; এই সুদীর্ঘ জীবনকালে এমন কি কাজ করিয়াছেন, যাহাতে তাঁহার নাম ইতিহাসের পৃষ্ঠা উজ্জ্বল করিয়া রাখিবে । তাই তিনি অর্থের সদ্যবহার করিতে মনোনিবেশ করিলেন—জীবনকে নূতন করিয়া গঠিত করিতে চেষ্টা করিলেন ; বুঝিলেন, মানবের উপকার না করিলে ষড়ৈশ্বর্যময় ভগবানের করুণা লাভ করা যায় না—ধনশালী ব্যক্তি ভগবানের প্রতিভূস্বরূপ—তাঁহার মঙ্গলকার্যে সেই অর্থ নিয়োজিত না হইলে অর্থের সদ্যবহার করা হয় না । এক্ষণে বেগমের যত্নে ও অর্থে ক্যাথলিক ধর্মসম্প্রদায়ের বিস্তার ও পরিপুষ্টি হইতে লাগিল । একমাত্র তাঁহারই

সাহায্যে সর্ধানার তৎকালীন ধর্মযাজক জুলিয়াম্ সিজারের পদোন্নতি ঘটয়াছিল এবং তিনি Holy See হইতে *Bishop of Amathunta in partibus infidelium* এই উচ্চপদলাভে সমর্থ হইয়াছিলেন। ইতঃপূর্বে বেগমকে কর্তব্যের অনুরোধে নানাস্থানে সৈন্তচালনা করিয়া বেড়াইতে হইত বলিয়া, তাঁহার উপাসনার কোন নির্দিষ্ট স্থান ছিল না। এক্ষণে বেগম সর্ধানায় একটা ভজনালয় নির্মাণ করাইতে কৃতসঙ্কল্প হইলেন। অত্যাপি সর্ধানায় Cathedral Church of St. Mary নামে খ্রীষ্টীয়ানগণের যে সুবৃহৎ ধর্মমন্দির শোভা পাইতেছে, তাহা বেগমেরই অতুলনীয় কীর্তি—ধর্মপ্রাণতার উজ্জ্বল সাক্ষ্য। মেজর রেঘোলিনী নামক বেগমের জনৈক ইতালীয় কর্মচারীর তত্ত্বাবধানে, ১৮২২ খ্রীষ্টাব্দে এই ভজনালয়ের নির্মাণকার্য সমাধা হয়; কথিত আছে, ইহার জন্য বেগমের চারি লক্ষ টাকা ব্যয় হইয়াছিল।

ভজনালয় প্রতিষ্ঠার পর বেগম নিজ ব্যবহারার্থ সর্ধানায় একটি সুন্দর প্রাসাদ নির্মাণ করেন (১৮২৯ খ্রীঃ ৭)। দিল্লী ও মীরাটেও তাঁহার ব্যয়ে দুইটা প্রাসাদ নির্মিত হইয়াছিল; এক্ষণে Delhi & London Bank দিল্লীর প্রাসাদটির স্থান অধিকার করিয়াছে। মীরাটে ক্যাথলিক্

সৈন্তদিগের যে সুন্দর ধর্মমন্দির আছে, তাহাও বেগমের কীর্তি। দেশীয় (Protestant) প্রোটেস্ট্যান্টদিগের সুবিধার্থ, বেগম দশ হাজার টাকা ব্যয়ে মীরাতের Church Missionary রেভারেণ্ড মিঃ রিচার্ডসের জন্ত একটি গীর্জার প্রতিষ্ঠা করিয়াছিলেন। ভরতপুরের সন্নিকটে তাঁহার একটি সুন্দর উদ্যান ছিল। মৃত্যুর ৭৮ বৎসর পূর্বে, সাধীনা হইতে দুই তিন ক্রোশ দূরে কিরওয়া নামক স্থানে বেগম একটি সুন্দর প্রাসাদ নির্মাণ করাইয়াছিলেন; শেষ জীবনে প্রায়ই তিনি এইস্থানে অবস্থান করিতেন; ভরতপুরের দুর্গমধ্যেও তাঁহার একখানি মনোরম অট্টালিকা ছিল।

বেগম সমরুর সুদীর্ঘ জীবনে সন্ধ্যা ঘনাইয়া আসিল। কয়েকদিনের জ্বরে তিনি শয্যাশায়িনী হইলেন। ১৮৩৬ খ্রীষ্টাব্দের ২৭এ জানুয়ারী প্রাতঃকালে তিনি ভগবানের নাম স্মরণ করিতে করিতে ইহধাম ত্যাগ করিয়া গেলেন। মৃত্যুর পর তাঁহারই নির্মিত ধর্মমন্দিরে তাঁহাকে সমাহিত করা হয়।

বেগম সমরুর মৃত্যু-প্রসঙ্গে *Merat Observer* নামক তৎকালীন সাপ্তাহিক-পত্রে যাহা লিখিত হইয়াছিল, তাহা আমরা নিম্নে প্রদান করিলাম; ইহা তাঁহার প্রজারজনগণের উজ্জল প্রমাণ!

MERAT OBSERVER

“In our last week’s paper, it was our painful task to announce the death of Her Highness the Begam Sombre, on the 27th at her residence at Sirdhana.

* * * * *

“No time was lost in despatching an express to the magistrate at Merat and the agent to the Governor-General at Delhi : the former of these officers reached Sirdhana by noon, and immediately proceeded to the palace, where he was received by Mr. Dyce Sombre, Dr. Drever, and other members of the family. Necessary arrangements were immediately made for the funeral and other ceremonies ; and it being announced that Col. Dyce had repaired to Sirdhana, Mr. Hamilton had an interview with that officer, who shortly after returned to Merat.

“The crowds assembled outside the

palace-walls, and on the roads, were immense and one scene of lamentation and sorrow was apparent ; the grief was deep and silent ; the clustered groups talked of nothing but the heavy loss they had sustained, and the intensity of their sorrow was pictured in their countenances, nor did they separate during the night. According to the custom of the country, the whole of the dependants observed a strict fast ; there was no preparing of meals, no retiring to rest ; all were watchful, and every house was a scene of mourning.

“At nine, the whole of the arrangements being completed, the body was carried out borne by the native Christians of the artillery battalion, under a canopy, supported by the principal officers of her late highness’s troops, and the pall by Messrs. Dyce Sombre, Solaroli, Drever and Troup, preceded by the whole of her highness’s bodyguards, followed

by the Bishop, chanting portions of the service, aided by the choristers of the Cathedral. After them, the magistrate, Mr. Hamilton, and then the chief officers of the household, the whole brought up by a battalion of her late highness's infantry, and a troop of horse. The procession, preceded by 4 elephants from which alms and cakes were distributed amongst the crowd, passed through a street formed of the troops at Sirdhana, to the door of the Cathedral, the entrance to which was kept by a guard of honour from the 30th N. I., under the command of Capt. Campbell. The procession passed into the body of the Cathedral in the centre of which the coffin was deposited on tressels. High mass was then performed in excellent style, and with great feeling, by the Bishop. The body was lowered into the vault. Thus terminated the career of one who, for upwards

of half a century, has held a conspicuous place in the political proceedings of India. In the Begam Sombre the British authorities had an ardent and sincere ally, ever ready, in the spirit of true chivalry, to aid and assist, to the utmost of her means, their fortunes and interests."

"As soon as the family had retired into the palace, the magistrate of Merat proceeded with the officers of his establishment, to proclaim the annexation of the territories of her late highness to the British Government ; proclamation was made throughout the town and vicinity of Sirdhana, by the Government authority, and similar ones at the principal towns, in different parts of the jaghir, according to previous arrangement ; so that this valuable territory became almost instantaneously incorporated with Zilla Merat, to which it remains annexed ; the introduction

of her police and fiscal arrangements having been especially intrusted to Mr. Hamilton, by orders from the Govt. of India received so far back as August 1834.

“The whole of the landed possessions of her late highness revert to the British and the personal property, amounting to nearly half a crore, devolves by will upon Mr. Dyce Sombre, with the exception of small legacies and charitable bequests.”

আমরা নিম্নে উপরিউক্ত বিবরণের মর্মানুবাদ দিলাম :—

“২৭এ জানুয়ারী (১৮৩৬) বেগম তাঁহার সাধানার প্রাসাদে দেহত্যাগ করিয়াছেন ;—এ সংবাদ আমরা অতীব সন্তুষ্ট-হৃদয়ে গত সপ্তাহে প্রকাশ করিয়াছি ।

* * * * *

মীরাটের ম্যাজিষ্ট্রেটের নিকট এবং দিল্লীতে গভর্নর-জেনারেলের এজেন্টের নিকট বেগমের মৃত্যু-সংবাদ সত্বর প্রেরিত হইল । ম্যাজিষ্ট্রেট সাহেব সেইদিন মধ্যাহ্নে সাধানার আসিয়া পৌঁছিলেন ; তিনি প্রাসাদে গমন করিয়া ডাইন্স সোম্বার, ডাক্তার ডেভার ও বেগমের পরিবারভুক্ত

অন্যান্য লোকজনের সহিত মিলিত হইলেন। অবিলম্বে মৃতদেহ সমাহিত করিবার, ও অন্যান্য ক্রিয়াকলাপ সম্পন্ন করিবার আয়োজন হইতে লাগিল।

প্রাসাদ-প্রাচীরের বহির্ভাগে ও পশ্চিমধ্যে দলে দলে বহু লোকের সমাবেশ হইয়াছিল—চারিদিকেই গভীর শোকের দৃশ্য। সমাগত জনমণ্ডলীর মুখে একই কথা,—বেগমের মৃত্যুতে আজ তাহাদের কি ভীষণ ক্ষতি হইল; তাহাদের মলিন মুখমণ্ডলে শোকের গভীরতা পরিস্ফুট। সমস্ত রাত্রি তাহারা গৃহে ফিরিল না; দেশের প্রচলিত রীতি অনুযায়ী বেগমের অনুগত ব্যক্তিগণ সকলেই সেদিন উপবাসী রহিল; কোন গৃহেই রন্ধনের আয়োজন হইল না, কেহই বিশ্রাম করিল না—সকলেই বিবাদাচ্ছন্ন—প্রতি গৃহেই শোকের চিত্র যেন মূর্তিমান!

অন্ত্যেষ্টিক্রিয়ার সমস্ত আয়োজন হইলে ৯টার সময় বেগমের গোলন্দাজ-সৈন্যদলের দেশীয় খ্রীষ্টানেরা মৃতদেহ বহন করিয়া লইয়া চলিল; বেগমের সৈন্যদলের প্রধান কর্মচারিবর্গ শবাধারের উপর চক্রাতপ ধারণ করিয়া চলিলেন; ডাইন্স সোম্বার, সোলারোলী, ড্রেভার ও ট্রুপ শবাস্তরণ (pall) ধরিয়া অগ্রসর হইতে লাগিলেন; তাহাদের অগ্রে বেগমের শরীর-রক্ষীদল; পশ্চাতে

বিশপ্ মজ্জোচ্চারণ করিতে করিতে অগ্রসর ; গীর্জার গায়কেরা শোক-সঙ্গীতে দিগ্বাণুল প্রতিধ্বনিত করিতে লাগিল, তাঁহাদের পশ্চাতে ম্যাজিষ্ট্রেট হ্যামিলটন্ সাহেব, অন্যান্য কর্মচারী—সর্ব পশ্চাতে একদল পদাতিক ও এক দল অশ্বারোহী সৈন্য । এই শোক-যাত্রার পুরোভাগে চারিটি হস্তী—হস্তিপৃষ্ঠ হইতে টাকা, পয়সা, কেব্ প্রভৃতি প্রক্ষিপ্ত হইতেছে । শোক-যাত্রা যে পথ দিয়া যাইতেছিল, তাহার দুই পার্শ্বে বেগমের সৈন্যবর্গ শ্রেণিবদ্ধভাবে দণ্ডায়মান । অবশেষে মৃতদেহ গীর্জার মধ্যে নীত হইল ; তাহার পর ধর্ম্মানুমোদিত ক্রিয়াকলাপ সম্পন্ন হইলে, মৃতদেহ সমাহিত করা হইল । যে মহিলা অর্দ্ধ শতাব্দীর অধিক-কাল ভারতের রাষ্ট্রীয়-ব্যাপারে উচ্চ স্থান অধিকার করিয়া-ছিলেন—আজ তাঁহার জীবন-নাট্যের অবসান হইল । বেগম সমরু ইংরেজ-রাজপুরুষগণের অকৃত্রিম বন্ধু ছিলেন—ইংরেজের সর্ববিধ উন্নতি ও সৌকর্য্য-বিধানের জন্ত—তাঁহাদিগকে সাধ্যমত সহায়তা করিবার জন্ত—তিনি সর্বদাই প্রস্তুত ছিলেন ।

“অন্ত্যেষ্ঠিক্রিয়া শেষ হইলে সকলে প্রাসাদে প্রত্যাবৃত্ত হইলেন ; ম্যাজিষ্ট্রেট সাহেব তাঁহার কর্মচারীদিগের সহিত পরলোকগত বেগমের জমিদারী ইংরেজ-রাজসরকারভুক্ত

করিবার আদেশ ঘোষণা করিতে অগ্রসর হইলেন ; নগরের সর্বত্র, সার্বানার চতুর্পার্শে, এবং বেগমের বিভিন্ন জাগীরে এ মর্মে সরকারী ঘোষণা প্রচারিত হইল। এইরূপে বেগম সমরুর বহু আয়ের জাগীর দেখিতে দেখিতে মীরট জেলার অন্তর্ভুক্ত হইয়া গেল ; ১৮৩৪ খ্রীষ্টাব্দে ভারত-গভর্নমেন্টের আদেশানুসারে বেগমের পুলিশ ও রাজস্ব বিষয়ের ব্যবস্থা ম্যাজিষ্ট্রেট হ্যামিলটন সাহেবের উপর হস্ত হইল।

“পরলোকগত বেগমের সমস্ত জাগীর ইংরেজ-গভর্নমেন্ট প্রাপ্ত হইলেন ; বেগমের প্রায় অর্ধকোটির মুদ্রার সম্পত্তি উইল অনুসারে ডাইম্ সোম্বার প্রাপ্ত হইলেন। বেগম অশ্রান্ত বিষয়ের জ্ঞান ও বহুদান করিয়া গিয়াছিলেন।”

অবলা রমণী হইয়া, রাজনৈতিক গগনে উজ্জল জ্যোতিষ্কের স্থায় আভা বিকীরণ করিয়া—মুসলমান, মহারাষ্ট্র ও ইংরেজজাতির সহিত রাজনৈতিক ক্ষেত্রে স্বাধীনভাবে বিচরণ করিয়া—দুর্দীর্ঘ বিজাতীয় সেনাপতিগণের চক্রান্ত সকল ভেদ করিয়া, যে মহীয়সী মহিলা ভারতবর্ষের ঘোর দুর্দিনেও শান্তি সংস্থাপিত করিতে সমর্থ হইয়াছিলেন, তিনি সামান্য স্ত্রীলোক ছিলেন না। নারীজনশুলভ চপলতা তাঁহাতে ছিল না—ছিল দৃঢ়প্রতিজ্ঞ কন্মপটু সরলপ্রাণ—ছিল আপনার প্রতি অটল বিশ্বাস—ছিল স্থায় ও ধর্মের

প্রতি অনুরাগ—সর্বোপরি ছিল প্রজার মনোরঞ্জন করিবার ইচ্ছা ; এবং কিসে তাহাদের উন্নতি হয়, তাহার জন্য অক্লান্ত চেষ্টা। বেগম সমরু বুঝিয়াছিলেন, প্রজার স্বার্থ ও রাজার স্বার্থ অভিন্ন, প্রজার উন্নতি—রাজ্যের উন্নতি—প্রজার সুখে রাজার সুখ। যখন তিনি বুঝিলেন ইংরেজের সহিত সখ্যতাসূত্রে আবদ্ধ না হইলে রাজ্যের শান্তি সুদূর-পর্যন্ত, তখন তিনি সন্ধিস্থাপনে ব্যগ্র হইয়াছিলেন এবং আমরণ সেই সন্ধি অটুট রাখিয়াছিলেন।

এ হেন ভারতীয় রমণীর সুখদুঃখময় জীবন-নাট্যের ঘটনাবলী যে অদ্ভুত ও বিস্ময়কর, তাহাতে আর সন্দেহ নাই। উপযুক্ত ক্ষেত্রে পড়িলে যে তিনি পৃথিবীর ইতিহাসে বরণীয় আসন গ্রহণ করিতে পারিতেন, একথা মুক্তকণ্ঠে স্বীকার করিতে হইবে। এইজন্যই মেজর আর্চার লিখিয়াছেন :—“She has, through a long life, maintained her station and security among a host of contending powers, and may bear the honour of a similarity of character with our Elizabeth.” যে অন্তর্নিহিত শক্তি বেগমের মধ্যে থাকিয়া কার্য করিতেছিল, তাহা উচ্চাঙ্গের—স্থান, কাল ও শিক্ষা-শুণে তাহার প্রসার আরও বর্ধিত হইতে পারিত।

দশম অধ্যায়

দানব্রত ; বিষয়-সম্পত্তি ; উত্তরাধিকারী

বেগম সমরু মৃত্যুকালে প্রভূত ধন-সম্পত্তি রাখিয়া যান। ইহার অধিকাংশ, নগদ প্রায় ৬০ লক্ষ টাকা, তাঁহার সপত্নীপুত্রের দৌহিত্র ডাইন্স সোম্বার পাইয়াছিলেন। মৃত্যুর পূর্বে দেব-সেবা ও মানব-সেবার জন্ত বেগম যথেষ্ট অর্থ দান করিয়া গিয়াছিলেন। বেকন্ লিখিয়াছেন :—

“She is, as a public character, notoriously generous, when called upon to loosen her purse-strings, distributing freely to the indigent, and in no instance refusing her aid in the construction or benefit of any public institution.” নিম্নে আমরা তাঁহার কয়েকটি দানের তালিকা দিলাম :—

১। সার্ধানাস্থ গীর্জার সংস্কার ও অগ্রাণ্ড আবশ্যক
ব্যয়নির্বাহের জন্ত ... ১০০,০০০

- ২। ভারতে রোমান্ ক্যাথলিক্ ধর্ম-প্রচারকদিগের শিক্ষার্থ একটি কলেজের জন্ম ... ১০০,০০০\
- ৩। স্থানীয় দরিদ্রদিগের সাহায্য-ভাণ্ডার সংস্থাপনের জন্ম ... ৫০,০০০\
- ৪। মাদ্রাজ, বোম্বাই ও কলিকাতার রোমান্ ক্যাথলিক্ প্রচারমণ্ডলীর জন্ম . ১০০,০০০*
- ৫। আগ্রার রোমান্ ক্যাথলিক্ প্রচারমণ্ডলীর জন্ম ... ৩০,০০০\
- ৬। রোমান্ ক্যাথলিক্দিগের জন্ম বেগম মীরাতে যে গীর্জা সংস্থাপন করেন, তাহার আবশ্যক ব্যয়-নির্বাহের জন্ম ... ১২,০০০\
- ৭। রোমের পোপকে তাঁহার ইচ্ছামত সংকল্পে ব্যয়ের জন্ম ... ১৫০,০০০\
- ৮। ক্যান্টারবেরীর আর্চ বিশপ্কে সংকল্পে ব্যয়ের জন্ম ... ৫০,০০০\
- ৯। কলিকাতার দরিদ্রদিগের সাহায্যের জন্ম, এবং যে সমস্ত লোক ধনজালে জড়িত হইয়া জেলে যাইতেছে, তাহাদিগের উদ্ধারকল্পে ... ৫০,০০০\
- ১০। কলিকাতার দরিদ্র প্রোটেষ্ট্যান্ট-বালকদিগের শিক্ষার ব্যবস্থার জন্ম কলিকাতার বিশপ্কে ১০০,০০০\



এতদ্ব্যতীত বেগম সার্থানার বিশপ্ জুলিয়াস্ সিল্ভারকেও কয়েক সহস্র মুদ্রা দান করিয়াছিলেন। বেকন্ লিখিয়াছেন, বেগম তাঁহার রাজ-চিকিৎসক ডাক্তার ডেভারকে ২০ হাজার; তাঁহার উত্তরাধিকারীর ভগ্নীদ্বয়ের স্বামী ট্ৰপ্ ও সোলারোলীকে যথাক্রমে ৫০ হাজার ও ৮০ হাজার; এবং স্কুলশাস্ত্রী কৰ্মচারীকেও বহু অর্থ দান করিয়াছিলেন।

Atkinson বলেন—বেগম হিন্দু ও মুসলমান-সম্প্রদায়ের হিতার্থে বহু অর্থ দান করিয়াছিলেন।

ধর্মতত্ত্ব-বিষয়ে বেগমের উদারতার দৃষ্টান্তের অভাব নাই। তিনি Church of Englandএ যে অর্থদান করিয়াছিলেন, তাহা কলিকাতায় “বেগম সমরু ভাণ্ডার” নামে পরিচিত। ইহার তত্ত্বাবধানভার কলিকাতার বিশপের উপর গৃহ্য।

‘বেগম সমরু ভাণ্ডার’ সম্বন্ধে ১৮৩৮ খ্রীষ্টাব্দের ৮ই মার্চ তারিখের *Friend of India* পত্র P. 90-91 *Christ Intelligencer* হইতে এই অংশটুকু উদ্ধৃত হইয়াছিল :—

BEGUM SOMBRE'S FUND :—

On 31st. January last, the Lord Bishop and the Archdeacon distributed Rs2000/- from this Fund to the most necessitous poor in

Calcutta, and relieved thirty-four individuals from imprisonment for small debts. The portion of this Fund devoted to Missionary purposes, yields about Rs 400/- monthly. It is devoted at present to the maintenance of a Native Missionary, and of several Natives preparing for instructors to their countrymen at Bishop's College.

অর্থাৎ—“গত ৩১এ জানুয়ারী (১৮৩৮) লর্ড বিশপ্ ও আর্চডিকন্ এই “বেগম সমরু ভাণ্ডার” হইতে দুই হাজার টাকা কলিকাতার একান্ত অভাবগ্রস্ত লোকদিগের মধ্যে বিতরণ করিয়াছেন, এবং যাহারা অল্প টাকার ঋণদায়ে জেলে যাইতেছে, এরূপ ৩৪ জন লোক ঐ টাকার দ্বারা ঋণ পরিশোধ করিয়া অব্যাহতি লাভ করিয়াছে। এই ভাণ্ডারের যে অংশ মিশনরীদের জন্ত নির্দিষ্ট আছে, তাহা হইতে মাসিক চারি শত টাকা আয় হইয়া থাকে। ইহার সাহায্যে এক্ষণে একজন দেশীয় মিশনরী এবং বহু দেশীয় লোক, যাহারা স্বদেশে প্রচার-কার্যের জন্ত বিশপ্ কলেজে শিক্ষিত হইতেছে, তাহাদের ভরণপোষণ নির্বাহ হইতেছে।”

কেমন করিয়া বেগম সমরুর জাগীর ও ধনরাজি ছত্র-

ভঙ্গ হইয়াছিল,—কেমন করিয়া তাঁহার দুর্ভাগ্য উত্তরা-
ধিকারী বিপুল ধনরাশির অধিকারী হইয়া, উচ্চাকাঙ্ক্ষার
বশে, জীবনে এক সম্ভ্রান্ত ইংরেজ-মহিলাকে বিবাহ করিয়া,
পরিণামে আপনার এই ভুলের জন্ত আমরণ বিলাপ করিয়া-
ছিলেন,—তাঁহার বিবরণ বেগমের জীবন-কাহিনী
অপেক্ষাও অদ্ভুত। আমরা সংক্ষেপে তাহা এস্থলে বিবৃত
করিতেছি :—

সমরুর প্রথম স্ত্রীর গর্ভজাত পুত্র জাফর-ইয়াব্
(ব্যাল্থাজার বীন্হাড) কাপ্তেন Le Fevreএর কন্যা
জুলিয়া এন্কে বিবাহ করেন। এই বিবাহের ফলস্বরূপ
এলয়সিয়াস্ নামে এক পুত্র, এবং ১৭৮৯ খ্রীষ্টাব্দের নভেম্বর
মাসে জুলিয়া এন্ নামে এক কন্যার জন্ম হয়। ১৮০৩ খ্রীষ্টাব্দে
পিতার মৃত্যুর পূর্বেই পুত্রটির অকালমৃত্যু ঘটিয়াছিল। কন্যা
জুলিয়া এনের সহিত ১৮০৬ খ্রীষ্টাব্দে বেগমের সম্পত্তির
তত্ত্বাবধায়ক কর্নেল ডাইসের বিবাহ হয়। ডাইসের অনেক-
গুলি পুত্রকন্যা জন্মিয়াছিল; তন্মধ্যে কয়েকটির শৈশবে মৃত্যু
হয়। কর্নেল ডাইস-পত্নীর মৃত্যুর পর (১৩ই জুন ১৮২০)
তাঁহার জীবিত এক পুত্র ও দুই কন্যাকে বেগম সমরু স্বীয়
পুত্র-কন্যাজ্ঞানে আদর যত্নে লালনপালন করেন। কন্যাটির
অর্জিমানা ও এনা মেরিয়া বরোপ্রাপ্ত হইলে, ১৮৩১

খ্রীষ্টাব্দের ৩রা আগষ্ট যথাক্রমে সোলারোলী (Solaroli) নামে একজন ইতালীয় ও ট্রুপ্ (Troup) নামে একজন ইংরেজের সহিত পরিণীতা হয়। জর্জিয়ানা ও মেরিয়া উভয়েই বিবাহকালে বেগমের নিকট হইতে বহু মূল্যবান যৌতুক লাভ করিয়াছিলেন। কর্নেল ডাইসের পুত্রটি (সমরুর প্রপৌত্র) ডেভিড্ অক্টারলোনী ডাইস্ সোম্বার নামে অভিহিত। ১৮০৮ খ্রীষ্টাব্দের ৮ই ডিসেম্বর তাঁহার জন্ম হয়। বেগম সমরু ইঁহাকেও লালনপালন করেন, এবং মৃত্যুকালে তাঁহাকেই উত্তরাধিকারী করিয়া যান।

বেগমের মৃত্যুর কয়েক বৎসর পরেই ডাইস্ সোম্বার বিলাত গমন করিয়াছিলেন, এবং ১৮৪০ খ্রীষ্টাব্দের ২৬এ সেপ্টেম্বর ভাইকাউন্ট সেন্ট ভিন্সেন্টের কন্যা মেরী এন্ জারভিস্কে বিবাহ করেন। ভারতে অবস্থানহেতু, এতদেশীয় লোকের গ্রাম রমণীজাতি সম্বন্ধে তাঁহার ধারণা ছিল। সাধারণ আচার-ব্যবহার বশে তাঁহার স্ত্রীর অপরাপর লোকের সহিত সামাজিক-মিলন সোম্বার ভাল চক্ষে দেখিলেন না। স্ত্রীর আচরণ যে, আদর্শ-পত্নীর সম্পূর্ণ বিরোধী, একথা একদিন তিনি পত্নীকে জানাইলেন। তাঁহার স্ত্রী, স্বামীর এই উদ্ভট আচরণে, তাঁহাকে মস্তিষ্কবিকৃত স্থির করিয়া উন্মাদাগারে প্রেরণ করিবার

ব্যবস্থা করিলেন। ডাইন্স সোম্বার এ কথা পূর্বাঙ্কে গোপনে জানিতে পারিয়া ফ্রান্সে পলায়ন করিলেন; তথায় তিনি তাঁহার বিপুল সম্পত্তি হইতে প্রাপ্ত বৃত্তির সাহায্যে জীবন-ধারণ করিতেন। প্যারিসে অবস্থানকালে ১৮৪৯ খ্রীষ্টাব্দে তিনি একখানি পুস্তক রচনা করেন। পুস্তকখানির নাম—
“A refutation of the Charges of Lunacy brought against him in the Court of Chancery.”

পুস্তকখানি ৫৮৯ পৃষ্ঠায় সম্পূর্ণ; যে-কোন লোকের পক্ষে ইহা পাঠ করা দুর্লভ, এবং পাঠ করিলে পাঠকেরা গ্রন্থকারকে উন্মাদরোগগ্রস্ত ব্যতীত আর কিছুই বলিবেন না।

১৮৫১ খ্রীষ্টাব্দের ১লা জুলাই প্যারিসে (?) ডাইন্স সোম্বারের মৃত্যু হয়। মৃত্যুর ১৬ বৎসর পরে, ১৮৬৭ খ্রীষ্টাব্দের আগষ্ট মাসে, তাঁহার মৃতদেহ সাধনায় আনীত হইয়া বেগম সমরুর পাশে সমাহিত করা হয়। ডাইন্স সোম্বারের কোন সন্তান-সন্ততি ছিল না; তাঁহার মৃত্যুর পর তাঁহার বিধবা লর্ড ফরেস্টারকে বিবাহ করেন।

বেগম সমরুর মৃত্যুর পর সরকার তাঁহার জাগীর বাজেয়াপ্ত করেন। তাঁহার উত্তরাধিকারী ডাইন্স সোম্বার সরকার বাহাদুরের সহিত বহু মোকদ্দমা করিয়া শেষে প্রাসাদ ও তৎসংলগ্ন ভূমি ফেরৎ পাইয়াছিলেন। লেডি

ফরেষ্টার যতদিন জীবিতা ছিলেন, ততদিন এই প্রাসাদ ও প্রাসাদলগ্ন ভূমি রক্ষা করিয়া আসিতেছিলেন ; তাঁহার মৃত্যু হইলে (১৮৯৩ খ্রীষ্টাব্দে ?) আগ্রার ক্যাথলিক-সম্প্রদায় ১৮৯৭ খ্রীষ্টাব্দের প্রারম্ভে ২৫,০০০ টাকা দিয়া প্রাসাদ ও তৎসংলগ্ন উদ্যান নীলামে ক্রয় করেন। এক্ষণে তথায় দেশীয় খ্রীষ্টানদিগের অনাথাশ্রম স্থাপিত হইয়াছে।

হায় ! অদৃষ্টের কি ঘোর বিড়ম্বনা ! একজন ভারতীয় মহিলার ধনরাজি ও বিষয়-সম্পত্তি—যাহা এক সময়ে তরবারি-সাহায্যে বহু যুদ্ধে ও নানা প্রকার কৌশলে অর্জিত হইয়াছিল—তাহা উত্তরাধিকারসূত্রে পাইলেন কি না একজন ইংরেজ-রমণী—যিনি কখনও ভারতের মৃত্তিকাতে পদার্পণ করেন নাই ! আর সার্থানার প্রাসাদ—যথায় এক সময়ে উৎসব-আনন্দের স্রোত বহিত—সামরিক সভা বসিত—কত না মন্ত্রণা চলিত ;—যেখানে কত দীনদরিদ্রের অভাব পূর্ণ হইত, কত ক্ষুধার্তের ক্ষুন্নবৃত্তি হইত, কত অনাথ আশ্রয়লাভ করিত, তথায় এক্ষণে কাকাতুয়ার বিকট চীৎকার, আর নিকটবর্তী মীরাট দুর্গের আমোদ-প্রমোদে রত সৈন্যবর্গের হাস্যধ্বনির প্রতিধ্বনি মাত্র শুনা যায় !! সার্থানার সুখসমৃদ্ধি বেগম সমরুর অন্তিম নিঃশ্বাসের সঙ্গে সঙ্গেই চিরদিনের জন্য অন্তর্হিত হইয়াছে। এখন

সার্থানার কথা ভাবিতে ভাবিতে মনে পড়ে অমরকবি
মাইকেলের :—

“কুমুম-দাম-সজ্জিত দীপাবলী তেজে
উজ্জলিত নাট্যশালা সম রে আছিল
এ মোর সুন্দর পুরী! কিন্তু একে একে
শুধাইছে ফুল, এবে নিবিছে দেউটী!”

একাদশ অধ্যায়

রোমে বেগমের স্মৃতিপূজা ;

সার্দানার স্মৃতিস্তম্ভ

১৮৩৯ খ্রীষ্টাব্দে ডাইস্ সোম্বার রোম নগরীতে ছিলেন । তিনি তথাকার সান্ কারলোর (San Carlo) ধর্মমন্দিরে, বেগম সমরুর পদোচিত সমারোহ-সহকারে, তাঁহার তৃতীয় বাৎসরিক উৎসব উপলক্ষে এক বিরাট শোকসভা করেন । এই সভায় বহুলোকের সমাবেশ হইয়াছিল । তৎকালীন রোমের ইংলিশ কলেজের অধ্যাপক, রেভারেণ্ড ডাক্তার ওয়াইজম্যান্ (Dr. Wiseman) এক দীর্ঘ শোকসূচক বক্তৃতা করেন । তাহার কিয়দংশ আমরা নিম্নে প্রদান করিলাম :—

Funeral Oration on Her Highness The Begum Sombre of Sardhana. Delivered on the 27th. January, 1839, By the Very Revd.

N. Wiseman, D. D., Rector of the English College, Rome.

* * *

Who is it that, this morning, hath called us together ? Is it some noble of the land ? One of its sacred princes whose anniversary his friends and family recall to the piety of the faithful ? Or is it some distinguished stranger, who, having travelled to this Holy City, has in it found a grave ? No, it is one whom no social or political ties connected with us, for whom neither the circumstances of her life, nor of her family would, in a worldly estimate, have procured the celebration here of such solemn obsequies. She was indeed a princess ; but many thousands of miles separated her dominions and her interests from Rome. A wide expanse of sea, a wearisome breadth of trackless desert.

chains of huge mountains, many kingdoms and various tongues interposed between her and us, seeming to forbid all sympathy, much more all intercourse for any common cause.

But a holier connection than the ordinary bands of human friendship joined her, in spite of distance, with this Apostolic See. Her principality formed one of those very remote points on which the rays, darted from this Centre of Catholic Unity, rested to form churches intimately united with this their Mother. Having embraced the catholic religion, the Princess devoted herself to it its maintenance and glory with earnestness and zeal. In her house the venerable Fathers of the Thibetan mission found a home, and every opportunity of discharging their duties. She indeed could say with truth, "Lord, I have

loved the glory of thy house." For she erected a temple of the True God, on a scale of grandeur, unrivalled in modern times in those countries ; she lavished upon it all the magnificence, and beauty which native art, generously encouraged, could contribute to its embellishment ; she furnished it with everything necessary for the performance of divine worship upon a princely scale ; and she had the satisfaction of seeing it consecrated and opened, and of submitting to the Holy Father, the plans and drawings of her cathedral before she closed her days. His letters, and the valuable tokens of approval which accompanied them, reached her but a short time previous to her death. Nor did she allow the end of her life, which happened just two years ago, to cut short her pious intentions. A College, established at Sardhana, and en-



dowed by her, will serve to perpetuate her name, and two millions of francs, bequeathed for charitable purposes, will secure her the prayers and blessings of thousands in distress.

And now do we meet here, the extremes of earth to join our voices with theirs, and, in the spirit of religious unity, and in the words of the ancient church, entreat the mercy of God, that "whatever debt she may, through human frailty, have contracted, his compassionate indulgence will forgive." That harbour which she living, gave, to the preachers of God's truth, Rome, that sends them, now repays to her departed spirit, begging that God will give it refreshment, if not yet attained, His mansions of bliss, that submissive and filial obedience, which, when on earth, she paid to the See of Peter, this now gives back

in paternal benedictions, and fervent supplications to the Throne of Mercy.

* * *

The Princess, whom we commemorate at God's altar, was powerful in her day ; she ruled her dominions with more than woman's arm : she feared not the turmoils and dangers of war, she guided with skill the arduous counsels of peace ; by many she was beloved, by others feared.

সাদানার প্রাসাদমধ্যস্থ অভ্যর্থনা-গৃহগুলির মধ্যে বীচী, মেল্ভিল্ প্রভৃতি খ্যাতনামা চিত্রকরের অঙ্কিত বেগমের আত্মীয়-বন্ধুবান্ধবের চিত্র ছিল ; তন্মধ্যে—সার ডেভিড্ অক্টারলোনী, জেনারেল কার্টরাইট্, ব্যারন্ সোলোরোলী, কর্নেল ট্রুপ্, জর্জ্ টমাসের পুত্র জন্ টমাস্, ডাক্তার ড্রেভার ও শিশু ডাইস্ সোম্বারের চিত্র উল্লেখযোগ্য। অপর একখানি চিত্রে অঙ্কিত ছিল—লর্ড কোম্বারমিয়ার এবং বেগম সমরু ভরতপুর-পতনের পর (১৮২৬ খ্রীষ্টাব্দ) মিলিত হইতেছেন। প্রাসাদের মধ্যস্থলের হলঘরে, বেগমের বৃদ্ধ বয়সের একখানি সুন্দর চিত্র ছিল—

বেগম সমরু মূল্যবান্ উচ্চাসনে বসিয়া ধূমপান করিতেছেন । এই চিত্রখানি মেলভিলের (Melville) অঙ্কিত ; আমরা ইহার প্রতিকৃতি প্রদান করিলাম । ১৮৯৬ খ্রীষ্টাব্দে প্রাসাদ নীলামে বিক্রীত হইবার অনতিকাল পূর্বে লেডি ফরেষ্টারের এজেন্ট এই উৎকৃষ্ট চিত্রগুলি সাধানার প্রাসাদ হইতে স্থানান্তরিত করেন । বর্তমানে ইহা এলাহাবাদ গভর্ণমেন্ট হাউসে শোভা পাইতেছে ।

সাধানায় বেগমের ভজনালয়ের মধ্যে প্রধান দ্রষ্টব্য বস্তু—জয়পুর হইতে আনীত বহুমূল্য প্রস্তরনির্মিত সু-উচ্চ বেদী এবং বেগমের স্মৃতিস্তম্ভ ।

ক্যারারা মন্দিরপ্রস্তরে রোমে নির্মিত বেগমের স্মৃতি-স্তম্ভ অতি অপূর্ব ; ইহা ১৮৫২ খ্রীষ্টাব্দে সাধানার সংস্থাপিত হয় । স্তম্ভশীর্ষে দেশীয় পরিচ্ছদ-ভূষিতা বেগম সমরু উপবিষ্ট ; তাঁহার দক্ষিণ হস্তে, সাধানা-জাগীর-প্রদানের চিহ্ন—দিল্লীখর শাহ্ আলম্-প্রদত্ত ফর্মান্ । বেগমের দক্ষিণে, টুপিহস্তে ডাইস্ সোম্বার বিষণ্ণবদনে, স্তম্ভের উপর হস্ত গুস্ত করিয়া দণ্ডায়মান ; বেগমের বামে তাঁহার মন্ত্রী দেওয়ান রায় সিংহ ; পশ্চাতে বিশপ্ জুলিয়াম্ সিজর ও বেগমের অশ্বারোহী সৈন্তের সেনাপতি এনারেতুলা । এই মূর্তিগুলি পূর্ণাবয়ব ।

স্মৃতিস্তম্ভের নিম্নে, স্তম্ভগাত্রে বেগমের জীবনের তিনটি প্রধান ঘটনা চিত্রিত :—

সম্মুখের ফলকে—সার্থানার ধর্মমন্দির-প্রতিষ্ঠাকালের দৃশ্য ; বেগম সার্থানার বিশপ্কে একটি সুবর্ণপাত্র অর্পণ করিতেছেন ; বিশপ্ বসিয়া আছেন,— তাঁহার সহিত অপর দুইজন ধর্মযাজক ; বেগম্ চারিজন ইউরোপীয় কর্মচারি-পরিবেষ্টিতা হইয়া বিশপ্কে সুবর্ণপাত্র দিবার জন্ত অগ্রসর হইতেছেন ।

স্মৃতিস্তম্ভের দক্ষিণ দিকে—বেগমের দরবার ও বামদিকে হস্তীর উপর আকড়া বেগমের শোভা-যাত্রার চিত্র ।

এতদ্ব্যতীত বেগম সমরুর স্মৃতিস্তম্ভে আরও ছয়টি রূপক-মূর্তি আছে :—

ডাইম্ সোম্বারের নিম্নমূর্তি—সাহস এবং সাহিস্রুতা । একজন নির্ভীক রমণী, অবিচলিত হৃদয়ে, সিংহের উপর দণ্ডায়মান ।

দ্বিতীয় মূর্তি প্রজ্ঞা—এক অবগুষ্ঠিতা রমণী, দক্ষিণ হস্তে একটি সর্প ধরিয়া, গভীর চিন্তামগ্ন অবস্থায় দণ্ডায়মান ।

তৃতীয় মূর্তি কাল—এক স্বর্গীয় দূত বালুকার ঘটিকা-যন্ত্র হস্তে বেগমকে সময় দেখাইতেছে ; দক্ষিণহস্তে

মশাল নিবাইবার ছলে, জীবন-দীপ নির্বাণের সূচনা করিতেছে।


স্মৃতিস্তম্ভের বামদিকস্থ প্রথম মূর্তি—
মাতৃস্নেহ। একজন রমণী অসীম স্নেহে শিশুপুত্রকে
বক্ষে লইয়া দণ্ডায়মান ; বালক প্রতিদানে, মাতৃস্নেহের
ফলস্বরূপ, একটি আপেল জননীকে অর্পণ করিতেছে।

দ্বিতীয় মূর্তি—প্রাচুর্য্য। উল্লসিত-বদনে একজন
রমণী নানা ফল ও শস্যপূর্ণ Cornucopia-হস্তে দণ্ডায়মান
হইয়া বেগমকে পুষ্পগুচ্ছ উপহার দিতেছে।

তৃতীয় মূর্তি—বিষাদ। বিষাদ মূর্তিমান্ হইয়া
স্তম্ভপাদমূলে উপবিষ্ট।

বেগমের স্মৃতিস্তম্ভে, একদিকে ইংরেজীতে, অপরদিকে
ল্যাটিনে, নিম্নলিখিত খোদিত-লিপিটি দেখিতে পাওয়া
যায় :—

“Sacred to the memory of Her Highness
Joanna Zibalnessa, the Begum Sombre,
styleed the distinguished of nobles and beloved
daughter of the State, who quitted a transitory
court for an eternal world, revered and
lamented by thousands of her devoted subjects,



at her palace of Sirdhanah, on the 27th of January, 1836, aged ninety years. Her remains are deposited underneath, in this Cathedral built by herself. To her powerful mind, her remarkable talent, and the wisdom, justice and moderation with which she governed for a period exceeding half a century, he to whom she was more than a mother is not the person to award the praise, but in grateful respect to her beloved memory is this monument erected by him who humbly trusts she will receive a crown of glory that fadeth not away.

DAVID OCHTERLONY DYCE SOMBRE. ”

বেগম সমরু এই ভজন-মন্দিরে অনেকগুলি মূল্যবান দ্রব্য দান করিয়া গিয়াছেন ; ইহা অত্যাধিক তথায় সংরক্ষিত রহিয়াছে । তন্মধ্যে সুবর্ণনির্মিত বহুমূল্য প্রস্তররাজি-বিহীন পানপাত্র, সার্বানার বিশপের একটি ক্রুসযুক্ত দণ্ড (Crozier), রৌপ্যনির্মিত পূত পানপাত্র, ইত্যাদি উল্লেখযোগ্য । বেগমের মৃত্যুর অনতিকাল পূর্বে রোমের পোপ

গ্রেগরী (Gregory XVI) স্নেহ ও বাৎসল্যের চিহ্ন-
স্বরূপ পত্রসহ বেগমকে বহু সাধুদিগের দেহাবশেষ-রক্ষিত
দুইটি পাত্র (Reliquaries) ও অগ্ন্যাগ্ন মূল্যবান্ দ্রব্য
পাঠাইয়াছিলেন ; তাহাও মন্দিরে শোভা পাইতেছে ।
বড় পাত্রটির উপর খোদিত আছে :—

“Gregorius XVI. Pont. Max. Johannaë
Sumrou Begum, Principi Sirdhunensi Piaë
Liberali Benemerenti, MDCCCXXXIV”

ধর্ম্মমন্দিরের কয়েক হস্ত দূরেই সেন্ট জন্স কলেজ ।
এক সময়ে বেগম সমরু এইস্থলে অবস্থান করিতেন ;
পরে যাজকদিগের শিক্ষার্থ শিক্ষাগাররূপে তিনি ইহা
Capuchin Fatherগণকে অর্পণ করিয়াছিলেন ; এক্ষণে
ইহা মাতাপিতৃহীন দেশীয় গ্রীষ্টান বালকবালিকাদিগের
আশ্রয়রূপে ব্যবহৃত হইতেছে ।

দ্বাদশ অধ্যায়

সুশাসন ; চরিত্র

বেগম সমরুর জীবনকথা শেষ হইল। তাঁহার শ্রীর মহিমসী মহিলার জীবন নানা ঘটনা-পরম্পরার ঘাত-প্রতি-ঘাতে কেমন করিয়া গঠিত হইয়াছিল, তাহা এই জীবন-কাহিনী পাঠ করিলেই বুঝিতে পারা যায়। যিনি শৈশবে বৈমাত্রেয় ভ্রাতার নির্যাতনে নিঃস্বল অবস্থায় মাতার সহিত গৃহত্যাগ করিতে বাধ্য হইয়াছিলেন, নিতান্ত নিরাশ্রয়ভাবে দিল্লীতে আগমন করিয়া, দীনভাবে শৈশবকাল অতিবাহিত করিয়াছিলেন, তাঁহার জীবনে কি অভাবনীয় ব্যাপারই না সংঘটিত হইয়াছিল। অতি হীন অবস্থা হইতে ঐশ্বৰ্য্যের উচ্চতম শিখরে আরোহণ করিবার দৃষ্টান্ত ইতিহাসে বিরল নহে ; কিন্তু এত বিপদ এত বিপ্ল, এত অবস্থা-বিপর্যয় বহুলোকের ভাগ্যেই ঘটে নাই। আরও একটা কথা, যে সময়ে বেগম সমরু ভারতের নাট্যশালার অভিনয় করিয়া

গিয়াছেন, সে অতি ভয়ানক বিপ্লবের সময়। তখন 'জোর যার, মুল্লুক তার' ছিল। সেই সময়ে একটা দেশীয় মহিলা বিপুল বাধাবিঘ্ন অতিক্রম করিয়া, ধনজনপূর্ণ বিশাল রাজ্য স্থাপন করিয়াছিলেন, তরবারি-হস্তে সৈনিকদিগকে প্রোৎসাহিত করিয়া যুদ্ধক্ষেত্রে অগ্রসর হইয়াছিলেন, একথা চিন্তা করিলেও বিস্মিত হইতে হয়। যে সময় ভারতভূমি ইউরোপীয় দুর্কিৰ্ষ বীরবৃন্দের স্বার্থ-সাধনের লীলাক্ষেত্র—যে সময় একদিকে সিন্ধিয়া, অন্যদিকে ইংরেজ, অপর একদিকে একদল অর্থলোলুপ বিদেশীয় বীর স্বর্ণপ্রসূ ভারতে আধিপত্য বিস্তারের জন্ত বিপুলবিক্রমে অবতীর্ণ—যে সময়ে দেশের চারিদিকে বিদ্রোহাগ্নি প্রজ্বলিত—সেই সময়ে একজন মহিলা সর্ধানার স্থান স্থানে, বিপদ্রাশি অতিক্রম করিয়া নিজ প্রভুত্ব-সংরক্ষণে কৃতকার্য হইয়াছিলেন,—ইহা অসীম শক্তির পরিচায়ক, অননুসাধারণ বীর্যবত্তা, প্রথর তীক্ষ্ণবুদ্ধি ও অসীম শাসনক্ষমতার জলন্ত নিদর্শন! এইজন্য ঐতিহাসিক Francklin লিখিয়াছেন :—“Endowed by nature with masculine intrepidity, assisted by a judgment and foresight clear and comprehensive, Begum Somroo, during the various revolutions was enabled to preserve her

country unmolested and her authority unimpaired. ”

বেগম সমরুর কার্যাবলী পুঙ্খানুপুঙ্খরূপে আলোচনা করিলে দেখিতে পাওয়া যায় যে, অধিকাংশস্থলেই তিনি প্রাণের অদম্য আবেগভরে কার্য করিয়াছেন । সূক্ষ্ম বিচার-বুদ্ধির প্রেরণায় চালিত না হইয়া যে স্থানে তিনি কার্য করিয়াছেন, সেস্থলে আমরা তাঁহার সহিত একমত না হইলেও, একথা মুক্তকণ্ঠে স্বীকার করিব যে, তাঁহার উদ্দেশ্য অধিকাংশস্থলেই সাধু ছিল । তিনি যাঁহাদের সংশ্রবে আসিয়াছিলেন, তাঁহারাি একবাক্যে বলিয়াছেন যে, তাঁহার গ্রাম দয়ালীলা রমণী বড়ই বিরল—তিনি মূর্ত্তিমতী দয়া ছিলেন বলিলেও অত্যাুক্তি হয় না । পাত্ৰাপাত্ৰ বিবেচনা না করিয়া, তাঁহার করুণাবারি অজস্রধারে বর্ষিত হইত ; পরদুঃখকাতরা বেগমের প্রাণে সমবেদনার উৎস সদাই উৎসারিত হইত । তিনি অকাতরে দুঃস্থ ও অভাবগ্রস্তকে সাহায্য করিয়া তাহাদের শুভকামনা অর্জন করিয়াছিলেন, এবং এই গুণেই তিনি ভারতের ইতিহাসে বরণীয় ও স্মরণীয় হইয়া আছেন ।

বুদ্ধিমতী বেগম সমরু বিচক্ষণতার সহিত কার্য করিতেন । পুরুষোচিত সাহস ও মনের দৃঢ়তা তাঁহার ছিল ।

সুন্ম্যান সাহেব লিখিয়াছেন যে, বেগমের সহিত ঘনিষ্ঠভাবে-সম্পর্কিত বহু দেশীয় ও ইউরোপীয় লোক তাঁহাকে বলিয়াছেন :—

“Though a woman and of small stature, her *Rooab* (dignity, or power of commanding personal respect) was greater than that of almost any person they had ever seen.”

অর্থাৎ,—‘একে বেগম রমণী, তাহাতে দেখিতে ধর্মাকৃতি, তথাপি লোকের নিকট হইতে শ্রদ্ধাভক্তি আকর্ষণ করিবার ক্ষমতা তাঁহার মত কম লোকের ছিল।’

প্রজাবর্গ বেগম সমরুকে শ্রদ্ধা-ভক্তির চক্ষে দেখিত ; তাঁহার শাসনে প্রজারা ধনপ্ৰাণ-মানমর্যাদা নিরাপদ মনে করিয়া সুখে বাস করিত। তাঁহার জাগীরে কৃষিকর্মের বিশেষ ব্যবস্থা ছিল ; কৃষকের উন্নতিতেই দেশের কল্যাণ, একথা বেগম বেশ বুঝিতেন ; যে বৎসর কৃষির অবস্থা আশানুরূপ হইত না, বা কৃষকগণ অন্তর্কষ্ট অনুভব করিত, সে বৎসরে তাহারা অর্থসাহায্য পাইত।

১৮২৮ খ্রীষ্টাব্দের প্রারম্ভে মেজর আর্চার সার্ধানার গমন করিয়াছিলেন ; তিনি স্পষ্ট লিখিতেছেন :—“She has

turned her attention to the agricultural improvement of her country. * * * Her fields look greener and more flourishing, and the population of her villages appear happier and more prosperous than those of the Company's provinces. Her care is unremitting and her protection sure."

প্রজার মঙ্গলের জন্ত বেগম সর্বদা সচেষ্ট ছিলেন,—
 তাঁহার দ্বার দীন, দরিদ্র, অভাবগ্রস্তের জন্ত সর্বদা উন্মুক্ত
 থাকিত। এক কথায় বেগম সমরু প্রজার মা-বাপ ছিলেন।
 এই কারণে তাঁহার গায় দীনবৎসলা রমণীর মৃত্যুতে রাজ্যের
 সমস্ত নরনারীর কণ্ঠ হইতে অরুন্তুদ হাহাকার ধ্বনি উত্থিত
 হইয়াছিল—শোকমৌন-রাজ্য রাজশ্রী হারাইয়া বিমলিন
 হইয়াছিল।

দুঃখের বিষয়, কয়েকজন সংকীর্ণচেতা লেখক, ও ভ্রমণ-
 কারী (যথা হেবর্, ভিক্টর জেকুমন্ট প্রভৃতি) বা যাহারা
 দু'দশদিন সার্থানাম ভ্রমণ করিয়া, হয় ত বা বেগম-সাহেবার
 আতিথেয় চর্চাচুম্বলেহুপের উপভোগ করিয়াছেন, তাঁহারা
 দু'একজনের মুখের কাহিনীকে অপ্রাপ্ত সত্য বলিয়া বিশ্বাস
 করিয়া বেগমকে নিষ্ঠুরতার প্রতিমূর্তিরূপে চিত্রিত করিতে

কুণ্ঠিত হ'ন নাই। তাঁহারা নিম্নলিখিত ঘটনা হইতে ঐরূপ মন্তব্য প্রকাশ করিয়া থাকেন :—

১৭৯০ (?) খ্রীষ্টাব্দে মথুরায় সম্রাট সৈন্যশিবিরে অবস্থানকালে বেগম শুনিলেন যে, তাঁহার দুইজন ক্রীত-দাসী, তাঁহার আগ্রার আবাস-ভবনে অগ্নি-সংযোগপূর্বক, আপনাপন প্রেমাস্পদকে লইয়া পলায়ন করিয়াছে। আগ্রার এই আবাসে বেগমের বহু ধনরত্ন রক্ষিত ছিল এবং তাঁহার প্রধান কর্মচারীদিগের স্ত্রী-পুত্র-পরিবারবর্গও তথায় বাস করিতেছিল। পুথের বিষয়, অত্যন্ত সময়ের মধ্যে অগ্নি নির্বাপিত হওয়ার সকলেরই প্রাণরক্ষা হইয়াছিল। দাসী-দ্বয় আগ্রার বাজারে ধৃত হইয়া বেগমের শিবিরে নীত হয়। বিশেষ অনুসন্ধানে তাহাদের দোষ সপ্রমাণ হইলে, বেগম তাহাদিগকে নির্দয়ভাবে বেত্রাঘাত করিয়া, শিবিরের নিকটে তাহাদিগকে জীবিতাবস্থায় প্রোথিত করিবার আদেশ দেন। আবার কাহারও কাহারও মতে, এরূপ করিয়াও বেগমের তৃপ্তি হয় নাই; তিনি না কি স্বীয় শয়নকক্ষে দাসীদ্বয়কে জীবিত অবস্থায় কবর দিয়া তদুপরি সমস্ত রাত্রি শয়ন করিয়াছিলেন!

পূর্বেক্ত ঘটনা সত্যের নিকষ-পাথরে যাচাই করিবার কোনরূপ উপায় নাই; কিন্তু এ কথা সত্য, বেগম

দুষ্কৃতির শাসনার্থ সময় সময় অত্যন্ত কঠিন শাস্তির ব্যবস্থা করিতেন। বর্তমান সভ্যতা-যুগের দণ্ডনীতির সহিত তুলনা করিলে জীবিত অবস্থায় ভূগর্ভে প্রোথিত করা ভয়ানক নৃশংসতার পরিচায়ক বলিয়া অনেকেই মত প্রকাশ করিতে পারেন ; আমরাও এ প্রকার নিষ্ঠুর দণ্ডের কথা শুনিয়া শিহরিয়া উঠি। কিন্তু যে সময়ে এই নৃশংস দণ্ড বিহিত হইয়াছিল, তখন ইহার অপেক্ষাও অধিকতর নিষ্ঠুর দণ্ডের কথা আমরা ইতিহাসপাঠে অবগত হই। সে সময়ের অবস্থা বিবেচনা করিলে বেগম সমরুর এই দণ্ড-বিধানের বিরুদ্ধে কঠোর মন্তব্য প্রকাশ করা সমীচীন বলিয়া বোধ হয় না ; দেশকাল-পাত্রের পরিবর্তনে দণ্ড-নীতিরও পরিবর্তন হইয়াছে।

বর্তমান দণ্ডনীতির সহিত তাৎকালীন দণ্ডের বিচার করিলে কালব্যতিক্রম-দোষদৃষ্ট (anachronism) হইবে ; ইহা ঐতিহাসিকের পক্ষে গ্রহণযোগ্য নহে। এইজন্যই পণ্ডিতপ্রবর জর্জ তাঁহার *Historical Evidence* গ্রন্থে লিখিতেছেন :—

“Interpreting the past by the ideas of the present is, however, sure to pervert our judgment as to motives and character. We have

to guard against it first on our own account ; century by century knowledge accumulates, and the standard of morality changes.”

আর একটা কথা, যে সময়ে বেগম সমরু রাজ্যশাসন-ভার গ্রহণ করিয়াছিলেন, সে সময় তিনি যদি কোন গুরুতর অপরাধে অপরাধীকে ক্ষমা করিতেন, তাহা হইলে তাঁহার সে ক্ষমার মহিমা তাঁহার অশিক্ষিত, দুর্বিদিত সৈন্যগণ বুঝিতে পারিত না ; তাহারা এই ক্ষমাকে দুর্বলতা নামেই অভিহিত করিত ; এবং তখন তাহারা তাঁহার দুর্বলতার প্রশয় পাইয়া আরও দুর্বিদিত হইত ; তাঁহার পক্ষে রাজ্য রক্ষা করা একরূপ অসম্ভব হইত । বেগমের জীবনেই একবার এ সত্য প্রমাণীকৃত হইয়াছে । সাময়িক মোহে অন্ধ হইয়া তিনি লেভাসুলতকে বিবাহ করিয়া কি অনর্থেরই সৃষ্টি করিয়াছিলেন, এবং তাহার জন্ত তাঁহাকে কি লাঞ্ছনাই না ভোগ করিতে হইয়াছিল,—তিনি ত পথের ভিখারিণী হইয়াছিলেন—তাঁহার জীবন বিপন্ন হইয়াছিল ।

দুষ্টের দমন ও শিষ্টের পালনই রাজধর্ম । ঘোর বিপ্লবের সময় দুষ্টের কঠোর দণ্ডবিধান করাই দণ্ডনীতির অনুমোদিত ; কারণ দণ্ডের কঠোরতা দেখিয়া যেন অশাস্তকারীর মনে আতঙ্কের সঞ্চার হয় । কোন কোন

ইংরেজ-চারিত্রিক এই মত পোষণ করিয়া থাকেন; তাঁহাদের মতে “Punishment must have a deterrent effect.”

বেগম সমরু তাঁহার দাসীদ্বয়কে গুরুতর শাস্তি প্রদান করিয়া, ঐ প্রকৃতির লোকদিগকে বুঝাইয়া দিয়াছিলেন যে, দুষ্কার্যের কঠোর দণ্ডবিধান করিতে তিনি কখনই বিমুখ নহেন; রমণী হইলেও তিনি বজ্রকঠিন হস্তে শাসনদণ্ড গ্রহণ করিয়াছেন। এই সকল কথা বিশেষভাবে চিন্তা করিয়াই সিয়ামানের ঞ্চায় দূরদর্শী ইংরেজ ঐতিহাসিক স্পষ্টভাষায় বলিয়াছেন :—

“I am satisfied that the Begam believed them guilty and that the punishment, horrible as it was, was merited. It certainly had the desired effect. My object has been to ascertain the truth, and to state it, and not to eulogise or defend the old Begam.”

আর একটি ঘটনার কথা এইস্থানে পুনরুল্লেখ করা প্রয়োজন মনে করিতেছি। এই ঘটনা হইতে বেগমের চরিত্রের একটি অংশ পরিস্ফুট হইবে।

পূর্বেই উল্লিখিত হইয়াছে যে, জর্জ টমাস্ অপমানের

পশরা মস্তকে লইয়া বেগমের কন্ঠ ত্যাগ করিয়া গিয়া-
ছিলেন। লেভামুলতের মৃত্যুর পর যখন বেগম সার্থানায়
নীত হইয়া, অপমান ও নির্যাতনের চরম সীমায় উপনীত
হইয়াছিলেন,—যখন তিনি একপ্রকার অনশন-অর্দ্ধাশনে
সাত দিন কামানের তলদেশে বদ্ধ ছিলেন,—যখন প্রতি
মুহূর্ত্তে তিনি জীবননাশের আশঙ্কা করিতেছিলেন—তখন
সেই টমাস্‌ই, পূর্ব অপমান বিস্মৃত হইয়া, তাঁহার উদ্ধার-
কল্পে ছুটিয়া আসিয়াছিলেন। টমাস্‌ই বিশেষ চেষ্টা
করিয়া বেগমকে সিংহাসনে পুনঃপ্রতিষ্ঠিত করিয়াছিলেন।

বিপন্ন বেগমের উদ্ধারসাধন ও তাঁহাকে স্বপদে প্রতিষ্ঠিত
করিবার জন্ত টমাস্‌ই অগ্রসর হইলেন কেন? কেহ হয়ত
বলিবেন যে, টমাস্‌ বেগমকে ভালবাসিতেন; লেভামুলত্
সেই প্রেমের প্রতিদ্বন্দী হওয়াতেই টমাস্‌ অপমান বোধ
করিয়া তাঁহার কার্য ত্যাগ করিয়া চলিয়া গিয়াছিলেন;
এক্ষণে সেই পূর্বপ্রেমের বশবর্তী হইয়াই তিনি বেগমের
এই যোর ছরবস্থার সময় তাঁহার সাহায্য করিতে অগ্রসর
হইয়াছিলেন। কিন্তু স্থিরচিত্তে চিন্তা করিলে, একথা
সমীচীন বলিয়া মনে হয় না। টমাস্‌ যখন বেগমের
উদ্ধারসাধন করিলেন, তখন ত তাঁহার প্রেমের প্রতিদ্বন্দী
লেভামুলত্ মৃত; তখন ত টমাস্‌ ইচ্ছা করিলেই বেগমের

ধন-প্রাণ-মান সমস্তই করতলগত করিতে পারিতেন—
নিজেই সার্থানার অধীশ্বর হইয়া তাঁহার অঙ্কলক্ষ্মীকে
লইয়া জীবন যাপন করিতে পারিতেন ;—কেহই তাঁহাকে
বাধা দিতে পারিত না ।

কিন্তু টমাস্ কি করিলেন ? তিনি বেগমকে স্বপদে
সম্পদে পুনঃপ্রতিষ্ঠিত করিয়া কার্যাস্তরে চলিয়া গেলেন ;
পুরস্কার দূরে থাকুক, সামান্য ধন্যবাদও তিনি গ্রহণ
করিলেন না । টমাস্ যদি পূর্বে কেবলমাত্র রূপজ-
মোহেই বেগমের দিকে আকৃষ্ট হইতেন, তাহা হইলে
বেগমের সে রূপ ত অন্তর্হিত হয় নাই, তিনি ত
তখনও রূপসী ছিলেন—পরমামুন্দরী ছিলেন । কিন্তু
তাহা নহে ; ইহা রূপজ-মোহ নহে । বীর টমাস্
বেগমের রূপে প্রথমে আকৃষ্ট হইলেও কিছুদিনের মধ্যেই
তাঁহার হৃদয়ের অতুল গুণরাশির দিকে অধিকতর আকৃষ্ট
হইয়াছিলেন । রূপের মোহ দুইদশদিনে কাটিয়া যায়,
সামান্য উপেক্ষায় সে সুখের স্বপ্ন ভাঙ্গিয়া যায়, সে মোহ
দীর্ঘকালব্যাপী হয় না ; কিন্তু গুণের আকর্ষণ আজীবনস্থায়ী
হয় ;—তাহা অন্তর্হিত হয় না—তাহা অমর হইয়া হৃদয়কে
মহত্বের উর্দ্ধতম শিখরে সমাসীন করে ।

টমাসের শ্রায় বীরপুরুষ বেগমের গুণের কথা,—তাঁহার

হৃদয়ের সৌন্দর্যের কথা, আর তাঁহার অপরিমিত প্রতিভার কথা ভুলিতে পারেন নাই। তাই এই অসময়ে, এই জীবন-মরণের সন্ধিক্ষণে, উপস্থিত হইয়া বেগমের সেই গুণেরই প্রতি সমাদর দেখাইয়া তাঁহার ঞ্চয় প্রতিভাশালিনী বুদ্ধিমতী, মহানুভবা মহিলাকে তাঁহার অপহৃত আসনে বসাইয়া দিয়া কার্য্যান্তরে চলিয়া গেলেন। রূপের উপাসক এমন করিয়া স্বার্থত্যাগ করিতে পারে না—রূপের শাস্ত্রে একথা লেখে না। ইহা গুণের চরণে প্রীতিপুষ্পাঞ্জলি। টমাসের এই মহত্বের প্রশংসা না করিয়া থাকিতে পারা যায় না ; কিন্তু সেই সঙ্গে সঙ্গে যে মহিলার গুণে আকৃষ্ট হইয়া তিনি এই মহত্বের পরিচয় প্রদান করিয়াছিলেন, সেই গুণাবলীরও মহত্ব কীর্তন করিতে হয়।

বেগম সমরু টমাসের এই অকৃত্রিম গুণানুরাগের কথা বিস্মৃত হ'ন নাই—হইতে পারেন না। যিনি বিপন্নের আশ্রয়দাত্রী ছিলেন—জাতিধর্মনির্বিশেষে যঁহার করুণাধারা দেশবিদেশে বর্ষিত হইয়াছিল, তিনি কি টমাসের উপকার, টমাসের মহত্বের কথা ভুলিয়া যাইতে পারেন ? তাহা হইলে কি তিনি সর্ধানার অধিষ্ঠারী হইতে পারিতেন,—তাহা হইলে কি অপক্লপাত ঐতিহাসিক তাঁহার গুণগান করিত—তাহা হইলে কি সদাশয় ইংরেজ-সরকার

তাঁহাকে আশ্রয় দিতেন, তাঁহাকে বন্ধুভাবে গ্রহণ করিতেন—তাঁহা হইলে কি সার উইলিয়াম্ বেণ্টিঙ্কের ঞায় মহানুভব শাসনকর্তা তাঁহাকে ‘My esteemed friend’—‘আমার সমাদৃত বন্ধু’ বলিয়া অভিবাদন করিতেন ?

১৮০২ খ্রীষ্টাব্দে বহরমপুরে টমাসের মৃত্যু হইলে, বেগম সমরু তাঁহার দুঃস্থ পরিবারবর্গের ভার গ্রহণ করিয়াছিলেন—টমাসের পুত্র জন্ টমাসকে আপনার কার্যে নিযুক্ত করিয়াছিলেন এবং তাহার সহিত আঘা ওয়ানাস্ (Agha Wanus) নামে তাঁহার একজন আর্মিনীয় কর্মচারীর কন্যার বিবাহ দিয়াছিলেন।

পরিশেষে, বেগম সমরুর উন্নত চরিত্র, বদান্যতা ও পরোপকার-প্রবৃত্তির জাজ্জল্যপ্রমাণস্বরূপ আমরা তৎকালীন গভর্নর-জেনারেল লর্ড উইলিয়াম্ বেণ্টিঙ্কের একখানি পত্র এইস্থলে উদ্ধৃত করিব। কার্যত্যাগ করিয়া, বিলাত গমনকালে বেণ্টিঙ্ক বেগমকে লিখিয়াছিলেন :—

To

HER HIGHNESS

THE BEGUM SOMBRE.

My Esteemed Friend,

I cannot leave India without expressing

the sincere esteem I entertain for your Highness's character. The benevolence of disposition and extensive charity which have endeared you to thousands, have excited in my mind sentiments of the warmest admiration ; and I trust that you may yet be preserved for many years, the solace of the orphan and widow, and the sure resource of your numerous dependants. To-morrow morning I embark for England, and my prayers and best wishes attend you, and all others who like you, exert themselves for the benefit of the people of India.

I remain,
 With much consideration,
 Your sincere friend,
M. W. BENTINCK.

Calcutta,
 March 17th 1835. }



সেন্ট গেরী গীর্জা — সর্দানা

[পৃষ্ঠা ১১২]

উপরি-উক্ত পত্রখানি সরকারী আদব-কায়দা-দোরস্ত বাধি-গতের সমষ্টি নহে, অথবা উহা বহু উপাসনার প্রাপ্ত প্রশংসাপত্রও নহে ; উহাতে কায়দা-কানুনের চিহ্ন-মাত্রও নাই ; উহা বন্ধুর নিকট লিখিত বন্ধুর পত্র— উহা গুণযুক্ত বাক্যবের হৃদয়ের অকৃত্রিম অনুরাগের নিদর্শন—উহা প্রকৃত প্রশংসাতাজনের গুণকীর্তন ! আর যে গুণকীর্তনও যে-সে ব্যক্তি করিতেছেন না ;—তিনি ভারতের শাসনকর্তা—তিনি সদাশয়, ভারতহিতৈষী প্রকৃত গুণজ্ঞ গভর্নর-জেনারেল লর্ড উইলিয়াম্ বেণ্টিঙ্ক !

এখনও সার্থানা আছে,—এখনও বেগমের সেই প্রাসাদ আছে—এখনও তাঁহার প্রতিষ্ঠিত ধর্মভবন তাঁহার নাম ঘোষণা করিতেছে—এখনও কত স্থানে তাঁহার কীর্তি রহিয়াছে ;—কিন্তু যিনি একদিন এই সার্থানায় অমিত-তেজে রাজত্ব করিয়া গিয়াছেন,—যাঁহার আশ্রয়ে কত দীন-ভ্রুখী প্রতিপালিত হইয়াছে—যাঁহার করুণায় কত ব্যথিতের বেদনা দূর হইয়াছে—সেই বেগম সমরু নাই—সে সার্থানার বিস্তীর্ণ জমিদারী এখন ছিন্নভিন্ন । সব গিয়াছে—আছে শুধু কীর্তি । তাই আমাদের নীতিবিদেরা বলিয়া থাকেন :—

কীর্তির্ষস্য স জীবতি

বেগম সমরু কীৰ্ত্তিই তাঁহাকে অমর কৰিয়া রাখি-
য়াছে ;—তাঁহাকে বৰণীয়া কৰিয়া রাখিয়াছে । অপক্ষপাত
ঐতিহাসিক নিঃসঙ্কোচে বলিবেন :—

“She was truly a great woman.”

প্রমাণ-পঞ্জী

(ক) প্রথম শ্রেণীর সাক্ষী :—

1. *Military Memoirs of George Thomas*,
Compiled and arranged from Mr.
Thomas's original Documents, By
William Francklin, Calcutta, 1803.

ইহা হইতে বেগমের আচার-ব্যবহার, সৈন্যসংখ্যা,
জাগীর প্রভৃতির একটি সুন্দর বিবরণ পাওয়া
যায়। প্রকৃতপক্ষে ইহা বেগমের শত্রুপক্ষীয়
বিবরণ।

2. *Rambles and Recollections of an Indian
Official*, By Major-General Sir W. H.
Sleeman, 2nd. Edition, Edited by
V. Smith (2 Vols.), Westminster,
1893 ; See Vol. II.

ইহা সমধিক বিশ্বাসযোগ্য। স্লিম্যান্ বেগমের শেষ

বয়সের সমসাময়িক ; তিনি বেগমের জীবনের ঘটনারাজীর প্রকৃত রহস্য উদঘাটন করিবার জন্য বহু শ্রমস্বীকার করিয়াছেন। এই পুস্তকের প্রথম সংস্করণ ১৮৪৪ খ্রীষ্টাব্দে প্রকাশিত হয়।

3. *Military Memoir of Lt. Col. J. Skinner, C. B.* J. Baillie Fraser (2 Vols.), London, 1851, Vol. I, Ch. X.

বেগম সমরু সম্বন্ধে ইহাতে যাহা লিখিত হইয়াছে, তাহা প্রধানতঃ টমাস্ ও Francklin সাহেবের গ্রন্থ হইতে গৃহীত।

4. *Bacon's First Impressions and Studies from Nature in Hindostan*, (2 Vols.), London 1837, Vol. II.

গ্রন্থকার বেগমের শেষ বয়সের সমসাময়িক ;—বহুবার বেগমের^{*} ভোজে যোগদান করিয়াছিলেন ; তিনি না কি বেগমের কর্মচারীগণের নিকট হইতে বেগম সমরু সম্বন্ধে যাহা অবগত হইয়াছিলেন, তাহাই ইহাতে লিপিবদ্ধ করিয়াছেন ; কিন্তু তাঁহার

গ্রন্থে এত মিথ্যাকথা, গুজব প্রভৃতি লিখিত হইয়াছে যে, তাহা একেবারে অপাঠ্য। তবে এই গ্রন্থ হইতে বেগমের আচার-ব্যবহার বিষয়ের একটি সুন্দর বিবরণ পাওয়া যায়।

5. *The Despatches, Minutes of Correspondence of the Marquis Wellesley, K. G. during his administration in India, London 1837, (5 Vols.), Edited by R. Montgomery Martin ; See Vol. III, pp. 229 and 243.*

ইহা হইতে ইংরেজের সহিত বেগমের সন্ধির কথা জানা যায়।

6. *Extracts of Letters from Major Polier at Delhi, to Colonel Ironside at Beigram, May 22, 1776. Asiatic Annual Register for 1800 (London 1801)—See Miscellaneous Tracts, p. 29.*

ইহা হইতে সমরুর জীবনের একটি সুন্দর বিবরণ পাওয়া যায় ; বেগমের বিষয় ইহাতে কিছুই নাই।

(খ) দ্বিতীয় শ্রেণীর সাক্ষী :—

1. *Tours in Upper India* (2 Vols.) ; By Major Archer, Late Aid-de-Camp to Lord Combermere, London 1833. See Vol. I.

আর্চার, বেগমের শেষ বয়সের সমসাময়িক । তিনি ১৮২৮ খ্রীষ্টাব্দের ফেব্রুয়ারী মাসে সার্বানা গমন করিয়াছিলেন । বেগমের জীবন-কাহিনী সম্বন্ধে তিনি লিখিতেছেন,—“The above sketch is from one who has known her all his life, and who is dignified by the name of her “son.” নানা বাজার-গুজবের অসম্ভাব না থাকিলেও, ইহার অনেক কথাই বিশ্বাসযোগ্য ।

2. Major William Thorn's *Memoir of the War in India*, London (1818), pp. 386, 509.
3. *Merat Observer*—(Weekly), 1836.
4. *Friend of India*, 1838.

5. *Memoir of the Life and Military services of Viscount Lake* ; By Col. Hugh Pearse, London 1908. (p. 253).

6. "*Sardhana*" 2nd. Edn. 1902.

ইহা বেগমের সার্থানাস্থ গীর্জার Capuchin Father-গণ প্রকাশ করেন। এই পুস্তিকাখানি অনেক স্থলেই সিম্যান্কে অবলম্বন করিয়া লিখিত। ইহা একেবারে পক্ষপাতিত্বশূন্য নহে। ইহাতে বেগমের দান ও কীর্তিকলাপের সুন্দর বিবরণ প্রদত্ত হইয়াছে। ১৮৯৪ খ্রীষ্টাব্দে এই পুস্তিকার প্রথম সংস্করণ প্রকাশিত হয়।

7. *Shah Aulum* ; By William Francklin, 2nd. Edition, Allahabad, 1915.

ফ্রাঙ্কলিন্ বেগমের সমসাময়িক ছিলেন ; তাঁহার গ্রন্থ হইতে বেগমের জীবনের কোন কোন ঘটনার বিস্তৃত বিবরণ পাওয়া যায়। ১৭৯৮ খ্রীষ্টাব্দে ইহার প্রথম সংস্করণ প্রকাশিত হয়।

8. *North Western Province Gasetteer*, E.T. Atkinson, Vol. II, Allahabad, 1875.

এই খণ্ডে বেগমের জীবন-কাহিনী লিপিবদ্ধ হইয়াছে।

ইহা প্রধানতঃ Thomas, Archer, Mundy's *Sketches*, Bacon প্রভৃতি অবলম্বনে লিখিত। ইহাতে প্রদত্ত বেগমের শেষ জীবনের বিবরণটুকু বিশ্বাসযোগ্য।

Vol. III, Allahabad, 1875; এই খণ্ডে বেগমের জাগীর, রাজস্ব প্রভৃতির সুন্দর বিবরণ পাওয়া যায়। রাজস্ব-ব্যাপার T. C. Plowden সাহেবের *Settlement Report*, 1838, অবলম্বনে লিখিত।

9. *Oriental Biographical Dictionary*—Beale-Keene, Calcutta 1881.

বীল্ আগ্রায় কৰ্ম করিতেন; তিনি তারিখ-সংগ্রহে বিশেষ যত্ন করিয়াছেন।

10. Capt. Mundy's *Journal of a Tour in India*.

11. Bishop Heber's *Journal*, 1827.

12. *Letters from India*, Victor Jacquemont, 2 Vols. 1834.

মুন্ডী, হেবার ও জেকুমণ্টের বিবরণ অসত্য বাজার-গুজবে পূর্ণ।

13. *Tour in Upper India, 1804-14* ; By A. D.

অসত্য বাজার-গুজবে পূর্ণ হইলেও, এই লেখিকার বিবরণ হইতে বেগমের আচার-ব্যবহার, প্রভৃতির একটা চিত্র পাওয়া যায় ।

14. *Hindustan under Free Lances 1770-1820* ; By H.G. Keene, London 1907.

বেগমের বিষয়ক অধ্যয়ণের কোন স্বতন্ত্র মূল্য নাই ।

15. *European Military Adventurers of Hindustan from 1784 to 1803*. Compiled by Herbert Compton, London. 1892.

বিশেষ কোন নূতন তথ্য নাই ।

(গ) মূল্যহীন সাক্ষী :-

1. '*Begam of Sardhana*'—A. Saunder Dyers, Late Chaplain of Meerut, *Calcutta Review*, 1894, April.

ইহার অধিকাংশস্থলই '*Sardhana*' হইতে গৃহীত । কোন নূতন তথ্য না থাকিলেও, ইহাতে বেগমের

ধর্মমন্দির প্রভৃতি কীর্তিরাজীর একটি সুন্দর বর্ণনা আছে।

2. *'Romance & Reality of Indian Life.'*—
Calcutta Review, 1844, p. 417.

এই অজ্ঞাতনামা লেখক এক সময়ে বেগমের নিমন্ত্রণে উপস্থিত ছিলেন। কোন নূতন তথ্য জানা যায় না।

3. Higginbotham's *Men whom India has known*—See "*Sumroo*".

ইহাতে বেগম সমরু সম্বন্ধে যাহা লিখিত হইয়াছে, তাহা বেকনের গ্রন্থ অবলম্বনে লিখিত।

4. *'A Calcutta Benefactress'*—*Bengal Past & Present* (Historical Socy.'s Journal) 1907, p. 1137.

আট-আনা-সংস্করণ-গ্রন্থমালা

যুরোপ প্রভৃতি মহাদেশে “ছয়-পেনি-সংস্করণ”—“সাত-পেনি-সংস্করণ” প্রভৃতি নানাবিধ সুলভ অথচ সুন্দর সংস্করণ প্রকাশিত হয়—কিন্তু সে সকল পূর্বে প্রকাশিত অপেক্ষাকৃত অধিক মূল্যের পুস্তকাবলীর অন্ততম সংস্করণ মাত্র। বাঙ্গালাদেশে—পাঠকসংখ্যা বাড়িয়াছে, আর বাঙ্গালাদেশের লোক—ভাল জিনিসের কদর বুঝিতে শিখিয়াছে; সেই বিশ্বাসের একান্ত বশবর্তী হইয়াই, আমরা বাঙ্গালা দেশের লক্ষপ্রতিষ্ঠ কীর্তিকুশল গ্রন্থকারবর্গ-রচিত সারবান্, সুখপাঠ্য, অথচ অপূর্বে-প্রকাশিত পুস্তকগুলি এইরূপ সুলভ সংস্করণে প্রকাশিত করিতে প্রবৃত্ত হইয়াছিলাম। আমাদের চেষ্টা যে সফল হইয়াছে, ‘অভাগী’ ও ‘পল্লীসমাজের’ এই সামান্য কয়েক মাসের মধ্যে তৃতীয় সংস্করণ এবং ‘বড়বাড়ী’, ‘অরক্ষণীয়া’ ও ‘ধর্মপালের’ দ্বিতীয় সংস্করণ ছাপিবার প্রয়োজন হওয়াই তাহার প্রমাণ।

যে আশা লইয়া এ কার্যে ব্রতী হইয়াছিলাম, ভগবৎ-প্রসাদে ও সহৃদয় পাঠকবর্গের অনুগ্রহে আমাদের সে আশা অনেকাংশে ফলবর্তী হইয়াছে। “ক্লেশঃ ফলেন হি পুনর্নবতাং বিধত্তে।” শ্রম সার্থক হইলে হৃদয়ে নূতন আশা ও

আকাজ্জার উদয় হয়। আমরাও অনেক কার্যের কল্পনা করিতেছি। এই সিরিজের উত্তরোত্তর উন্নতির সহিত একে একে সেই সকলগুলি কার্যো পরিণত করিতে চেষ্টা করিব।

বাঙ্গালাদেশে—শুধু বাঙ্গালা কেন—সমগ্র ভারতবর্ষে এরূপ সুলভ সুন্দর সংস্করণের আমরাই সর্বপ্রথম প্রবর্তক। আমরা অনুরোধ করিতেছি, প্রবাসী বাঙ্গালী মাত্রেই আট-আনা-সংস্করণ গ্রন্থাবলীর নির্দিষ্ট গ্রাহকশ্রেণীভুক্ত হইয়া এই ‘সিরিজের’ স্থায়িত্ব সম্পাদন ও আমাদের উৎসাহবর্ধন করুন।

কাহাকেও অগ্রিম মূল্য দিতে হইবে না, নাম রেজেষ্টারী করিয়া রাখিলেই আমরা যখন যেখানি প্রকাশিত হইবে, সেইখানি ভি, পি ডাকে প্রেরণ করিব। সর্বসাধারণের সহানুভূতির উপর নির্ভর করিয়াই আমরা এই বহুব্যয়সাধ্য কার্যো হস্তক্ষেপ করিয়াছি; গ্রাহকের সংখ্যা নির্দিষ্ট থাকিলে আমাদের দ্বিতীয় বা তৃতীয় সংস্করণ ছাপাইয়া অধিক ব্যয়ভার বহন করিতে হইবে না।

এই গ্রন্থমালায় প্রকাশিত হইয়াছে—

- ১। অস্তাগী (তৃতীয় সংস্করণ)—শ্রীজলধর সেন
- ২। ধর্মপাল (২য় সংস্করণ)—শ্রীরাখালদাস বন্দ্যোপাধ্যায় এম্-এ
- ৩। পল্লী-সমাজ (তৃতীয় সংস্করণ)—শ্রীশরৎচন্দ্র চট্টোপাধ্যায়

- ৪। কাঞ্চনমালা (ছাপা নাই)—মহামহোপাধ্যায়
শ্রীহরপ্রসাদ শাস্ত্রী এম্-এ, সি-আই-ই
- ৫। বিবাহনিপলব—শ্রীকেশবচন্দ্র গুপ্ত এম্ এ, বি-এন্
- ৬। চিত্রালি—শ্রীমুখীন্দ্রনাথ ঠাকুর বি-এন্
- ৭। দুর্বাদল—শ্রীযতীন্দ্রমোহন সেন গুপ্ত
- ৮। শাস্ত্রত ভিখারী—শ্রীরাধাকমল মুখোপাধ্যায় পি-আর্ এম
- ৯। বড়বাড়ী (দ্বিতীয় সংস্করণ)—শ্রীজলধর সেন
- ১০। অরক্ষণীয়া (দ্বিতীয় সংস্করণ)—শ্রীশরৎচন্দ্র চট্টোপাধ্যায়
- ১১। ময়ূখ—শ্রীরাখালদাস বন্দ্যোপাধ্যায় এম্-এ
- ১২। সত্য ও মিথ্যা—শ্রীবিপিনচন্দ্র পাল
- ১৩। ক্রপের বালাই—শ্রীহরিসাধন মুখোপাধ্যায়
- ১৪। সোণার পদ্ম—শ্রীসরোজরঞ্জন বন্দ্যোপাধ্যায় এম্-এ
- ১৫। লাইকা—শ্রীমতী হেমনলিনী দেবী
- ১৬। আলোয়া—শ্রীমতী নিরুপমা দেবী
- ১৭। বেগম জয়কুমার (সচিত্র)—শ্রীব্রজেন্দ্রনাথ বন্দ্যোপাধ্যায়
- ১৮। নকল পাঞ্চাবী—শ্রীউপেন্দ্রনাথ দত্ত (যন্ত্রস্থ)

গুরুদাস চট্টোপাধ্যায় এণ্ড সন্স্

২০১, কর্ণওয়ালিস্ স্ট্রীট, কলিকাতা

শ্রীব্রজেন্দ্রনাথ বন্দ্যোপাধ্যায়-প্রণীত

অগ্ৰাণ্ড গ্রন্থ

নূরজহান্

মূল্য ৫০ আনা ।

মোগল-সম্রাট জহাঙ্গীর-মহিষী, জগজ্জ্যাতিঃ নূরজহানের অপূর্ব জীবন-কাহিনী ;—পড়িতে উপন্যাসের ন্যায় মনোহর । ৫ খানি সুন্দর হাফটোন চিত্র সুশোভিত । পাটনা খুদাবক্শ্ লাইব্রেরী হইতে গৃহীত দুইশত বৎসরের প্রাচীন নূরজহানের অপূর্ব চিত্র ইহাতে প্রদত্ত হইয়াছে । স্বর্ণাঙ্কিত বাঁধাই ।

অধ্যাপক শ্রীমদুনাথ সন্নকান্ন, এম-এ বলেন :—“এই সুলিখিত বিশুদ্ধ ঐতিহাসিক জীবনীখানি অতি সুন্দর ছাপা ও বাঁধা হইয়াছে । এতদিনে বাঙ্গালা ভাষায় নূরজহানের বিজ্ঞান-সম্মত প্রণালীতে রচিত ও সমালোচনাপূর্ণ বিবরণ বাহির হইল ; ইহা বঙ্গ ভাষাভাষী-দিগের গৌরবের বিষয় । ব্রজেন্দ্রনাথ বাঙ্গালা ভাষায় একজন দক্ষ লেখক ; নূরজহানের মত বিষয় পাইয়া এবং সমস্ত আদি বিবরণগুলি ব্যবহার করিয়া তাঁহার “নূরজহান্” অতি উপাদেয় ও সুপাঠ্য পুস্তক হইয়াছে । আশা করি, এই গ্রন্থ প্রকাশের পর নূরজহান্ সম্বন্ধে প্রচলিত ভ্রমগুলি আমাদের সাহিত্য ও মাসিক হইতে তিরোধান করিবে, এবং এই গ্রন্থকে আদর্শ করিয়া বিশুদ্ধ বিজ্ঞান-সম্মত অগ্ৰাণ্ড ঐতিহাসিক জীবনী রচিত হইয়া বঙ্গভাষাকে ধনী করিবে ।” প্রবাসী—জ্যৈষ্ঠ ১৩২৩ ।


বাঙ্গলার বেগম

দ্বিতীয় সংস্করণ

(একমাস পরে বাহির হইবে)

অধ্যাপক শ্রীযুক্ত যত্ননাথ সরকার, এম-এ লিখিত।
ভূমিকা-সম্বলিত। সুন্দর কাগজ, সুন্দর ছাপা, তাহার
উপর স্বর্ণাঙ্কিত কাপড়ের বাঁধাই। অনেকগুলি হাফটোন
চিত্র সুশোভিত। মূল্য ৥০ আনা।

প্রবীণ ঐতিহাসিক শ্রীনিখিলনাথ রায়, বি-এল
বলেন :—“এরূপ সুখপাঠ্য একখানি ঐতিহাসিক গ্রন্থকে
বাঙ্গলা সাহিত্য-ভাণ্ডারের রত্নস্বরূপ বলা যাইতে পারে।”



(ইংরেজী অনুবাদ)

প্রবীণ ঐতিহাসিক শ্রীযুক্ত অক্ষয়কুমার মৈত্রেয়, বি-এল
লিখিত ভূমিকা-সম্বলিত। মূল্য ৫০ আনা।

বিলাতের **H. Beveridge** I.C.S. ও **Vincent**
A. Smith I.C.S. কর্তৃক প্রশংসিত।

প্রিয়জনকে উপহার দিবার—

কয়েকখানি অতি উৎকৃষ্ট গ্রন্থ—

বিশ্বুর ছেনে	১।০	পণ্ডিত মশাই	১।০
বিরাজ বউ	১।০	শ্রীকান্ত	১।০
পার্বীতা	১।০	দেবদাস	১।০
মেজদিদি	১।০	কামিনাথ (যন্ত্র)	
বড়দিদি	।।	চক্রনাথ	।।
বৈকুণ্ঠের উইল	১।০	মিস্ত্রি	।।
মিলন মন্দির	১।০	দিদি	১।০
বিনিময়	১।০	অন্নপূর্ণার মন্দির	১।০
বিদেশিনী	১।০	অষ্টক	১।০
পোষ্যপুত্র	১।০	রূপের মূল্য	১।০
মন্ত্রশক্তি	১।০	রঙ্গমহাল	১।০
মহানিশা	১।০	কঙ্কণচোর	১।০
জ্যোতিঃহার	১।০	মেজ বউ	১।০
বাণী	১।০	দুর্গেশনন্দিনী	১।০
কল্যাণী	১।০	বিষয়ক্ষ	১।০
কুলমঞ্জরী	১।০	কপালকুণ্ডলা	১।০
সাবিত্রী সত্যবান	১।০	কৃষ্ণকান্তের উইল	১।০
শৈব্যা	১।০	আশালতা	১।০
শমিষ্ঠা	১।০	ভ্রমর	১।০
সীতাদেবী	১।০	বোদিনী	১।০
মম্বনা কোথায়	১।০	উষা	১।০

প্রাপ্তিস্থান— গুরুদাস চট্টোপাধ্যায় এণ্ড সন্স

২০১, কণ্ঠওয়ালিস্ ট্রীট, কলিকাতা

1

2

